


Julien BERNARD

Professeur agrégé d'histoire-géographie

1486-1501

PIÈCES JUDICIAIRES ET
PROCÈS-VERBAUX SUR
L'ASSASSINAT DE JEAN
EDER BEAUMANOIR



Archives départementales de Loire-Atlantique
Trésor des Chartes du duché de Bretagne
Procédures civiles et criminelles
Cote : E 200-1

Méthodes de transcription et typographie adoptées

Afin de mieux se retrouver dans les feuillets, nous avons conservé la numérotation telle qu'elle se présente à travers la numérisation du dossier sur le site des archives départementales de Loire-Atlantique sous la cote E-200 1. Lien vers la première page du fonds numérisé :

<https://archives-numerisees.loire-atlantique.fr/v2/ark:/42067/e43d22e164c6d9f6b85aadd371964b7b>

L'orthographe a été modernisée et la ponctuation adaptée pour une meilleure lisibilité. Les passages en italiques correspondent à des séquences en latin ou en langue étrangère. Lorsqu'ils apparaissent dans les retranscriptions, les discours directs sont introduits par deux points et des guillemets. Aussi, nous avons choisi de faire figurer en lettres majuscules les noms propres et les lieux. De même, des formes lexicales ont été simplifiées afin d'alléger l'ensemble. Quelques tournures propres à la langue du XV^e siècle sont expliquées en notes de bas de page ainsi que des éléments sur les lieux et l'identification des personnages auditionnés et cités dans les procès-verbaux. Enfin, nous avons privilégié l'utilisation du *Dictionnaire de l'ancienne langue française et de tous ses dialectes du IX^e au XV^e siècle* de Frédéric Godefroy et l'usage du Littré.

Pour faciliter la lecture, nous avons opté pour un inventaire des pièces (1/) et des auditions (2/) livrées à l'occasion de cette procédure judiciaire et criminelle.

Inventaire des pièces

1/ PIÈCES JUDICIAIRES DU PROCÈS DE GEORGES TOURNEMINE

Les différentes pièces judiciaires versées au dossier en amont des procès-verbaux (lesquels débutent à partir du f° 112) ne sont pas classées chronologiquement. Elles témoignent ce faisant du bras de fer juridique qui oppose la justice ducale face à la progressive mainmise de Charles VIII sur l'affaire.

- 18 décembre 1486** : Instance du procureur du fils de Jean Eder, portant le même nom, au lieutenant de Nantes (f°4-7)
- 28 décembre 1486** : État des auditions par le sergent général et d'armes du duc (f° 7-8)
- 8 janvier 1487** : Appel des témoins au Bouffay à Nantes (f° 9-10)
- 8 février 1487** : Comparution à la cour de Rennes (f° 10-14)
- 26 mars 1487** : Appel à comparaître des frères cadets Tournemine (f° 14-16)
- 20 novembre 1490** : Appel à comparaître des frères cadets Tournemine et Jean du Breil (f° 17-25)
- 20 décembre 1490** : Appel à comparaître des frères cadets Tournemine (f° 26-35)
- 15 décembre 1492** : Appel à comparaître des frères cadets Tournemine (f° 36-38)
- 14 janvier 1492** : Appel à comparaître des frères cadets Tournemine (f° 38-42)
- 20 mars 1492** : Appel à comparaître des frères cadets Tournemine (f° 43-46)
- 15 avril 1493** : Appel à comparaître des frères cadets Tournemine (f° 47-54)
- 7 août 1493** : Appel de la cour de Rennes pour la comparution de Georges Tournemine (f° 55-59)
- 31 mai 1493** : Charles VIII suspend l'enquête contre Georges Tournemine (f° 64-70)
- 16 décembre 1486** : François II, duc de Bretagne, ordonne une enquête sur le meurtre de Beaumanoir (f° 72-76)
- 25 janvier 1487** : Conseil du duc de Bretagne, François II, demandant la saisie et l'emprisonnement des coupables dans l'affaire Jean Eder (f° 76-82).
- 17 octobre 1494** : Le Parlement de Bretagne pour le roi Charles VIII conclut l'affaire Beaumanoir (f° 84-110)

2/ AUDITIONS / PROCÈS-VERBAUX

= Les *** signalent les témoignages les plus significatifs pour l'analyse du meurtre.

Auditions faites à l'aumônerie de Rozet (commune de Plessé) :

(14-15 décembre 1486)

- Michine du Pas, marchand, demeurant au bourg de Plessé, 40 ans (f°112-115)
- Jean de La Prinsonniere, sieur de Bouère, 35 ans (f° 115-116)
- Yvonnet Jolis, bourg de Quintin, 25 ans (f° 116-132)

Auditions faites à Lamballe :

(19 décembre 1486)

- Pierre de La Marre, procureur de la cour de La Hunaudaye, 40 ans (f° 132-140)
- Jean de Coesquen sieur de [La -paye], 33 ans (f°140-143)
- Guillaume Guehault, l'un des veneurs de François Tournemine, 60 ans (f° 143-149)
- Thomas Le Bourdaz, 45 ans (f° 149-159)
- Olivier Le Gaignours, 30 ans (f° 159-167)

(20 décembre 1486)

- Raoullet Mahé, demeurant à Boubriac, attaché au seigneur de Beaumanoir, 30 ans (f° 167-174)
- Guillaume Boterel, écuyer de cuisine de La Hunaudaye, 43 ans (f° 174-181)***
- Pierre de Champran, maître d'hôtel de Marie de Villiers, 54 ans (f° 182-187)

Auditions faites à La Hunaudaye :

(25 décembre 1486)

- Marie de Villiers, dame de La Béraudière, mère des frères Tournemine, 40 ans (f° 188-193)
- Jeanne de Marennes, damoiselle de chambre de Marie de Villiers, 20 ans (f° 193-198)***
- Marie la Bastarde, 14 ans (f° 199-201)
- Jean de La Moussaye, sieur de Lorgeril, maître d'hôtel du seigneur de La Hunaudaye, 60 ans (f° 201-203)
- Louise de La Ville Thebault, damoiselle de Marie de Villiers, 20 ans (f° 204-206)
- Beatrix de Lescuz, damoiselle, 20 ans (f° 206-207)
- Marguerite de La Noue, damoiselle, 35 ans (f° 207-209)
- Jean Gallant, poursuivant du seigneur de La Hunaudaye, 30 ans (f° 209-210)
- Olivier Josses, portier du château de La Hunaudaye, 60 ans (f° 210-212)
- Pierre Le Maistre, bouteiller de la maison de La Hunaudaye, 32 ans (f° 213-216)

(2 décembre 1486)

- Jean Rouxel, 24 ans (f° 217-220)
- Alain Berthelemer, 45 ans (f° 220-225)
- Guillaume de la Chaussée, demeurant avec Marie de Villiers, 23 ans (f° 226-228)

Auditions faites à Jugon :

(23 décembre 1486)

- Guillemette de Lesque, femme de Guillaume du Breil (frère de Jean du Breil), 45 ans (f° 229)
- Yvonnet le Hantours, 40 ans (f° 230)

- Robin Bertrand, demeurant à Plédéliac, 51 ans (f° 230-231)
- Pierre Ferron, lieutenant de la cour de Jugon, sous-garde des forêts de La Hunaudaye (f° 231-236)
- Jean de Beaubois, écuyer, seigneur de Beaubois, 50 ans (f° 237-238)
- Guillemette de Beaubois, damoiselle, femme de Jean de Tréal, 19 ans (f° 238-239)
- Jeanne de Beaubois, damoiselle, fille du seigneur de Beaubois, 16 ans (f° 240-241)
- Fabienne Triguillon, 22 ans (f° 241-242)

Auditions faites à Quintin :

(27 décembre 1486)

- Nicolas Le Moine, de la paroisse de Notre-Dame de Lamballe, demeurant avec l'abbé de Coetmalouan, 19 ans (f° 242-243)
- Yvonnet appelé « *bastart de La Haye Eder* » attaché au seigneur de Beaumanoir, 22 ans (f° 244-255)***

(27 décembre 1486)

- Charles Rolon, attaché au seigneur de Beaumanoir, 22 ans (f° 256-257)
- Jean Le Roy, attaché au seigneur de Beaumanoir, 30 ans (f° 257-258)

(28 décembre 1486)

- Vincent le Champion, autrefois portier de la maison de La Beraudière, 20 ans (f° 258-260)
- Tibault Guillet, jardinier, 23 ans (f° 261-263)
- Pierre Sillant, demeurant à Pleubian, 53 ans (f° 264)
- Jean Hualen, demeurant à Pleubian, 40 ans (f° 265)
- Guillaume Le Bozer, 27 ans (f° 266)

(2 janvier 1487)

- Guillaume Beliquet, attaché à Marie de Villiers, 30 ans (f° 267-275)

(7 janvier 1487)

- Tristan Le Nepveu, écuyer, 35 ans (f° 275-280)

(7 février 1487)

- Tristan Le Nepveu, écuyer, 35 ans (f° 280-282)
- Yvonnet, bâtard de La Haye Eder (f° 282-285)

Enquête de la cour de Rennes par mandat du duc de Bretagne, François II, représenté par Jean du Bois, lieutenant de la cour :

(5 mars 1487)

- Henry Le Chaton, de la paroisse de Pleubian (f° 285-289)
- Jean Le Quéré, de la paroisse de Pleubian, 50 ans (f° 289-291)

- Hervé Chaton, fils d'Henry Le Chaton, Pleubian (f° 291-293)
- Vincent Le Merd (f° 294-301)
- Rolland Haiscourt, de la paroisse de Plouha, 20 ans (f° 301-304)
- Jean Regnier, meunier, de la paroisse de Méral, diocèse d'Angers (f° 305-307)
- Guillaume Le Boessec, diocèse de Dol (f° 307-309)
- Guillaume Belignet, 30 ans (f° 309-316)
- Jean, Bâtard de La Hunaudaye et Jean du Breil, paroisse de Plédéliac (f° 316-320)***

(f°1) 1486-1501 Les frères Tournemine accusés du meurtre de Jean Eder de Beaumanoir.

(f°2) [feuillet parchemin collé au dossier concernant une affaire impliquant Jean Pares et un certain Charles. Aucun rapport avec l'affaire du meurtre de Jean Eder Beaumanoir *a priori*. Il s'agit ici d'un large feuillet qui permet de rassembler matériellement l'ensemble des pièces des procès-verbaux du meurtre de 1486]

(f°3) Copie des enquestes proceix aiournements defailles et ossi lez faiz servant allencontre desditz sieurs de La Hunaudaie et aultres declerez par icelx touchant le meurtre et omicide commis a feu Jehan Eder sieur de Beaumanoir ~~ez~~ devers la Roynne nostre souveraine dame contenu de ses lettres et mandement enoncez a la court de Rennes celle a present baillee close et scelee soubz le sceau des contraz de ladite court le vingt de novembre lan mil cinq cens ung an.

A. LE BAVRILLEZ

18 décembre 1486 : Instance du procureur du fils de Jean Eder, portant le même nom, au lieutenant de Nantes (f°4-7).

(f°4) A l'instance de Jacques de La Baye au nom et commis procureur de Jehan Eder seigneur de Beaumanoir ont esté en ce jour devant nous sergens le lieutenant de Nantes commis du duc quant affin de proceder et faire enquete du cas de meurtre commis et perpetué en la personne de deffunt Jehan Eder seigneur en son vivant dudit lieu de Beaumanoir, Franzois Tournemyne, Georges Tournemyne, Jehan Tournemyne, Guillaume bastart de la Hunaudaye, Jacques Vendel, Thomas Le Bourdaz, ung nomme Mahé valet de chambre dudit Franzois Tournemyne, Guillaume Boterel dit Noguét, Vincent tailleur dudit François Tournemyne, Guillaume Desnoes, ung nommé Le Pruel, ung nommé Villion, ung nommé Le Petit Allain, Guillaume Velignet, François Bourdon, François de La damiere, Robert tailleur dudit Georges Tournemyne, Pierre le Barbier, ung nommé Philippon Guyon Rohan, ung nommé Cyrot et son frère, ung nommé Bertlelemer, ung nommé Challans, ung nommé Boudet serviteur dudit bastart Jehan Rouxel (f°5) Jehan de Saint Lo, Pierres de la Chaussee, Pierres le Maistre, ung [...] serviteur dudit François Tournemyne, Pierres de Vangeau, ung nommé le Bourguignon, Allain le Breton, Jacquet valet des chiens dudit François Tournemyne, Morin Valet dudit Velignet, Jehan de Treal, Petit Jehan serviteur dudit de Treal, Guillaume de Treal, Belouy poursuyvant, François Lucas, Olivier de la Brosse, Jehan de la Brosse, Marie de Villiers, Louyse de la Villethebault, Michelle femme Jehan du Breill, Petit Jean Chaussee, Jehanne Demarieuc, Jehan de la Moussaye, Guillaume Grehault, Pierres Fevron, Allain Berthemeler, Pierre de la Mare, Ollivier Josses, Olivier Le Gaigneur, Jehan Le Gaigneur et chacun auditioneez et appelez en lauditoire de la ville de Moncontour apres leur de mydy passee et enlendroit duquel appel se sont conguz lesditz de La Moussaye, Le Bourdaz, Grehault, Ferron, Berthelemer, de la Mare, Josses lesditz Gaigneur et chacun queulx et chacun ont jurer dire verite en la matire dont ilz seront enquis / Et aussi sest comparu maistre Clemens (f° 6) coespellez lequel dit que les nommez cy apres estoient aller devers le duc en Nantes : savoir ledit François Tournemune, seigneur de La Hunaudaye acompaigné de ses gens entre lesqueulx estoient ledit Georges Tournemyne, Jehan Tournemyne, Guillaume Bastart de La Hunaudaye, Jacques Vendel, Mahé valet dudit sieur, Vincent tailleur, Guillaume Des Noes, ledit nomme Le Rouel, ledit nomme Villon, le petit Allain, François de la [...], Robert tailleur, Pierres le barbier, ledit Philippon,

Guyon Rohon, Cyrot et son frere, ledit nomm  Challans ledit nomm  Boudet et ledit Jehan de Treal et quilz devoit estre excuser obstant leur absence de celles parties et que le commandement navoit est  fait a ceste personne de laquelle prinse a est  commande baillez relacion / Et neantmoins ce ont est  lesditz appelez sauff ceulz qui ont jurer comme dit est jugez deffaillans / Et a est  trouv  que lesditz nommez avoient aiournement a huy par relacion de Pierres Beliff sergent general et darmes du duc nostre souverain seigneur et fait savoir a ban au bout du pont de La Rochederien au lieu acoustum  a faire les bannes et par atache au lieu et en (f  7) la maniere acoustum  / Et a linstance dudit de La Baye a est  ledit aiournement et assignacion a huy pends coutume jucques a demain et mercredi a comparoir en la ville de Lamballe / Et ce fut fait ole lundy dix ouictieme jour de decembre lan mill IIII^{cs} IIII^{xx} et seix ainsi sign  Da. Miffeut pass .

28 d cembre 1486 :  tat des auditions par le sergent g n ral et d'armes du duc (f  7-8).

Et dempui en la ville de Quintin devant monseigneur le lieutenant avecques dessus a linstance dudit Eder ont est  audicionez et appelez Henry Le Chazon, Herve Le Chazon, Guillaume le p re, Jehan Quer , Vincent le Merd, Jehan de Lezervaut, Vincent Saulnier, Jehan Chastel, Rolland Herscouet, Pierres [...], Pierres Sillart, Jehan Le Pralan, Quillaume le Bozer et chacun en lendroit duquel appel se sont comparuz lesditz Sillart, Le Pralan et Le Bozer qui on jurer dire verit  de la (f 8) matiere dont ilz seront enquis et audit ledit Le Boyer que lesditz Henry et Herve Le Chazon, [...] et Le Quer  lui avoient charge leur exouice de maladie / laquelle a est  receue par serment que celui Le Boyer a fait/ Et icelle a est  fait jugez apporter tesmoignaigne en ladite matiere adevant en ouict jours / Et en cas de deffault adevenant en quinze jours en la ville de Nantes / Et les aultres davant nommez ont est  jugez defaillies et a est  trouv  que lesditz nommez auront communement a huy par relacion de Pierres Beliff sergent general et darmes du duc nostre souverain seigneur fait savoir a ban au bout du pont de La Roche Derrien au lieu acoustum  a faire les bannes / Et par atache au lieu et en la maniere / Ce fut fait le jeudy XXVIII^{eme} jour de decembre lan mill IIII^{cs} IIII^{xx} et seix ainsi sign  Da. Miffeut pass .

8 janvier 1487 : Appel des t moins au Bouffay   Nantes (f  9-10)

(f 9) Le uictie^{me} jour de janvier audit an mill IIII^{cs} IIII^{xx} et seix au Bouffay de la ville de Nantes leure de medy passee a linstance dudit Eder ont est  Henry Le Chazon, Herve Le Chazon, Guillaume Le Sur, Jehan Le Quer , Vincent Le Merd, Pierres de Lezernaut, Vincent Saulnier, Jehan Chastel, Rolland Herscouet, Pierres de Quiriles et chacun audvencez appelez / Et pour ce que ilz ne se sont comparuz ne aultres pour eulx ont este jugez deffaillans / Et dempui savoir le quinziesme jour dudit moys de janvier audit an mil IIII^{cs} IIII^{xx} et seix ont est  audit lieu du Bouffay de la ville de Nantes leure de medy diceluy jour passee lesdit davant nommez [...] audieucez et appelez / Et pour ce quil ne se sont comparuz ne aultres pour eulx ont est  jugez deffaillans contre ledit Eder / Et a este trouve que lesditz nommez avoient aiournement a huy tant par la mantiere de ladite exouice devant dit que par relacion de Pierres Beliff sergent general et darmes du duc nostre souverain seigneur fait scavoir a ban au bout du pont de La Roche Derrien au lieu acoustum  a faire les bannes / Et par atache (f  10) au lieu et en la maniere acoustume / Ce fut fait davant mondit seigneur le lieutenant commis que dessus les jour et an devant / Ainsy sign  Da. Miffeut pass .

8 février 1487 : Comparution à la cour de Rennes (f° 10-14)

Sergens generaulx et particuliers du duc mon souverain seigneur et chacun sur ce requis acourez doffice par ban et aultrement deuement a comparoir en personne et sur cas darest a ouict jour apres le fait savoir de ce presant aiournement en laudition de la court de Rennes par devant celuy de Messieurs les juges de ladite court de Rennes qui tiendra et occupera le siege commis de mondit souverain seigneur et son Conseil pour decider et congnoistre de la matiere du meurdre et homicide nagueres fait perpetué et commis en la personne (f° 11) de feu noble escuier Jehan Eder en son vivant seigneur de Beaumanoir aux fins du mandement de ce [emane] en date du vignt cinquiesme de janvier deroin signee par le duc en son Conseil on fait aupray et salle du sceau de la Chancellerie savoir esté Georges Tournemyne et Jehan Tournemyne freres jouveignier de noble et puissant Franczois Tournemyne seigneur de La Hunaudaye et aussi vulgairement appellé Jehan du Breill de la parouasse de Pledelia et chacun deulx sur le cas de avoir au moys de novembre dernier et que que soit pui lan lesditz dessus nommez et chacun par faulte orible et deloyalle [-acion] delibere et machinacion danable et [...] appens meurdri et occys ledit feu Jehan Eder en la forest de La Hunaudaye de La Hunaudaye den avoir esté eulx et chacun agens conscentans et [...] fautes et consenteurs les ungs des aultres complices et adhez sen estre iceulx et chacun vantez et glorrifiez ledit et [...] en plusieurs et divers lieulx et le avoir congneu (f° 12) quelx touz et checun sont notoires ou pays et en la partie en regne voix publique et commun renon [...] que le procureur de la court commis et delegué de mondit seigneur pour la poursuite et conduite dicelle matiere vers iceulx et chacun entendant faire quilz ont fait tort et que en doyvent estre pugniz comme [-aires] et omicides selon droit et au desur de la coustume du pays et son tout ce a droit respondre audit procureur es [...] que dessus ou a telles aultres sur et conclusions que vers iceulx et chacun voira choaisir et estre / Lequel aiournement a esté par monseigneur le seneschal de ladite court comme que dessus decreté apres avoir deliberement et meuneent visite les enquestes et informacions faictes en la matiere et sur ce prins avis et deliberacion ou et messeigneurs les aultres juges et officiers dicelle court / Et pour tant que par lesdites informacions en ladite matiere faictes lesditz Petit Jehan Bastart et Jehan du Breill sont et ont esté trouve dudit cas chargez (f° 13) il est mandé et donne pouvoir et commission ausditz sergens hommes feaulx et subjetz de mondit seigneur et chacun iceulx Bastart et du Breil prandre des corps quelque que les puissent apprehender et les rendre et constituez prisonniers es prinsons de Rennes sans nulle reocrance. Et si en aucune fuyte iceulx malfaicteurs se tournent aux dessus et chacun est mandé et expressement commandé les poursuivre et sur eulx faire le [...] et cy et tellement les suyvre que puissent estre prins sur paine den estre pugniz ceulx qui en seroient reffusans ou deloyans comme fellons rebelles et desobeissans a mondit seigneur et a sa justice. Et y proceder [...] armer si besoign est / Et tellement que la justice en puisse estre faicte et executer de faire tout ce que dit est / Aux dessus dit et chacun est donne tout pouvoir et especial commandement / Item notiffiez et faictes savoir audit seigneur de La Hunaudaye et a touz aultres en general et a ban que touz les fraitz levees et reutenues des fiez rentes terres et heritaiges (f° 14) desditz Georges et Jehan freres dudit sieur et que leur peuvent ou pouoient appartenir par raison de leur droit sous arrestz et les arrestez defait a instance et consignacion des droitz dudit procureur. Et assignez terme a y proceder au temps et terme dessus dit fait par la court de Rennes le ouictieme jour de febvrier lan mil quatre centz quatre vignts seix pares passe ainsy signé Pares passé.

26 mars 1487 : Appel à comparaître des frères cadets Tournemine (f° 14-16)

A de ce que le procureur de ceste court commis dudit mon souverain seigneur et son Conseil pour pourvoir et ordonner le fait et matiere du cas du meudre et homicide nagueres commis et perpetué en la personne de feu Jehan Eder escuyer en son temps sieur de Beaumanoir fust [aroger] et appelez Georges et Jehan Tournemyne freres jouveigneurs du sieur de La Hunaudaye sur laiournement qui leur avoit ad ce jour fait donnez et que vers eulx (f° 15) et chacun entendoit dire apposez que ilz avoit par conspiration dampnable et machination comme deliberé estre en compaignie complices et adhez fausteurs et [souscripteurs] et mettre a mort de guet apans en orible et detestable maniere ledit feu Jehan Eder le fait et fait faire / le congneu et sen ventez et que le fait estoit vroy notoire et manifeste a conclusion den estre pugnuiz comme sicaires et homicides selon le cas / Est compru en lendroit Artur Tenguy dist que laiournement donne en ladite madiete esdit Georges et Jehan lui avoit esté fait, scavoir il estant au lieu et chasteau de La Hunaudaye ou il est demourant serviteur / Et que puis iceluy faire scavoir daiournement il ne les avoit veuz / Et ainsi la jure / veu si relacion fut et a esté ledit aiournement avenant jucques [...] en quatre sepmaines qest le lundy prochain apres ou au prouchain jour [...] que apres si ledit jour estoit [ferie] et trouvant autre aiournement que celuy fait scavoir audit Tenguy furent jugez deffaillans lesditz Georges et Jehan (f° 16) et fut trouvé record de laiournement par Gurant Stephan sergant de ceste court, quel a relaté quil avoit oultre laiournement surdit aiourné par ban lesditz Georges et Jehan au jour / et fait ledit aiournement a lissue de la messe parestiale de Pledelia a jour du dimenche au lieu acoustumé a fere les bannes audit bourgc, le peuple y assemblé / fait par la court de Rennes davant monseigneur le lieutenant dicelle cours de mondit souverain seigneur et son Conseil le vingt six esme jour de mars lan mill IIII^{cs} IIII^{xx} six et [...] general et particuliers de mondit seigneur est mande fere touz aiournement sur lesditz Georges et Jehan dont seroient requis comme dessus, ainsy signé Pares passé.

20 novembre 1490 : Appel à comparaître des frères cadets Tournemine et Jean du Breil (f° 17-25)

(f° 17) Au jour duy apres leure de medy a ce que le procureur de la court de ceans precedant de son office a fait evoquer et appelez Georges Tournemyne, Jehan Tournemyne freres jouveigneurs dudit sieur de La Hunaudaye Jehan du Breill et chacun deulx demandant que sur leurs non [...] que ilz et chacun fussent soient jugez deffaillans contre et instance dudit procureur intimement sur et ad ce que ledit procureur entendoit vers ceulx et chacun se printz estoit dire et proposez et sur leur non comparoissance a dit appose defait que en lan mill quatre centz quatre vint et six et que soit puix dis ans deroins ledit sieur de La Hunaudaye ~~georges~~ Georges et Jehan Tournemyne freres jouveigneurs dudit sieur feu Petit Jehan Bastart de La Hunaudaye, Jehan du Breill et chacun et lun deulx queulx Georges et Jehan Tournemyne estoit commenseaulx dudit sieur et avec luy la pluspart du temps demorens et residans / Et lesditz Petit Jehan Bastart et Jehan du Breill serviteurs domesticques et commenseaux dudit sieur chacun et lun deulx avoient conseu hayne et inimitie avecques (f° 18) defunct Jehan Eder en son vivant sieur de Beaumanoir / a ocasion du mariaige quel avoit esté fait dudit feu Jehan Eder avecques dame Marie de Villiers dame du Hommet et de La Beraudière mere dudit sieur de La Hunaudaye / Et desditz Georges et Jehan Tournemyne avoient dit et se vanté en plusieurs lieux quilz feroient mourir ledit Jehan Eder quoy quil leu enu deust avenir, disans que a luy ne appartenoit pas estre marié aecques icelle dame qui estoit plus puissante et de plus grande extraction que nestoit ledit Eder / Et que [...] lesditz Georges / Et que en continuant lesditz Georges et Jehan Tournemyne, Petit Jehan Bastart et Jehan du Breill eussent haynes desirans

icelles mectre a execucion par les moyens et aides de leurs adhez en celle matiere avoient moien de faire allez querir lesditz Jehan Eder et dame Marie de Villiers sa compaignie qui lors estoit demourans ou pays danjou au lieu de La Beraudiere / Et les mener demourez a La Hunaudaye pour mieulx et plus a leur aise mectre leur vouloir conspiracion et entreprinse (f° 19) dampnable a execucion / Et apres avoir este lesditz Jehan Eder et sadite compaignie aucune espace de temps demourans audit lieu de La Hunaudaye fut en la maison dudit sieur de La Hunaudaye assigné jour pour aller a la chasse en la forest dudit lieu pour en icelle meurdrer et mectre a mort ledit Jehan Eder ainsi quest vroy semblable apresumer et commectre par ce que apres sen suyvit et le jour precedant que fut ledit meurdre commis en la personne dudit Jehan Eder et par avant sur ce que iceulx Bastart et du Breill parlans de ladite chase ou ilz devoient aller en ladite forest dist celuy Bastart audit du Breil et que gne soit disirent lun a lautre par telles parolles ou semblables : « Mon compaignon, ne me aidras tu pas a tuer le grant sanglier ? » a quoy respondirent que seut ayderont et que il demouret ad que jour assigné pour aller a ladite chase qui fut au moys de novembre ou an mill quatre centz quatre vigntz et seix / Et que questoit puix dix ans daroins ledit sieur de La Hunaudaye (f° 20) Georges et Jehan Tournemyne ses freres ledit Jehan Eder iceulx Bastart et du Breill et aultres plusieurs serviteurs oudit sieur partirent assemblement dudit lieu de La Hunaudaye, disans aller en la forest faignans y devoir chacer et en icelle forest assemblement entrerent garniz de dagues espees espieutz et aultres ferremens / Et eulx estans en icelle forest traitieusement par conspiracion deliberer de guet apans lesditz Bastart et Jehan du Breill en la presence desditz Georges et Jehan Tournemyne ne qui leur y donnerent faveur et couraige [...] assaillirent ledit Jehan Eder et par eulx et chacun de leursditz espieu et ferremens lui fraperent plusieurs coups et collees despieu au travers du corps, tellement quil cheut oultre de sur ung cheval quil chevauchoit et par les dessudit et chacun agens complices et adhez fauteurs et [souscripteurs] les ungs des aultres les furent faictes plus de dix playes mortelles, fut tellement blessé et narreéque a ocasion (f° 21) de ce la mort incontinant sensuit en la personne diceluy Eder, et sans confession neantmoins que plusieurs foiz il demandast et plegneust estre confessé / et que quesoit avoit esté ledit Jehan Eder occis et mis a mort par lesditz Bastart et du Breil assez pres des lieux ou estoient lesditz Georges et Jehan Tournemune tellement que pouvaient bien veoirs faire ledit meurdre et ouyr bien que fist ledit Eder et le bruit qui fut esté faisant en comectant lequel cas si aborrant et detestable fut arrivé en icelle forest par les serviteurs dudit sieur estans avecques lui et les malfaiteurs dessus nommez en la faczon que lon a acostumé [...] quant une beste est prise et que dempuix ne et apres ledit cas ainsi perpetué sestoient lesditz Georges et Jehan Tournemyne Petit Jehan Bastart de La Hunaudaye Jehan du Breil chacun et lun deulx renduz futifs et desfaiz et chacun dessus dit estre vroeie notoires et manifestes en regne (f° 22) voix publicque et commun renom ou pays et en la partie en out estre lesditz malfaiteurs et chacun diceulx confessans ont este et son a ladite cause notoirement deffait et est notoire dont ledit procureur entend querir respons vers eulx et chacun et en leur absence que pas concluant et entendant conclure lesditz faitz par lun alleguez congneuz ou trouvez que lesditz Georges et Jehan Tournemyne Jehan du Breill et chacun deulx avoient fait tort et que dudit cas ilz et checun deulx fussent et soient pugniz comme sicaires et homicides audesur selon que par la coustume de ce pays et duche estoit et esté permis protestant de augmenter corrier impreter ou extraire a sesditz [...] conclusion du tout ou en partie les reformez [...] disant que au temps du faire scavoir dudit commendement que le dit Georges et Jehan Tournemyne Jehan du Breill et checun diceulx qui fut le dix ouictiemes jour dapvrill (f° 23) darroin, il estoit serviteur dudit sieur de La Hunaudaye et demourant au chasteau dudit lieu de La Hunaudaye / et que a lun avoit esté fait scavoir laiournement sur lesditz Georges et Jehan Tournemine Jehan du Breil et chacun deulx et ajure par son serment que dempuis il navoit veu lesditz Georges et Jehan Tournemine,

Jehan du Breil ne lun deulx leur intimé ne fait scavoit le dit aiournement pour quoy a este iceluy aiournement fait scavoit audit [...] de lundy prochain en quatre sepmaines Et trouvant a leur aiournement fait scavoit sur les dessusditz malfaicteurs et chacun ont este iceulx et chacun jugez et deputez [...] deffailans [...] a instance dudit procureur intimement sur les cas demandez et conclusion surdit / Et a esté trouvé ceulx Georges et Jehan Tournemine Jehan du Breill et chacun avoient aiournement intimement en ce que dist est (f° 24) outre que celuy dessus avenante par Louys Guemar lun des sergents de la duchesse nostre souveraine dame commis quand ad ce ledit aiournement fait scavoit par ban a lissue de la grant messe dominical de Pledelia dont ilz et chacun deulx estoient paroissiens du temps et de par avant ledit meudre par eux commis / Et aussi que dudit aiournement a esté aparé par relacion dudit Louys Guemar daté dudit dixouictiemes jour dapvril darroin, signee de son signe, desquelx signe relacion et commission a esté [...] sur laquelle deffaille veu les enquestes faictes en la matiere / Et commande prandre des corps lesditz Georges et Jehan Tournemine, Jehan du Breill et chacun qui trouver les pourra hors lieux saintz et sans recreance les constituez et rendre prisonniers es prisons (f° 25) de la court de ceans / Et se il y a restauré et proceder [...] en maniere que la justice en demeure la plus forte et est commandé a touz et chacun les subjectz de nostre souverain dame estre et [...] tellement que lun puissent estre aprehender pour faire laquelle prinse ont esté et soit commis touz et checuns les sergens, gens des ordonnances et aultres subjectz de notre souveraine dame / Aux quels et checun est expressement commandé ainsi le faire sur paine den estre pugniz comme rebelles et desobeissans / fait aux generaux plez de Rennes durant les offices generalles le sabmadi vigntiesme jour de novembre lan mil IIII^{cs} IIII^{xx} dix ainsi signé Pares passé constat de [...] approuve.

20 décembre 1490 : Appel à comparaître des frères cadets Tournemine (f° 26-35)

(f° 26) Par la court de Rennes le vigntiesme jour de decembre lan mil quatre cents quatre vingtz diz ad ce que maistre Guillaume Le Bigot lieutenant du procureur de ceste court faisoit requier et appelez Jehan Tournemyne et Georges Tournemyne escuiers freres jouverigneurs du sire de La Hunaudaye / Et comparu Guillaume Le Deans commis general procueur ainsi quil a paru desditz Jehan et Georges, receu seullement essur cy apres declarez scavoit pour allecger la [...] deulx vers lequel a esté dudit procureur dit et propose que en lan mil quatre centz quatre vint seix et que que soit puis dix ans daroins lesditz Georges et Jehan Tournemine chacun et lun deulx avoient consceu hayne et inimitié avec deffunct Jehan Eder en son vivant seigneur de Beaumanoir a occasion du maririaige quel avoit esté fait dudit Eder avec dame Marie (f° 27) de Villiers dame du Hommet et de La Beraudiere mere desditz Georges et Jehan Tournemine avoient dit et se vanté en plusieurs lieux quilz feroient mourir ledit Eder quoy quil leur en deust advenir disant que a lun ne appartenoit pas estre marié avecques icelle dame qui estoit plus puissante et de plus grande extraction que nestoit ledit Eder / Et que en continuans lesditz Georges et Jehan Tournemyne leurditz haynes desirans icelle mettre a execution par les moiens et aydes de leurs adhez en icelle matiere avoient trouvé moien de faire aller querir lesditz Jehan Eder et dame Marie de Villiers sa compaigne qui lors estoient demourans ou pays danjou au lieu de La Beraudiere et les mener demourer a La Hunaudaye pour mieux et plus a leur aise mettre leur voilloit et entreprinse dampnable (f° 28) a execution / Et apres avoir esté lesditz Jehan Eder et sadite compaigne aucune espace de temps demourans audit lieu de La Hunaudaye fut au chasteau du sire oudit lieu assigné jour pour aller a la chace en la forest dudit leur prins en icelle meudre et mettre a mort ledit Jehan Eder / Ainsi quest vraissemblable apresumer [...] par ce que apres sen suyvit auquel jour assigné pour aller a ladite chace qui fut

ou moys de novembre oudit an mil quatre centz quatre vigntz seix et qui soit puis diz ans [...] le sire dudit lieu de La Hunaudaye lesditz Georges et Jehan Tournemyne ses freres ledit Jehan Eder feu Petit Jehan Bastart de La Hunaudaye Jehan du Breill et aultres plusieurs serviteurs dudit sire partirent assemblement dudit lieu de La Hunaudaye disans aller en ladite forrest faignans de devoir chacer et en icelle forest (f° 29) assemblement entrerent garniz de dagues, espees espieutz et aultres ferremens et eulx estans en icelle forest traiteusement par conspiracion deliberé de guet apans lesditz Bastart et Jehan du Breill en la presance desditz Georges et Jehan Tournemyne qui leur donnerent faveur et couraige [...] assaillirent ledit Jehan Eder / Et par ceulx et chacun de leurs espieutz et ferremens le fraperent plusieurs coups et collees destoc au travers du corps tellement quil cheut a terre de sur ung cheval quil chevauchoit / Et par lesditz dessus dit et chacun agens complices et adhez sousteneurs les ungs des aultres luy furent faictes plus de dix playes mortelles, fut tellement marre que a occasion de ce lavoit incontinant sen suyvant en la personne diceluy Eder et sans confession, neantmoins que plusieurs (f° 30) foyz il demandast et requeust estre confessé et que questoit este ledit Jehan Eder occys et mis a mort par lesditz Bastart et du Breill assez pres des lieux ou estoient lesditz Jehan et Georges Tournemyne, tellement quilz pourroit bien le voir faire ledit meurdre et ouyt le cry que fist le dit Eder et le bruit qui fit en ce faisant en commectant lequel cas si aborrant et detestable [...] en icelle forest par les serviteurs dudit sire estans avecques luy et les malfaicteurs dessus nommez en la faiczon que lon acostume aruer quant une beste sauvaige est prinse / Et que dempuis ce et apres ledit cas ainsi perpetué se soient lesditz Georges et Jehan Tournemyne renduz fugtifs / Et les faiz et chacun dessus dit estre vroyz notoires et manifestes en regne voix publiques et commun renon au pays et en la partie en ont este lesditz Georges (f° 31) et Jehan Tournemyne et chacun confessans ont est et sont a ladicte cause notoirement diffamez / et est notoire dont ledit procureur queroit respons a prouver a suffire concluant lesditz faitz par lui allegez congneuz ou trouvez que lesditz Georges et Jehan Tournemyne et chacun avoient fait tort / Et que dudit cas ilz et chacun deulx fussent et soient pugniz comme sicaire et homicide au desur et selon que par la coustume de ce pays et duché estoit et est permis protestant de augmenter corriger interpreter ou extaire a sesditz libelle et [...] du tout ou en partie les refformer et de nous se abtandre a promue sur lequel Le Dean oudit nom parlant par maistre Allain Berart son advocat a protesté de impariace et inadmissilite desditz faitz en lieu et en temps que mestre sera et dedice que lacion est personnelle et quilz ne sont par ceans [-ibles] et aultres deffenses (f° 32) et saluacions ledit procureur protestant du contraire et omet ne doit entre parties a este referer faire raison, iceluy Le Dean es noms que il precede a dit accepter la charge de la procuracion et se fonder procureur pour lesditz Jehan, Georges esfuis declinatoires selon quest coutenu par icelle procuracion seullement et que la comparucion quil feust et ce quil entendoit dire et remonstrez incontement nest point pour accepter et proroger la court et juridiction de ceans mais entendoit dire que lesditz Georges et Jehan Tournemyne ny sont aucunement subgiectz et que les proces que y feront sont et doyvent estre ditz nulz / dont ledit procureur a dit ne [grer] que droit / et a este resur faire et raison entre parties lors que debat en adviendra / Et ce fait a dit ledit Le Dean es noms precedents que ledit Georges estoit et est demourant en la maison du Roy de France (f° 33) et lautre a La Beraudiere ou pays danjou et que ne ya ne avoit suraceix au temps de laiournement fait et comme en la matiere dempuis ne a present a venir dudit lieu en ceste ville de Rennes tant par les gens de guerre du party de France que de Bretaigne feillars [feuillard, brigand de grand chemin] et bretons qui sont sur les champs qui de jour en autre et sont souvent sont prises de gens et reveres sauff a declarer et bailler par articles / Et son lesfaiz dessus dit vroy et notoires en este voix publique et commun renon / Et en a este ledit procureur confessant, lequel procureur a preste de impartinance et de touz ses deffaifes et

saluacions ledit Le Dean esdit noms protestant du contiacion / Et o ce a este devyeur dudit nom suraceix, ains apposé que y avoit a present paix banne et publice entre ledit Roy et la Royne et duchesse ma souveraine (**f° 34**) dame leurs pays et subgetz / et que plusieurs vont et viennent de lun des pays en lautre seurement / Et que ya en a esdit temps et chacun et a present suraceix de pouvoir venir en ceste dite ville dudit pays de France et quil estoit notoire. De quoy ledit Le Dean esdit noms a este devyeur et en a este a chacun deulx la prouvé jugé et fut dit que de chacune part ilz pourront baillez articles [...] de leurs preuves / Si bon leur semble / et a esté audit Le Dean esdit noms fait intencion de chaser et faire ses preuves dedans la prouchain tenue / Et a ce lui Le Dean esdit nomz en la matiere de ladite exception choisir de maison pour lesditz Jehan et Georges au lieu de La Hersardaye¹ / Et a esté dit que les aiournements que y seront faitz aux gens y estans seront vallables et pour proceder en leur dite cause au [par-] comme (**f° 35**) il appartient leur a esté tenue assigné adroy en ung moys et y a esté ledit Le Dean esdit nomz aiourné selon proces esplez et de droit pour respondre audit procureur / quel Le Dean esdit nom a dit que lassignacion estoit bien briefve / Et a protester den excepter et a requeste dudit procureur ont esté lesditz Jehan et Georges par leurdit procureur aiourner audit jour a comparoir en personnes et par arrest intimement en la demande du cas et causes dessus contenu pour suivre a droit respondre audit procureur donne cour dessus, ainsi signé Pares.

15 décembre 1492 : Appel à comparaître des frères cadets Tournemine (**f° 36-38**)

(**f° 36**) A Lappeau dire aujourd'huy feisoit faire le procureur de ceste court procedant de son office / Et que deffait a son instance a este fait de Jehan Tournemyne, Georges Tourneyne et de chacun / Est comparu Rolland de Brehant qui deulx a dit estre procureur et pour eulx voulloir comparaitre et les deffendre es aiournements pendans au jour sur eulx a instance dudit procureur / Et a celle fin a a present procuracion desditz Jehan et Georges Tournemyne datee du dixouictiesme jour de novembre derroin passé par la court de La Hunaudaye par Pierres de La Mare² et B. de Carmello et a dit estre a receveoir pour eulx occuper et les deffendre dudit procureur a esté dit et offert que en ce questoit laiournement pendant en certains clens de [La-] diceulx Jehan et Georges Tournemyne voullait et consentir quil y fust receu / Et en ce questoit es aultres aiournement questoit en demande quilz et chacun avoint en faulte et dampuable manière meurdry et mis a mort deffunct Jehan Eder en la forest de La Hunaudaye dont sur les enquestes et informacions a este par cy davant le proceix de crete ne le y voullait receu- ne devoir estre dit dudit de Brehant a este renconstre que en ce jour voullait et entendoit dire et remonstrez que iceulx Jehan et Georges Tournemyne estoient residans et demourans au pays danjou et que les aiournement qui en (**f° 37**) ladite demande avoint esté donnez ne leur avoit esté donnez, savoir ne a leurs domicilles ayns ailleurs que a leurs domicilles avoint este faitz / par quoy a respondre [en-] diceulx aiournemens ne ceans comparoir ilz nestoint tenuz / Et a dit lesfaitz de luy allegez quil a dit estre vroyz et en demande respons que ilz ne lun deulx nestoint tenu comparoir / que este matiere ne lesditz Jehan et Georges Tournemyne evorquez et appelez pour ce que ne ont comparu jugez ont esté deffaillans / quel et a instance dudit procureur / de quoy ledit de Brehant a dit en appeler et en a appelé deffaict ou il ne a este receu / dont encore a appelé o recerance / Et a esté respondu dudit aiournement par proceix et acte de ceste court passe par Allain de Bariller notaire sur laquelle deffaille et respondre trouvé auditz sergens et chacun de ceste dicte court este mandé donne pouvoir et commission de prandre et aprehander des corps royamment et deffait lesditz Jehan et Georges

¹ Proche de Tréguemar dans les Côtes-d'Armor, un manoir s'y trouvait alors.

² Procureur de la cour de La Hunaudaye.

Tournemyne et sans recevance les rendre et amenez prisonniers es prisons fermees de ceste dite court, si trouvez et aprehander (f° 38) peuvent estre hors lieu saint / Et ou deffault de les povair prandre et aprehander ausditz sergens et chacun est donné povaire de les ramenez par ceste dite court a brieff et computant prinse pour sur ledit cas respondre audit procureur et aultrement a droit fait par la court de Rennes, le quinziesme jour de decembre lan mill quatre centa quatre vingtz douze, ainsy signé J. de Barriler passé.

14 janvier 1492 : Appel à comparaître des frères cadets Tournemine (f° 38-42)

A Lappeau que feisoit faire le procureur de ceste court procedant de son office de nobles et puissans Jehan Tournemyne et Georges Tournemyne sur le cas davoire meurdri et mis a mort noble et puissant Jehan Eder / est comparu entendu Rolland de Brehant procureur general que a a pres par lettres desditz Jehan et Goerges Tourneyne datees le vingtiesme jour de novembre deroin quil a dit quil avoit a charge desditz nommez de comparoir ceans pour declarer de monsseigneur de le seneschal de ceste court / Et aussi pourra remonstrer la nullité des esplectz faitz (f° 39) par ceans entre ledit procureur et aucuns procedans desditz Jehan et Georges Tournelyne et navoit aultre charge / Et a dit estre a recevoir a comper pour eulx / Et dudit procureur a esté dit et offert en ce questoit laiournement peult en estans clens criez declaracion de lavoire et diceulx Jehan et Goerges Tournemyne touchant non sur asseix allegué de leur part / sellon leurs proceix voulloir consentir quil y fust receu a procureur. Et en ce quest la matiere en principal dudit meurdre commis perpetué en la personne de Jehan Eder dont sur les enquestes et informacions a esté par cy davant le proceix decreté de ne voulloir aucunement recevoir ledit de Brehant a comper pour eulx / Duquel de Brehant audit nom a esté dit et remonstré contre ledit procureur que lesditz Jehan Tournemyne et Georges Tournemyne sont originaires du pays danjou en la juridiction de Craon et y demourans au temps de laiournement / lan de paravant segond tiesme quart [...] dix quinze et environ a present et y font subgetz de leur personnel / Quelle court et barre de Craon nest aucunement subgete de ceans et est hors ceste principaulte de Bretagne et ne sont aiournez a leur domicile a leurs personne ne a leur procureur sond en cause / Et de ce que dessus a demandé respons (f° 40) pour quoy a dit le dit de Brehant esque noms ses faitz congneuz [...] quel estoit recevable a comper pour lesditz Jehan et Georges Tournemyne quant affin de mettre et alleguez la dite exception / duquel procureur a esté dit du contraire sauff a venir en personne desfendre ladite matiere et [...] sadite excepcion que maintient tout ce ou deffault de comparoir en personne devoit deffaillyr / Et sur ce apres ont esté faitz enrequez par monditi seigneur le seneschal reprenant les causes de cettes court ont esté lesditz Jehan et Georges considere le cas en soy les enquestes et decretz faitz procureur / de quoy le dit de Brehant a apellé et ce a esté receu audit apparau fors que par le juge ad quen il y sera receu / Et en procedant oultre a ledit procureur demandé vers ledit de Brehant esditz noms estre [...] lequel de Brehant esditz noms affin de non proceder a dit que lesditz Jehan Tournemyne et Georges Tournemyne estoit originaires dudit pays danjou et y demourans lan segond tiesme quart dudit quinze ans et plus et au temps desditz [...] aiournement non subgetz a ceste court de leur personnel / au temps par avant la [curacion] desditz et chacun ung procureur deulx par etre (f° 41) se avanca a contester plect par ceans en la matiere desditz [clients] esperant que le juge de ceans feust juge capables sur leur personnel ce que a fait reverance et estoit en riens o loffice de ce domaigez se de la court est dit que faire le doye a congneuz ou trouvez ses faitz dont il a demandé respons que a proceder esditz clens il nestoit tenu / duquel procureur a esté dit que les faitz alleguez dudit du Brehant esditz noms nestoint vallables ne recepvables en impeschant proceder esditz cliens / Et que a la correction dudit [exe-] il nest recevable de

la fourme veu meisme que ce nestoit le prochain terme et le laps du temps depuis lesditz clens qui estoit ? en son avoit sur quoy parties a que d droit par mondit sieur le seneschal juge a este et declacion que les faitcz ditz et alleguez dudit de Brehant esditz noms et estoit vallables ne suffisans impeschans proceder en la matiere esditz clens avec le dit procureur. Quel jugement et sentence le dit de Brehant esditz noms a dit appeler et de ffait a apellé pour quoy si par le dit Apprau nest deffand juge a esté deffaillant contre et ajustant dudit procureur / Et a resqueste dudit (f° 42) procureur ont esté lesditz Jehan et Georges Tournemyne aiourner procedans respondre audit procureur par ledit de Brehant leur procureur au lundy davant lan mil [...] sur comparoir en personne et par a esté sur le dit cas de meurdre et aultrement a droit fait aux genraulx plez de Rennes, le quatorziesme jour de janvier lan mill quatre cens quatre vingt doze, ainsy signé A. Le Barriller passé constat de instance ligue a fait prouchaine [appr-].

20 mars 1492 : Appel à comparaître des frères cadets Tournemine (f° 43-46)

(f° 43) Sur Lapprau qui aujourduy ceans a instance et requeste du procureur de ceste court procedant de son office / a esté fait de Georges Tournemyne sur la campacion et demande que par cy davant le dit procureur avoit fait voulloir et entendoit faire audit Georges Tournemyne que iceluy Tournemyne ses adhez et complices avoint en faulce et dampnable maniere meurtry et mis a mort Jehan Eder deffunct en son temps seigneur de Beaumanoir / Et en laquelle dist ledit procureur celuy Georges avoir aiournement a compoir en personne par a ceste demand en deffault de compoir quil fust juge deffaillant contre ledit procureur / en ladite matiere en clens noiez des aveuz dudit Georges aux fins de leurs proceix / est conparu Rolland de Brehant se disant procureur pour ledit Tournemyne et en a apres ung procuracion passé par la court de Chasteaubriand a Plauguenoual par Pierres de La Mare et que Desnoes et saellee desseaulx des contractz de ladite court icelle date le vingtiesme jour de novembre deroin remonstrant disant que [...] au deroin trouve deulx par vertu de ladite procuracion, il eust voullu ocuper pour (f° 44) ledit Georges comparer a la fin de declerez de ceste court et Messieurs les juges dicelle et remonstrez et alleguez que iceluy Tournemyne nestoit subget ne troictible placant de ceans et quil estoit natiff et originaire des parties danjou qui est hors de ceste juridicion ~~et hors~~ et soubz la juridicion de Craon et que par aultant que aucuns pour luy sestoint ceans parlez ses procureurs durant les guerres que ont eu cours en ce pays et duché et avoint ceans obey pour ledit Tournemyne avoint dit quilz avoint erre et lerreut en voulloir conger par les causes sudtites et aultres contenu audit deroin proceix date le quatorziesme jour de janvier deroin et sur leurs resons sensuyvant jugement dont il appelle en Parlement et que la dempuix fut relevez / Et que apres lexpédition entre eulx ensuye ledit procurueur fist donnez aiournement audit de Brehant procureur dudit Georges sellon que dessus que seullement avoit puissance de decliner destre tout comparez ladit erreur / et en plus large ne avoit ne na puissance pour ledit Georges et ne a ledit Geoprges aultre aiournement a huy pendant avecques ledit procureur dist et a dit ledit de Brehant procureur esdit fus dudit Georges que audit aiournement luy fait scavoir le pavoit deffendre (f° 45) duquel procureur a esté bien cogneu que iceluy Georges avoit aiournement a son instance a comparoir en personne par arest / ainsy que davant est. Dit sur ledit cas davoit meurdry et mis a mort ledit deffuns Jehan Eder et aussi en estant clens [...] en caucion dudit Georges contre ledit procureur sellon leurditz proceix / Et a dit que a recevoir ledit de Brehant a comper en ladite maniere dudit homicide veu leur aiournement et [...] et enquestes faites en la matiere et decret dudit proceix contre ledit Georges fait il nestoit tenu / Ayns que neantmoins il devoit estre juge deffaillant offrant bien le recevoir a deffendre le dit Georges es clens [...] notez si iceluy de Brehant veult le y deffendre, ledit de Brehant oudit nom disant veu consideré le contenu oudit proceix et

aiournement luy fait scavoit du contraire, ce que a dit et proposé quil estoit et est originaire du pays danjou soubz la juridiction de Craon et y demourast au temps dudit meurdre dit dudit procureur avoir esté oudit deffunct lan paravant segond tiers quart [...] daté quinze [...] a presant et dicelle juridiction de Craon subget de sa personne (f° 46) quelle juridiction court et bare de Craon nest aucunement subgete ceans / Et est hors la principaulté de ce pays et duché de Bretagne, pour quoy a dit ledit de Brehant oudit non sesditz faitz congneuz [...] dont il a demandé respons quil estoit recevable pour ledit Tournemyne a comper / et comparu ausdit allegances fere et en impeschant ladite deffaille celui procureur devoit estre tenu a sesditz faitz respondre / Et dudit procureur a esté dit veu que ledit de Brehant oudit nom ne veult deffendre la matiere en procureur general / et quel ne veult fors comparoir pour declerez a loffice que a faire ou cas que le vouldroit faire et se justifiez cy ladite matiere principale de la y recevoir que les faitz dudit de Brehant ne sont recevables / De quoy entreulx a este fait raison au prouchain trouve quel a este mis et assigné au lundy apres [...] prouchain / auquel jour a esté ledit de Brehant oudit non aiourne de droit et sellon es plez respondre audit procureur fait par la court de Rennes le vigniesme jour de mars lan mill quatre centz quatre ungs doze, ainsy signé A. Le Barriller passé constat de instance ligue celuy [...].

15 avril 1493 : Appel à comparaître des frères cadets Tournemine (f° 47-54)

(f° 47) Ad ce que maistre Guillaume le Bigot lieutenant du procureur de la court de ceans feisoit evocquez et appelez Georges Tournemyne seigneur et baron du Hommet disant quil avoit a son instance aiournement a comparoir en personne et par arest sur le cas de avoir esté autrefois et puix dix ans deroins en compaignie agent complice et adhere fauteur et sousteneur de meurdre et mettre a mort en faulte et dampnable maniere [...] deliberement faite feu Jehan Eder en son vivant sieur de Beaumenoir [...] quil avoit faite et entendoit vers luy faire quel en feust pugnyz comme sicaire et homicide/ Entendant comprit Rolland de Brehant commis procureur ainsy quil a pres parler dudit Georges Tournemyne de laquelle la teneur eussent / Saichent touz que par notre court de Chateaubriand a Planguenoual ont esté presens endroit personnellement establiz nobles et puissans Georges Tournemyne sires et baron du Hommet Jehan Tournemyne seigneur du Chalongc quelz et chacun en tant que mestier est se sont soumis et deffait se submetterent par leurs serviteurs avecques touz leurs biens a la jurdidiction servir et obbeissance de nostre court quant a tout ce qui eussent / Et ont (f° 48) tant aiournement que [-sement] ont fait justice et estably font ordonnent instituent et etablissent a leurs allouez et proches ole pouvoir exprieix qui eussuyt seullement / Et non aultrement maistres Rolland Gonton, Allain Berard, aussi Rolland de Brehant affin de se representez en lavoint et audictoire de Rennes exceptez et declerez de ladite court et des juges dicelle en toutes et chacune actions que le procureur dicelle leur a fait pouvoir faire tant rellees personelles nulles que nouvelles soit de leur auctorité et par [procuracion] de la Chancellerie de Bretagne dire et alleguez nen estre subgetz ne tenuz y querelle a ne procedez anczoires dire remonstrez et alleguez estre subgetz en aultre bare jurdicion et obeissance non subgete a lobeissance de ce pays et duché / Et pour aultant que aucuns procureurs pour eulx durant les guerres qui ont regné et en cours en ce pays et duche y avoint nont obey en corriger pour les causes precedantes et en soubz despans se monstrent / Et en ce faire toutes et chacune les choses que lesditz establiss feroient ou faire pourront silz estoient presans / promectans et ont promis en bonne foy et sur lobligation de (f° 49) touz leurs biens lavoir et quilz auront agreable tout ce que par [...] et chacun sera fait agicte procureur / Et tout ce que dessus ont prins et fait tenir par leurs sermens / Et y ont este condempnez sesur le scau estably avoir tractez de sudite court et parlemens cy mis a leurs requestes avoire fait mettre / fait et

congnoit le vingtiesme jour de novembre lan mill quatre centz quatre vingts doze ainsy signé G. Desnoes passé par de la main passé scellé du sceau dicelle court voullant ocupez pour ledit Georges et le deffendre audit aiournement aux fins contenues en ladite procuracion quest affin seulement de declerez de la court de ceans que ny estoit subget ne troictible ayns estoit originaire du pays danjou et y demouroit soubz la juridiction de Craon et [...] de ses procureurs par lesdites raisons et aultres contenues en ung proceix ensuy entre eulx le quatorziesme jour de janvier deroin quelx a proposez a ladite fin et dit y estre a recevoir ledit lieutenant (**f° 50**) du procureur ~~affin~~ remonstrant affin que nest recevable ledit Tournemyne a esté deffendu par procureur ayns que il dit deffaillir que ledit aiournement despendant a ce jour est a comparoir en personne et par arest sur le cas commis dessusdit en laquelle matiere et conclusion ont esté faites enquestes doffice par lesquelles le dit Georges est chargé dudit cas [...] Et a esté le proceix decreté vers luy par cy davant ou il a plusieurs foiz deffailly et la prinse de sa personne commande et tout ce [...] que ledit Georges doibt comparoir ou estre jugé deffaillant maintenant les choses remonstrances et proposees dudit de Brehant oudit nom sur quoy par monseigneur le senneschal de ceste court faisant par lexpedicion presente atandu la matiere de la cause [...] surdite et les coutumaces obstenues sur ledit Georges lesdites enquestes doffice faites en la matiere a esté ledit Tournemyne juge contumace et deffaillant vers ledit procureur sur et es aiournemens (**f° 51**) despendans [...] es precedantes deffaillies impectrees sur le dit Georges Tournemyne de quoy ledit de Brehant oudit nom a apellé de sa bouche a quoy ne a esté receu fors par aultant que par le juge ad Guen sera dit y estre recevable / Et a este trouvé et receu dudit aiournement en requeste le dit homicide par Olivier Audren sergens du Roy nostre sire signé de son signe duquel a esté informe a suffire / Ce fait du dit de Brehant ou nom precedant a esté demande estre procedé entre eulx en laiournement en ung jugement en reseracion ou debat et scavoir si le dit de Brehant ou nom surdit estoit recevables a comper et deffendre ledit Georges Tournemyne en la matiere surdite sellon quil est contenu a plan en ung proceix de ceste court daté le onziesme jour de mars deroin passe de A. Le Barillez / Et a celle fin pour servir a la decision diceluy seulement a produit ung acte duquel la teneur ensuivant : [*passage en latin*] (**f° 52**) [*passage en latin*] / Ainsy signe Jo. et scellé demandant estre faite information desditz signes et sceau. Et a supplie estre enquis messire Jehan Goignon et messire Michel broucan prestres que [...] estoit disant celuy de Brehant ou mon predict que sesditz tesmoigns sont a fuctures et estraigiers de ce pays et duché et a la fin de la [cong-] signé et seau les a faitz venir (**f° 53**) du pays de France queulz par aultre temps ne pouvoit recouvrez pour tant que que dirent voulloir veaiger es parties de Romme / Suppliant amondit seigneur le senneschal les en interosgez par leurs sermens / Et audit lieutenant du procureur a este dit considéré la contumace donnee sur ledit Tournemyne que le dit de Brehant nest recevable a comper ne estre procureur pour le dit Georges en ladite matiere veu requeste dessus exploicte / le dit de Brehant ou nom surdit disant considéré leffectif et teneur des proceix dentreulx et entre aultres du proceix daté le dit onziesme jour de mars par lequel appart ledit jugement sestre ensuy avecques luy procureur dudit Georges / Et y estre recevable ce que a esté reffusé et par mondit sieur le senneschal (**f° 54**) actendu mesme les plect dessusdit / Et non obstant tout ce le dit Georges juge deffaillant dont le dit de Brehant oudit nom qui appelle ou il ne a este receu sauff par aultant que par le juge a qui la congnoissance apartient dudit appel sera dit y estre a recevoir / Faict par la court de Rennes, le quinziesme jour dapvril an mill quatre centz quatre vigntz traize, ainsy signe passé constat de instance ligue ordre tout autant [...].

7 août 1493 : Appel de la cour de Rennes pour la comparution de Georges Tournemine (f° 55-59)

(f° 55) A de ce que le procureur de ceste court procedant de son office feisoit evocquez et appelez Georges Tournemyne sire et baron du Hommet disant quil avoit avecques luy aiournement par ceans de ceste a comparoir personnellement et par arest en la demande de avoir par marchinacion deliberement conspiré esté en compaignie agent complyce et adheré de meurdre et mectre a mort en destestable maniere feu Jehan Eder en son vivant seigneur de Beaumenoir / demand iceluy enor que estre jugé defaillant ou deffault de comparoir et ses avans et aultres gaignes luy estre baillez et adjugez audesur et sellon la coustume de ce pays / Entendoit est comparu Rolland de Brehant disant estre procureur dudit Georges et le voulloir deffendre et a presenté lettres de procuracion passé par la court de La Hunaudaye par Pierres de La Marre et Guillaume Desnoes [...] estably avoir contractez dicelle court en date du dixneuffiesme jour de novembre (f° 56) derroin / Aussi a aparu ung mandast du Roy mon souverain seigneur amené de sa Chancellerie de Bretaigne signe de J. de Jorel secretaire et saelle date du deroin jour de may deroin / Et des signes et ceaulx apposez esdit mandast et lettre de procuracion a esté a suffire informé iceluy disant iceluy de Brehant oudit nom voulloir veriffiez le contenu oudit mandast et quel est recevable a excuser ledit Tournemyne et iceluy deffendre aux fais contenu par le dit mandast / O ce que laiournement que ledit Tournemyne avoit a ce jour ceans luy avoit esté fait savoir commis son procureur / duquel procureur a esté dit quil ne recept en riens ledit de Brehant oudit nom a recepvoir pour le dit Tournemyne et considere les enquestes faite en la matiere dudit homicide jour lesquelles ledit Georges est dudit cas trouvé charge le [de-] de aiournement fait en ladite matiere et laiournement despendant [...] (f° 57) en personne et par arest quil avoit aultre aiournement fait scavoir que audit de Brehant que iceluy Georges doibt comparoir ou estre jugé defaillant en ladite matiere actendu meimes les esplectz y ensuыз et le [...] cas si excecrable offrant bien recevoir au procureur le dit de Brehant pour iceluy Tournemyne a le deffendre es proceix et desplectz entre eulx sensuыз par ceans ou debat du nom sur a ceux de ceans compoir disant auparsur que en riens nest recevable a dire ne remonstrez aucune chose de lexcuse dudit Tournemyne quil ne dois comparoir en personne en la principale matiere quil doibt estre nonbstant ledit mandement et procuracion juge defaillant et dudit de Brehant ou nom precedant a esté dit atandu la teneur de sondit mandement / le quel il veult et ossis veriffiez de dans tel tems que luy sera limité et ordonné quil doibt estre receu a ocuper deffendre et escuser ledit Tournemyne et fut leurs resons par monseigneur le senechal (f° 58) de ceste court veu le meurtre dudit homme et homicide / actandu la teneur et effect des enquestes faites en la matiere quelle a lui ont este apres et veues et devoir de laiournement fait en ladite matiere / ce que vers ledit Tournemyne a esté esptecté et que de bonne raison lon peult comprendre en la matiere non obstant lesditz mandement procuracion a esté iceluy Georges Tournemyne jugé et reporté contumace et deffault comme ledit procureur es demandes et que conclusions par luy prinses vers iceluy Tournemyne en la matiere dudit homicide et commande a touz les sergents iceluy Georges prandre du corps et aprehandé le pourra hors lieu saint le rendre et constituer prisonnier es prinsons de ceste court sans icelle recreance. Et si non [...] intimement en la demande susdite a trouvé comportant a comparoir en personne par arest en luy intimant ou deffault de comparoir quel sera vers luy procedé a fer banissement au desur et sellon la coustume de ce pays / De quoy iceluy de Brehant a dit appelez et a (f° 59) appellé / Et neantmoins a esté ladite deffaille jugee / Et commande ladite provision estre sur le dit Tournemyne excecutee / fait par la court de Rennes devant mondit seigneur le senneschal le septiesme jour daougst lan mill quatre centz quatre vigntz et traize ainsi signe J. Pares passé.

(f° 60) Ad ce que le procureur de ceste court procedant de son office faisoit evocquez et appelez Georges Tournemyne sire et baron du Hommet disant quil avoit avecques luy aiournement par ceans decretee a comparoir personnellement par arest en la demande de avoir par machinacion deliberement conspiré esté en compaignie agent complice et adheré et mendoit et mecrte a mort en destestable maniere feu Jehan Eder en son vivant seigneur de Beaumanoir demande iceluy evoqué estre jugé deffillant ou deffault de comparoir et ses avans et aultres gaigues luy baillez et adjugez au desur et sellon la coustume de ce pays / En len droit est comparu Rolland de Brehant disant estre procureur dudit Georges de voulloir deffendre / Et en a aprau lettres de procuracion passee par la court de La Hunaudaye par Pierres de la Mare et Guillaume Desnoes sellé du scel estably es ontractz dicelle court en date du dix neuffiesme jour de novembre derroin aussi a aparung mandast du Roy mon souverain seigneur emané de sa chancellerie de Bretaigne signe de (f°61) J. de Jorel secretaire dicelle et saelle du derroin jour de may derroin et dessignes et seaulx appousez esdit mandement dettre de procuracion a este a suffire informacion, disant iceluy de Brehant audit nom voullait verriffiez le contenu oudit mandement et quil est recevable a escuser ledit Tournemyne et icelluy deffendre aux fins contenues par ledit mandement / duquel procureur a esté dit quil ne receipt en rien ledit de Brehant audit non a procurer pour ledit Tournemyne et considere les enquestes faites en ladite matiere dudit homicide par lesquelles ledit Georges est dudit cas trouve changé le decret daiournement fait en la matiere et laiournement despendant a comparoir en personne et par arest que iceluy Georges doibt comproir ou estre jugé deffillant en ladite matiere / actendant meimes les esplez et ensuiz et lencontre du cas si excusable / offrant bien a recevoir a procurer ledit de Brehant pour iceluy Tournemyne deffendre es proceix et esplez [...] procedans au debat dun (f° 62) non sur [...] comparoir / disant au procureur que en rien nest recevable a dite ne remonstrez aucune chouse de lexcuse dudit Tournemyne ne quil ne ays comparoir en personne en la principale matiere et quil doibt estre nonbostant le dit mandement et procuracion jugé deffillant / Et dudit de Brehant ou non precedant a esté dit actendre la teneur de sondit mandement lequell il veult [...] verrifier dedans quel temps que luy sera limité et ordonné et quil doibt estre receu a occuper deffandre et excuser le dit Tournemyne / Et sur leurs raisons par monseigneur le senneschal de ceste court veu [...] et homicide actendre la teneur et effecte des enquestes faites en la matiere quelles a ladite fin ont este [apar-] et veues le decret de laiournement fait en ladite matiere et [...] vers ledit Tournemyne a esté es plectz et que de bonne raison son peult comprandre en la matiere non obstant lesdit mandement et procuracion a este iceluy Georges Tournemyne suffizamment avecque et appeler jusque (f° 63) et réputé a contumace et deffillant contre le dit procureur es demandes et conclusions par luy prinses vers iceluy Tournemyne en ladite matiere dudit homicide / Et commande a touz les sergens et aultres subgetz dudit seigneur iceluy Georges prandre du corps et aprehander le poura hors lieu saint / Et le randre et constituer prinsonnier es prinsons de ceste court sans nulle recreance / Et si non [la-] intimement en ladite demande dessurdite a trouve comptant a comparoir en personne et par arest en luy intimant au deffault de comparoir quel sera vers luy proceder a for banissement audessus et sellond la coustume de ce pays / de quoy iceluy de Brehant a dit appelez et a appellé et neantmoins a esté le dit deffault jugee commande ladite procuracion estre sur ledit Tournemyne presentee / ~~de quoy a [...]~~ appelle / fait es plectz generaulx (f° 64) de Rennes devant monseigneur le senneschal le cinquiesme jour de septembre lan mill quatre centz quatre vingtz traize signé J. Pares passé constat en instance ligue et a appellé apparu.

31 mai 1493 : Charles VIII suspend l'enquête contre Georges Tournemine (f° 64-70)

Charles par la grace de Dieu Roy de France a nostre amé et feal conseilier maistre Nycollas Dalier nostre senneschal de Rennes, Salut. De la part de nostre cher bien aimé et feal subget Georges Tournemyne seigneur du Hommet, nous a esté en suppliant expousé combien quil soit actaignant de lignaigne a plusieurs comtes barons chevalliers et aultres sires de nos pays tant en France que Bretagne et que tout le temps de sa vie il sestoit bien et honnestement gouverné sans avoir commis aucun cas digne de reprehension meismes (f° 65) quil soit originaire [...] de noz pays et duché danjou et par ce moyen y estre justiczable de son personnel et non ailleurs / par quoy seullement a aultre territoire ne juridicion hors iceluy nostre dit pays danjou / Ce neantmoins notre bien amé procureur de nostre dite court de Rennes en nostredit pays de Bretagne la fait [...] par nostre dite court et par icelle le fait de jour en aultre appelez et condamnez sur le cas de avoir accis et mis a mort Jehan Eder seigneur de Beaumanoir et le y fait coutumancez / Neantmoins que aparte des appeaux que a fait faire nostre dit procureur sestoit toujours comper procureur pour luy duement fondé que tousiours a excepté [...] de nostre dite court de Rennes disant et remonstrant quil nestoit originaire ne manconnier de nostre dit pays de Bretagne ne aucunement y subject de son personnel ayns quil estoit de nostre dit pays danjou / Et combien quil ayt tousiours offert [...] veriffiez sadite excepcion declinatoire james navez voullu (f° 66) ne nos aultres juges dudit Rennes le y recepvoir ains lavez jugé a deffailant dont nostre dit exposant a apellé et desdit appeaux fait relevez en nostredite court de Parlement de cedit pays en vertu de nostredit mandement partent luy concedé de nostre Chancellerie et Conseil de nostredit pays de Bretagne / Et neantmoins ce de jour en aultre le fait [...] nostredit procureur saschant le faire condamnez et deffailier pour tant de foiz que en ensuyvant la coustume de nostredit pays de Bretagne, nostredit procureur de Rennes pourtant par icelles deffailles le mettre a forban [banissement, expulsion] pour ledit meurdre et homicide si faire le povait tout ainsy comme sil estoit actant [mauvais] du cas duquel il est jugue sceut / Quelles choses ce doit et pouvoit ceder au grant faulte deshonneur perte et domaige dudit suppliant ses parens et amys et pouvoit pour ce moien estre impesché de jouir des droitcz et et sucessions quil a peult avoir en nostredit pays de Bretagne ou luy pourroit advenir plusieurs grandes es nobles riches et nobles (f° 67) riches sucessions dont il seroit [...] privé si par nous ne luy estoit donné le remede / Et que grant fatigue travail et [...] chose seroit audit exposant monstrez [...] par nostre dit court de Rennes que nest capable de juridicion sur luy de son jumens et comme james il ne fut aucteur fauteur complice ne adheré dudit meurdre / Lequelle jugemens il veult et entend monstrez et veriffier quant il sera davant juge comptant par davant lequel il puisse le faire sans estre contre raison fatigué / Nous suppliant quil nous plaise sur tant ce luy pourveoir de remede convenable tres humblement le nous requerant / pour ce est il que nous lesdites choses considerees et lestat et extraction dont est ledit suppliant et loffre quil fait de soy justifier dudit cas pour rien quil soit davant son juge comptant / Aussy meismes si ainsy est que ledit suppliant ne soit aucunement subget de son personnel de nostre pays et duché de (f° 68) Bretagne mais aynsi quil a allegué par affirmation estre originaire [...] de nostredit pays danjou que nullement nest subject de nostredit pays et duché de Bretagne / par quoi si ainsy est que sur ledit cas dist estre a ceste [...] ne prins en chaulde poursuilte avant sestre repatire / Vous et noz aultres juges et nostredite court de Rennes ne se [...] pas ses juges comptans actandre la coustume de nostredit pays / ayns touz les esplectz que davant vous sen ensuyvront pourroit estre retractez et de nulle valleur / Pour lesquelles causes et aultres ad ce nous nommans vous mandons et commandons recevoir ledit exposant par [serment] [...] fait a dire et alleguer icelle excepcion / et la respons et contestacion y faitz / Vous informez premierement dicelle exception et baillez breff temps [...] audit exposant

den faire la preuve et en estre lenqueste faite par vous nostredit senneschal ou aultres non suspectz que commectre / Et sil combien appert ou tant que suffire doye vous (f° 69) et aussi nostredit procureur cessez de plus par icelle court traicter [...] condamnez appelez ne contumacez ledit exposant touchant ledit cas sauff a en estre recherché et acoué davant son juge comportant et pendant le temps que baillerez pour ladite preuve faire et dicelle declaratoire vous mandons et commandons et a nostredit procureur sourceoires et suspendre tout le proceix en lestat quil est sans riens ne aucune chose [...] de faire et lesdites choses ad ce requeste et pertinentes vous [...] donne et donnons povair et commission / Donné a Nantes en noz Chancellerie et Conseil de Bretagne le deroin jour de may lan de grace mill quatre cents quatre vingts traize / ainsy signé par le Roy en sondit Conseil ou quil estoit presans [...] de nostre dame de Nantes les senneschal de Lamballe allans de Nantes le procureur de Ploermel et aultres J. Jorel et saellé au seel de ladite Chancelerie / Donné et fait par coppie par la court de Rennes laquelle a requeste (f° 70) du procureur de ladite court a este vers Rolland de Brehant declere aultant de foy estre adjouptez comme a [...] / le septiesme jour daoustg lan mill quatre cents quatre vingts et traize / Ainsy signé J. Pares passé constat et intance ligue et nobles [...].

16 décembre 1486 : François II, duc de Bretagne, ordonne une enquête sur le meurtre de Jean Eder Beaumanoir (f° 72-76)

(f° 72) Francoys par la grace de Dieu duc de Bretagne comte de Monfort de Richemont destampes et de Vertuz. A nolz senneschaulx, allouez et lieutenants de Rennes et de Nantes, Salut de la part des parens et amis de deffunct Jehan Eder en son vivant nostre feal et subject et sire de Beaumanoir, nous a esté en suppliant exposé que pour ung moys derroin comme ledit deffunct et nostre amee et fealle la dame de La Hunaudaye sa compagne espouse fussent en leur maison de La Beraudière au pays d'anjou. Et fussent a la requeste de nostre bien amé cousin et feal le sires de La Hunaudaye filz de ladite dame venuz audit lieu de La Hunaudaye veoir icelui sires et par aucun temps avecques luy residé et fait bonne chere deliberement ledit sires de La Hunaudaye et deffunct Jehan Eder daler a la chace en la forest dudit lieu de La Hunaudaye ou ilz furent deffait, en laquelle chace et forest (f° 73) ledit Jehan Eder fut par aucuns incongnuez esditz supplians murdry et mis a mort en mauvaie et detestacle maniere luy furent donnez plusieurs coups et collees mortelles ainsi que apparoit sur son corps apres quil eut esté trouvé mort en ladite forest, quelle chose et excecrable malifice cede en grand deshonneur prendre et dommaige au filz dudit deffunct Jehan Eder et de sesditz parens et amis nous supplian sur cela luy faire et administrer provision de justice donc quoy nous desirans touz malefices reprimer et faire punir et a nolz subgetz justice faire et administrer ainsi que raison est, vous mandons et commandons en comectant si mastiere est et a chacun de vous ung clerc notable appellé en la compaignie dicelui de vous qui [...] acquera que tout incontinant apres cests motz publies [...] vous faictes et procedez a restituer serment faire (f° 74) enqueste et informacion du cas et malefice dessurdit par toutes voies et moiens possibles et raisonnables et touz ceulx et chacun que vous en ~~trouvez~~ trouverez chargez ou vehementement suspectez par prouve ou presumption apparante et raisonnable vous prenez et [...] defait prandre es prisons et de tenir des corps en [...] sures prisons jucques a estre ouyr parlez a droit et en justice et si vous voiez ou doubtez que aucune rebellion ou desoboissance vous y soit donnee ou faite assemblez et appelez avecques vous ausdites prinses et ~~en~~ emprisonnemens faire ceulx et chacun de nolz justiciers officiers feaulx et subgetz que vons vous semblera et verrez y estre necessaires / Et ladite informations et enquestes ainsi par vous faites envoyez feablement signees et closes par devers nous et nostre (f° 75) Conseil pour sur et touchant ce que dessus

faire et ordonnez telle provision et expedicion que selon raison et justice appartiendra de ce faire avecques toutes et chacune les choses [...] requises vous avoir et a chacun ainsi que dit est donné et donnons plan et expres pover auctorité commission et mandement especial mandons et expressement enjoignons et commandons a touz et chacun nolz justiciers et officiers feaulx et subgetz sur ce par vous requis et tout ce que dessus sequelles et deppendences vous estre aydans oboissans et diligeament entendans par ainsi le voulons et nous plaise donné en nostre ville de Nantes le seix^{me} jour de decembre lan mill IIII^{cs} IIII^{xx} seix et [...] mandons aux officiers de nostre justice qui ont besonge es enquestes doffice en ceste matiere les vous communiquer (**f° 76**) pour vous servir ainsi que de raison ainsi signé par le duc en son Conseil A. Bouchart et saellé constat en instance ligue a ce [...].

25 janvier 1487 : Conseil du duc de Bretagne, François II, demandant la saisie et l'emprisonnement des coupables dans l'affaire Jean Eder (**f° 76-82**).

(**f° 76**) Franczoys par la grace de Dieu duc de Bretagne comte de Monfort de Richemont d'Estampes et Vertuz a nolz seneschal alloue et lieutenant de Rennes, Salut. Comme par avant ses heures (**f°77**) sur les doleances et complainte nous faite de la part de notre amé et feal Jehan Eder escuyer seigneur de Beaumanoir filz et heritier feal et noble de deffunt Jehan Eder son pere en son vivant mary espoux de notre amé et fealle dame Marie de Villiers dame de La Beraudiere et de plusieurs aultres parens et amis consanguins dudit feu Eder exposans savoir pour le jour et feste de Toussains deroine passé lesditz feuz Eder et ladite Marie sa compaigne par la requeste et pourchaz de notre cher bien ame consin et feal le sire de La Hunaudaye sen feussent partiz oudit lieu de la Beraudiere et venuz audit lieu de La Hunaudaye ou en premieres nopces celle dame de La Beraudière avoit este consentante par mariaige avecque le pere de notredit cousin / ~~et plusieurs aultres~~ jucquau lieu (**f°78**) de La Hunaudaye ledit feu Eder et sadite compaigne arriverent et avecques eulx Georges et Jehan freres de nostre dit cousin et plusieurs aultres et apres avoir resider en ladite maison de La Hunaudaye par aucuns jours a ung jour de lundy devers le mardy sen allerent ledit sire, sesditz freres, ledit feu Jehan Eder un nommé Petit Jehan Bastart de La Hunaudaye, Jehan du Breil et plusieurs autres serviteurs dudit sire et dudit feu Eder a la chasse en la forest dudit lieu de La Hunaudaye en laquelle forest en ung endroit dicelle appelle le [Boucanboy] [...] soit en certain endroit dicelle sur iceluy Eder en mauvaise et detestable manière meurdry occis et mis a mort par certains incogneuz ausditz exposans lesquels malfecteurs avoint donné audit deffunt plusieurs coups et collees et luy fait plusieurs plays mortelles (**f° 79**) sur son corps pour informer duquel cas et lui [...] faire le rapport devers nous et nostre Conseil pour compatir et faire et donné la prison [...] entre aultres notre amé et feal conseiller maistre Jehan des [Rompierrres] nostre lieutenant de Nantes le quel y ait vacquer et besoigne Daniel Miffeut³ notre secretaire en sa compaignie laquelle informacion ainsi faite lesditz exposans nous ayant fait presente en mondit conseil nous supplians la y faire veoirs et visiter pour ampoasser leur pouvoir de rendre de justice, tres humblement le nous requerant pour quoy, nous ledites choses considerans, et que a present obstant les grans occupacions que avons en nostre dit conseil pour le fait de la chose publicque de notre pays et duché [tellement] que ne pouvons vacquer (**f°80**) a veoir lesdites enquestes ne afaire [...] en ladite matiere telles que bien sont requises se maintenans ne voullans telz mallifices et excecrables delitz tollerez ne souffrir ne iceulx demerez impugniz ains les reprimer a tour nostre pouvoir justice entre nolz subjectz faire et administrez ainsi que raisons est / Et [...] vous mandons et commandons exposé sous sermens et a chacun de vous veoir et visiter lesdites

³ Il s'agit du secrétaire du lieutenant du duc chargé des investigations.

enquestes et informacions ainsi faictes par lesditz de Ronpieres et ceulx que trouverez chargez coupables vehementement suspesonnez dudit cas les prenez ou faites prendre et saisir des corps reamment et deffait silz sont trouvez hors lieu saint et les faires constituez prisonniers en nolz prysons de Rennes pour y estre [...] apprehender ne les prinz ou (f° 81) aussi se sont par lesdites enquestes vouez que la matiere ne requiere en soy prinse de corps les avouez en fautes par lun de nolz sergens avouez acompartir et semblablement et par [...] court et barre de Rennes pour ledit cas respondre auditz esposans avoir procureur dudit lieu et chacun deulx pour son informacion deulx vouldra vers les [...] prendre et estre [...] enqueste et retenue engageons et retenons la cognoissance de ladite matiere devant vous nolzditz juges et chacun et a touz aultres lavons interdite et interdisons et y vous mandons et commandons expressement en congnoistre santances et de terminer judiciairement jucques a santance [...] par breffs jours et termes conpetans sans avoir esgart [...] de personne ou de mener retiront de (f° 82) barres ne a termes ordinaires quelxconques et y procedez tellement et se vertueusement selon droict et justice quil cede en exemple a touz aultres de faire ce mandast et les choses environ pertinentes et requises vous avoir donne et donnons et a chacun de vous [...] pouvoir auctorité commission et mandement expressement mandons et commandons a touz nolz feaulx et subjectz en ce fausant vous estre obeissans et dillgemment entendens par il nous plaise donné en nostre ville de Nantes, le vignt cinquiesme jour de janvier lan mill quatre cens quatre vingtz seize (ou sept ??a trancher) ainsi signe par le duc en son conseil / duperray et scelle (lonstant).. (f° 83) RAS

17 octobre 1494 : Le Parlement de Bretagne pour le roi Charles VIII conclut l'affaire Beaumanoir (f° 84-110)

(f° 84) Les gens tenans pour le Roy le Parlement quon a coustume tenir en Bretagne, Savoir faisons que en la court dudit Parlement sont comparuz et duement publiez Jehan Deran commie general procureur [...] de maistre Pierres [Cojalu] procureur de ladite court de Rennes en procadant de son office appelle dune partie et maistre Olivier de Guiliouch procureur general aussi procureur de Georges Tournemyne baron du Hommet appellant dautre partie lesquels ont esté confessans que par la court de Rennes le procureur dudit Rennes se fesant commis de fer preuve de bon memoire le duc et son Consail derroin decedé que Dieu absolve et en la matiere cy apres avoit mis en aiournement et [...] en cause ledit Georges Tournemyne dit et propose vers luy dire en lan mill III^{cs} IIII^{xx} seix et queque soit puis dix ans lors derroins ledit Georges Tournemyne et Jehan Tournemyne son frere et chacun et lun deulx avoint conceu haine et inimitié avec deffinct Jehan Eder en son vivant sieur de Beaumenoir a locasion du mariaige qui avoit este fait dudit feu Eder avecques (f° 85) dame Marie de Villiers dame du Hommet et de La Beraudière mere desditz Georges et Jehan Tournemyne avoint dit se vanté en plusieurs lieux quilz feroient mourir ledit Eder quoy quil leur en deuse a venir, disans que a luy ne apartenoit pas estre marié a icelle dame qui estoit plus puissant et de plus grande extraction que nestoit ledit Eder et en continuant ceulx Georges et Jehan Tournemyne [avoir] haynes desirans icelles meptre a execucion par les moyens et aides de leurs adhez en icelle matiere avoint trouvé moyens de faire alelr querir lesditz Jehan Eder et dame Marie de Villiers sa compaigne qui lors estoit demeurans au pais danjou au lieu de La Beraudière et les mener demeourer a La Hunaudaye pour myeulx et plus a leur aise mettre leur vouldoir et entreprinse damable a execucion / Et apres avoir esté lesditz Jehan Eder et sa compaigne aucun espace de temps deumerans audit lieu de La Hunaudaye fut au chasteau dusit sieur dudit lieu assigné tant pour aller la clace en la forest dudit lieu pour en icelle meurdri et mettre a mort ledit Jehan Eder ainsi questoit vroy semblable [...] (f° 86) et [...] par ce que apres sestoit enfuy duquel tout

assigné pour aller a ladite chace qui fut ou moys de novembre oudit an mil IIII^{cs} IIII^{xx} seix et que eussoit prins dix ans lors derroins le sire dudit lieu de La Hunaudaye lesditz Georges et Jehan Tournemyne ses freres ledit Jehan Eder feu Petit Jehan Bastart de La Hunaudaye, Jehan du Breil et aultres plusieurs serviteurs dudit sire partirent assemblement dudit lieu de La Hunaudaye disans aller a ladite forest faignans y debvoir chacer et en icelle forest assemblement entrent garniz de dagues espees espiez et aultres aremmens et eulx estans en icelle forest traiteusement par conspiracion deliberer de guet apans lesditz Bastart et Jehan du Breil en la presence desditz Georges et Jehan Tournemyne qui leur y donnoit faveur et couraige avoint [...] assailly ledit Jehan Eder et par eulx et chacun de leurdites espiez et ferremens lavoint frappé plusieurs coups et collers destre au [...] corps tellement quil estoit cheu a terre de sur ung cheval quil chevauchoit et par les dessusdit (f° 87) et chacun agens complices et adhez fauteurs et sousteneurs les ungs des aultres luy avoint esté faites plus de dix playes mortelles, avoint esté tellement bleze et [...] que a occasion de ce la mort incontinant seestoit ensuiz en la personne deceluy Eder et sans confession neantmoins que plusieurs foiz il eust demandé et requis estre confessé et queque soit avoint esté ledit Jehan Eder occis et mis a mort par lesditz Bastart et du Breill assez pres des lieux ou estoient lesditz Jehan et Georges Tournemyne tellement quilz pouvoient bien veoir faire ledit meurdre et ouyr le cry que fist ledit Eder et le bruit qui avoir este en ce faisant en commectant lequelas si aborrant et detestable avoint este [...] en icelle forest par les serviteurs dudit sieur estans avecques luy et les mafecteurs dessus nommez en la faczon que lon a de coustume [...] quant une beste sauvage est prinse. Et que dempuis ce et apres ledit cas ainsi perpectré seestoit lesdit Georges et Jehan Tournemyne renduz futiffs et desditz faitz avoint ledit procureur qui respons et [...] iceulx congneuz (f° 88) trouvez que ledit Georges Tournemyne avoint fait tort et que dudit cas il eust esté [...] homicide audesur et selon que par la coustume de cedit pays estoit permis pui le quel Georges Tournemyne seestoit compary Guillaume Le Dean son procureur a lafin de la matiere aussi questoit contenu par la procuracion quil avoint apparu qui protesta que la comparacion quil faisoit et ce quill entendoit a lors dire et remonstrer nestoit point pour accepter et proroger jurisdiction a celle court de Rennes mais entendoit dire que ledit Georges ny estoit aucunement subget que les proceix qui y seroient faitz devoit estre et ditz nulz dont ledit procureur de Rennes avoint dit ne conper que [...] Et ce avoint dit icelui Le Dean esdit noms que ledit Georges estoit demeurans en la maison du Roy et que au temps de laiournement fait et donné en la matiere dempuis ne alors navoit seut aceix aller en la ville de Rennes pour les gens de guerre tant du party de France que de Bretagne feillans et brigans qui se tenoient aux champs et [...] (f° 89) en aultre et souvant faisoient prises de gens et roberies sauff adeclerer et bailler par articles / Et desditz faiz avoint dit estre [...] publicque et commun regnon et en avoint esté ledit procureur confessant le quel procureur o protestacion du procureur avoint esté [...] dudit mon sur acceix. Et avoint proposé que alors avoint par bannye en public entre le Roy la Royne et duchesse nostre souveraine dame leurs pays et subgetz et que plusieurs alloint et venoient de lun des pais en lautre [...] et que esditz temps et chacun avoint eu et [...] alors avoint seur acceix de pouvoir aller a ladite ville dudit pays de France et quil estoit notoire de quoy ledit Le Dean estoit nom avoint esté denyeyr et en avoint esté a chaucun deulx les proanes jugers et avoint iceluy Le Dean esdit noms en ladite matiere de exception choese de matiere pour ledit Georges ou lieu de La Hunaudaye selon le proceix du XX^e jour de decembre lan mill IIII^{cs} IIII^{xx} dix / Et a terme ensuyvant ad ce que ledit procureur de Rennes (f° 90) avoint fait appeler ledit Georges Tournemyne seestoit comparu Rolland de Brehant que dist estre son procureur et pour luy voulloir comparoir et le deffendre es aiournemens vers lui pendens a celui jour a instance dudit procureur de Rennes et a celle fin avoint apparu procuracion dudit Georges Tournemine o [...] estre a recepcion pour lui occuper et le deffendre. Et dudit procureur avoint esté dit et offert en ce questoit laiournement pendant en

contans clens de lavoir dudit Georges voulloir consantir quil y fust receu et en ce questoit es aultres aiournemens en linstance dudit meurdre dont sur les enquestes et informacions faites ledit proceix avoit esté decreté ne le voulloir recepvoir / Et dudit de Brehant avoit esté remonstré que en ce quil voullait et entendoit dire que icelui Georges estoit demeurant et residant ou pays danjou et que les aiournemens que en ladite demande avoint este donnez ne luy avenu / este faitz savoir ne a son domicile ains ailleurs que (**f° 91**) que a sondit domicile avoint este faitz savoir par quoy a respondre en lun diceulx aiournemens ne comparoir en ladite court de Rennes, il nestoit tenu ses faitz congneuz ou trouvez dont il avoit mis respons / Et neantmoins ce avoit esté ledit Georges Tournemyne [...] apelle et que pour ce que nestoit comparu juge avoit esté deffaillant contre et a instance dudit procureur de Rennes dont ledit Behrant avoit appellé ou il navoit este receu de quoy derechieff il avoit appellé a reverance selon lacte sur ce fait le quinziesme jour de decembre lan mil IIII^{xx} doze Et a lautre tenue ensuyvant a lappeau que faisoit faire ledit procureur de Rennes dudit Georges Tournelyne en linstance dudit meurdre estoit comparu ledit Rolland de Brehant commis son procureur general disant quil avoit delui charge de comparoir en ladite court pour declarer du senneschal dicelle et aussi pour remonstrer la millite des espletz faiz par ladite court entre ledit procureur de Rennes en aucuns (**f° 92**) procureur dudit Georges et navoit aultre charge et avoit dit este a recepvoir et occuper pour lui / Et dudit procureur avoit esté dit et offer [...]. Et par ledit de Brehant audit nom avoit esté dit que ledit Georges Tournemyne estoit originiaire du pays danjou en la juridiction de Craon et y demeurant au temps de laiournemen lan de par avant second tiers quart quint dix et quinze [...] et y estoit subject de son personnel quelle court et barre de Craon nestoit aucunement subjecte de ladite court de Rennes et estoit hors a ceste principaulté de Bretagne et nestoit selui Georges aiourne a son domicelle a sa personne ne a son procureur [...] en cause et de ce que dessus avoit demender respons par quoy avoit dit ledit de Brehant audit nom ses faitz congneuz au proceix quil estoit receptable et comper pour ledit Georges Tournemyne quant affin de meptre et alleguer ladite execption duquel procureur avoit (**f° 93**) avoit esté dit du contraire sauff a venir en personne deffendre ladite matiere et pouser sadite exception que maintenains tout ce ou deffault de comparoir en personne devoit deffaillir. Et faire apres ledit Georges avoir esté faire enquete par ledit senneschal [...] les causes de ladite court avoit esté ledit Georges [...] le cas en soy les enquestez et decleretz faitz en la matiere jugé deffaillant contre ledit procureur / De quoy ledit de Brehant avoit appellé et ne avoit este receu audit appeau fors que par le juge et [...] il seroit receu / Et en procedant aultre savoir ledit procureur demande vers ledit de Brehand esditz noms estre dit clens de non sen a ceux dessus [...] procedé lequel de Brehand audit nom affin de non procedez avoit dit que ledit Georges Tournemyne estoit originiaire dudit pais danjou et y demeurant lan second tiers quart dix quinze ans et plus et au temps desditz esplez et aiournemens (**f° 94**) non subject a ladite court de Rennes de son personne. Et que au temps et par avant lexecucion desditz clens ung procureur de luy apar erreur se avancza a constester plect par ladite court de Rennes en la matiere desditz clens esperant que le juge de ladite court fust juge cappable nestoit en riens o loffice et quil avoit faire de desdommager se de la court estoit dit que faire le [...] congneu ou trouvé ses faitz dont il avoit qui respons que a [...] clens il nestoit tenu duquel procureur avoit esté dit que les faitz alleguez dudit de Brehand oudit nom nestoit vallables ne recepables en impeschant precedant esdit clens et que a la correction dudit procureur il nestoit recepable de la personne meisme que ce nestoit le prouchain terme et le laps du temps empuix lesdit cleus crouez en son que sur quoy parties [...] avoit esté par ledit senneschal jugé et decleré que (**f° 95**) le faitz diz et alleguez dudit de Brehant audit ny nestoint vallables ne suffizans [impes-] procedez en la matiere esdit clens avecques ledit procureur / Duquel jugement et santance ledit de Brehant oudit nom avoit appellé selon lacte de ce fait du quatorziesme jour de janvier

dit an III^{XX} doze. Et [au] terme apers a lappeau que ledit procureur avoit fait faire dudit Georges Tournemine en l'instance dudit meurdre qui estoit [...] comparu ledit Rolland de Brehant se disant procureur pour ledit Georges et avoit apparu la procuracion disant et supposant les plect [...] dudit quatorze sur ce jour de janvier sur la legance- par luy faicte affin destre a recepvoir a comparoir ob deffendre ledit Tournemyne et a corriger ladit erreur et les santances et appel sur ce ensuiz quel appel il avoit dit avoir dempuix fait relever en ceste court de par lendroit et que apers ladite expedicion ensuyr ledit procureur (**f° 96**) de Rennes avoit fait donner aiournement audit de Brehant procureur dudit Georges lequel seullement avoit puissance de decliner de ladite court de Rennes et corriger ladite erreur / Et em plus large navoit puissance aussi navoit celuy Georges aultre aiournement a celuy jour pendent audit procureur de Rennes et avoit dit celuy de Brehant oudit moy que audit aiournement luy faire savoir [s']il le pavoit deffendre lequel procureur de Rennes avoit bien congneu que iceluy Georges avoit aiournement a son instance a comparoir en personne et par arrest ainsi questoit dit devant sur le cas dudit murdre et aussi esdit clens arez en bannir diceluy Georges et avoit dit que a recepvoir ledit de Brehant a occuper en la matiere dudit homicide veu ledit aiournement et [...] enquestes faictes en la matiere et decret de proceix quil nestoit tenu (**f° 97**) Et que nenantmoins il devoit estre jugé deffaillant offrant bien le receu a deffendre ledit Georges esditz clens [...] si iceluy de Brehant vouloit le y deffendre et dudit de Brehant avoit esté dit veu et considerer le contenu audit proceix et aiournement luy fait savoir [...] de ce que avoit dit et proposé que iceluy Georges estoit originaire dudit pays danjou souz ladite juridiction de Craon et y demourant au temps ddit meurdre dit dudit procureur avoit esté oudit deffunct lan de par avant second tiers quart quint dix quinze [...] dicelle juridiction de Craon subject de son personnel quelle juridiction court et barre de Craon nestoit aucunement subjectz de ladite court de Rennes mais estoit hors la principaulté dudit pays et duché de Bretagne pour quoy avoit dit (**f° 98**) ses faitz congneuz ou trouvez dont il avoit quis respons quil estoit recevable pour ledit Geroges Tournemyne occuper et comparoir ausdit allegues faire et impescher ladite deffaille et celuy procureur de Rennes len respondre auditz faitz duquel procureur avoit esté dit veu que ledit de Brehant audit nom ne vouloit deffendre la matiere en principal et quil ne vouloit fors comparoir pour decliner loffice quil avoit fait au cas que celuy de Brehant ne voudroit justifier en ladite matiere en principal de le recepvoir que les faitz dudit de Brehant nestoient recevables dont leur avoit este [...] faire [...] raison selon le proceix de lonziesme jour de mars audit ans quatre vigntz doze / Et dempuix a aultre terme ensuyvant a lappeau que faisoit faire ledit procureur de Rennes dudit Georges Tournemine en l'instance dudit meurdre ou il disoit (**f° 99**) celui avoir aiournement a comparoir en personne et par arrest estoit [...] de recheff [...] ledit Rolland de Brehant commis procureur dudit Georges ainsi quil apparu par lettres de procuracion [...] ou proceix voullant occupez pour ledit Georges et le deffendre audit aiournement aux fins contenus en ladite procuracion savoir de decliner de ladite court de Rennes et corriger ladite erreur selon ledit proceix dudit XIII^e jour de janvier / Et avoit dit y estre a recepvoir/ Et dudit procureur avoit esté dit affin que celui Georges Tournemine nestoit recevable a estre deffendu par procureur et quil devoit deffaillir que ledit aiournement despendant audit jour estoit a comparoir en personne et par arrest sur le cas et [...] dessurdit en laquelle matiere et a conclusion avoint este faictes enquestes doffice par lesquelles ledit Georges estoit charge dudit cas et [...] et avoit esté (**f° 100**) le proceix decreté vers luy par avant celles heures ou il avoit plusieurs foiz deffailly et la prinse de sa personne commander et tout ce considere que ledit Georges devoit comparoir ou estre jugé deffaillant et neantmoins les choses proposees et remonstrees dudit de Brehant audit mom sur quoy par ledit senneschal de Rennes attendu la matiere de lavanse [...] du cas et [...] suditz et les contumaces obstenuues sur ledit Georges lesdites enquestes doffice faictes en la matiere avoit esté ledit Tournemine

juge contumant et deffaillant vers ledit procureur sur et es aiournemens deppendens narrez et instituez es proceix et deffaillis impeter sur ledit Georges Tournemine de quoy ledit de Brehand ouudit nom avoit appellé de sa bouche a quoy navoit este receu fors par autant que par le juge [...] seroit dit y estre recevable et ce fait dudit de Brehand ou nom precedant avoit esté (**f° 101**) demandé estre procedé entre eulx a laiournement deppenddant audit jugement et [...] debat et asavoir si ledit de Brehand ou nom surdit estoit recevable a occuper et de deffendre ledit Georges Tournemine en la matiere susdite selon quil estoit contenu audit proceix dudit onziesme jour de mars et a celle fin pour servir a la decision diceluy avoit [apro-] ung acte de [...] bailler audit Georges que est [-ere] au long ou proceix pour informez de signe et se apposez en iceluy avoit parler plusieurs tesmoigns suppliant et requerant en estre faicte informaticon et iceulx tesmoigns estre interrogez o ladite fin et ouudit procureur avoir esté dit consideré la contumace donner sur ledit Tournemine apré ledit de Brehand nestoit recevable loccuper ne estre procureur pour ledit Georges en ladite (**f° 102**) matiere veu ce que estoit esplecte et dudit de Brehand avoit esté dit considere leffect et teneur des proceix dentreeulx et entre aultres du proceux dudit onziesme jour de mars par lequel aparoissoit ledit jugement [sesire] ensuy avecques luy procureur dudit Georges et avecques luy despendre par iceluy a proceix aiournement ouudit jugement que en ce il pavoit deffendre ledit Georges et y estre reepvable se que avoit esté reffuzé par ledit senneschal attendu meimes lesplect dessusdit / Et nonobstant tout ce avoit esté ledit Georges jugé deffaillant dont ledit Brehant ouudit nom avoit appellé auquel appel et navoit este receu sauff par autant que par le juge a qui la congnoissance appartenoit dudit appel seroit dit y estre a recevoir selon lacte et proceix du quiziesme jour dapvrill lan mil quatre cens quatre vigntz traize entrant. Et a lautre (**f° 103**) terme subcequant ad ce que ledit procureur de Rennes faisoit encquer et appeler ledit Georges Tournemine en linstance dudit meurdre estoit comparu ledit Rolland de Brehant disant estre procureur diceluy Georges et le voulloir deffendre et avoit apparu la lettre de la procuracion aussi ung mandment du Roy emane de sa Chancellerie de Bretagne signe de Jehan Jorel secretaire et scellé daté du derroin jour de may derroin ouudit an quatre vigntz traize des signes et seaux apposez esqueulx mandement et lettre de procuracion il avoit informé assuffire et avoit dit voulloir veriffier le contenu audit mandement et quil estoit recevable a excuser ledit Tournemine et iceluy deffendre aux fins en iceluy mandement contenuz a ce que laiournement que ledit Tournemyne avoit aceluy jour a ladite court de Rennes luy avoit esté fait savoir commis son procureur duquel procureur (**f° 104**) de Rennes avoit esté dit quil ne recevoit en riens ledit de Brehant a procureur pour ledit Tournemyne considere les enquestes faites en la matiere dudit homicide par lesquelles celuy Georges Tournemyne estoit dudit cas trouve charge [...] daiournement fait en ladite matiere laiournement despandant a comparoir en personne et par arrest / Et aussi quil avoit aultres aiournement fait savoit que a celuy de Brehant que ledit Georges Tournemyne devoit comparoir ou estre jugé deffaillant en ladite matiere attendu meimes les esplez [...] et [...] du cas si excecrable offrant bien recevoir ledit de Brehant aprocurer pour iceluy Tournemine a le deffendre es proceix et esplez entre eulx sensuiz par ladite court de Rennes ou debat au nom sur aceix disant au passur que en riens estoit recevable ad ce remonstrer aucune chose de lescuse dudit Tournemine quil ne deuse comparoir en personne (**f° 105**) en la principale matiere et quil devoit estre nonobstant ledit mandement et procuracion jugé deffaillant et dudit de Brehant ouudit nom avoit esté dit attendu la teneur de sondit mandement lequel il vouloit et offert veriffier dedans [...] temps quil luy seroit [...] ordonne quil devoit estre receu a occuper deffendre et excuser ledit Tournemine sur lesquelles raisons [...] et homicide et rendu la teneur et effect desdites enquestes faictes en la matiere quelles a celle fin avoit este apparues et veues ledit decret daiournement et ce que vers ledit Tournemyne avoit este esplect et que deavoir raison lon pour comprendre en la

matiere nonobstant lesditz mandement et procuracion avoit esté iceluy Georges Tournemine par ledit senneschal de Rennes juge et et repute contumace et deffillant contre ledit procureur es demandes et conclusions dudit meurdre et commande a touz les (f° 106) sergens et aultres subgecz dudit sieur iceluy Georges prandre du corps que apprehender et pouvoir hors lieu saint le randre a constituer prisonnier es prisons de ladite court sans aucune recreance. Et si non il [lamener] en ladite demende jugement a comparoir en personne et par arrest en luy intimant ou deffault de comparoir quil eust esté vers luy procedé a fair bannissement a de sur selon la coustume du pais de quoy celuy de Brehant avoit appellé selon lacte sur ce fait le septiesme jour daougst du an quatre vigntz traeze. Et dempuix a ung aultres terme a lappel que faisoit ledit procureur de Rennes dudit Georges Tournemine se estoit paroillement contenu ledit de Brehant qui avoit dit estre son procureur et le voulloir deffendre et avoit apparu lesdites lettres de procuracion et mandement devant [relevez] (f° 107) dire et aultre part avoir esté dit semblables causes et raisons que audit derroin acte dudit septiesme daougst quatre vigntz traeze et nonobstant lesdites raisons dudit de Brehant apparicion dedites lettres de procuracion et mandement avoit esté par ledit senneschal de Rennes iceluy Georges jugé deffillant es demendes et conclusions dudit meurdre et paraille commandement que [...] et le prandre du corps ou aiourner dont celuy de Brehant avoit appellé selon lacte sur ce faut le vingtiesme jour de septembre dit an quatre vigntz traize lesquelles appellacions et chacun iceluy Georges a dempuix duement fait relever en ceste dite court de Parlement en icelle sont les parties publiees et de chacune part y produit mis et baille le [...] proceix mandemens actes et exceptions queulx [...] veuz et examinez en et prins (f° 108) sur ce advisement et deliberacion rendu et dit la court savoir en ce que sont lesditz premiers santances donnees ledit quiziesme de decembre IIII^{xx} doze que ce a esté par ledit senneschal de Rennes bien jugé et mal appellé dudit Tournemine et comdempne et despans a partie et amande acourt. Et ce que sont lesditz deux sentences donnees ledit XIII^e jour de janvier de an IIII^{xx} doze que ce a esté paroillement par ledit senneschal de Rennes bien jugé et mal appellé dudit Tournemine et [...] es despans a partie et mandé a la court. Et ce que sont deux aultres sentences devers ledit quinziemes jour dapvrill quatre vigntz traize entame por la premiere dicelles sentences la court di randre que ce a esté semblablement par ledit senneschal de Rennes bien jugé et mal appellé dudit Georges Tournemyne et la mander a la court et les despans autant jugez a la partie. Et pour lautre santance est randu (f° 109) que ce a esté par ledit senneschal de Rennes mal jugé et bien appellé dudit Tournemine et les despans entant en ce que sont les deux derroines santances donnees ledit septiesme daougst et lautre le cinquiesme de septembre dit an IIII^{xx} traize rendu aussi la court que en icelles deux santances a esté par ledit senneschal de Rennes bien jugé et mal appellé dudit Tournemyne [...] es estant a partie et amande a la court pour desquels despans a jugez faire [...] sont envoiez a ladite court de Rennes otant povoir lesqueulx [...] est noms qui otant honneur et recreance respectement appellé desdites randues es jugemens / Savoir celuy [de-ays] pour la randue donné contre ledit procureur de Rennes et [...] pour les aultres randues aussi faictes et donnees contre ledit Georges Tournemine et se (f° 110) par les appeaux quilz ont deffendu fait ne sont deffendus ont esté jugez deffillans donnee a Vennes ledit Parlement y tenant le vendredy dix septiesmes jour doctobre l'an mil IIII^{cs} IIII^{xx} et quatorze ainsi signe Jehan d'Auray et saellé constat en instance ligue son Conseil dit [...].

Donné et fait par copie coller faicte a loriginal par la court de Rennes le soze jour de novembre lan mil cinq cens ung a laquelle coppie a requeste du procureur de ceste court a este declerez foy est ajouttez avec a loriginal donné et fait.

A. LE BARRILEZ.

(f° 111) RAS

(f° 112) COPIE Enqueste et informacion faicte [...] du duc et Messieurs de son Conseil par moy Jehan des Rompieres lieutenant de la court de Nantes et Daniel Miffeut segretaire appellé en ma compaignie entendu dun mandat du duc date du seix^{me} jour de ce present moys de decembre signe par le duc en son Conseil [ce bouchant] et scellé touchant la mort et occision ensuye en la personne de Jehan Eder sieur de Beaumanoir commise et perpetuee en la forest de La Hunaudaye icelle faicte le quatorziesme jour de decembre lan mill IIII^{cs} IIII^{xx} et seix.

A Rozet⁴

Michine du Pas marchant demourant ou bourgc de Plesse eaigé de quarante ans auditionne que il dit tesmoigner jure dire voir examine et enquis respondre par son serment que mardy derroin eut huit jours environ leure de disner ce tesmoign se rendit en la meson de Tiemar sise en la parouesse de Plesse et en icelle maison trouva le sieur de Barach⁵ que ce tesmoign dit bien congnoistre et oncques luy avoit ce tesmoign a besoigner pour aucuns ses affaires / Et ce tesmoign estant en la meson de Tiemar demanda audit sieur de Barrach sil yroit point a la chasse / Et celuy sieur de Barrach avecques lequel ce tesmoign avoit grande familiarite et congnoissance respondit (f° 113) par telles parolles ou semblables : « Monsieur de Longle⁶ y a este tue » / Et ce tesmoign luy demande : « Comment il a este tué ? » Et celuy sieur de Barrach : « Le Bastart de La Hunaudaye et ung gentilhomme nomme du Breil lont tué jen suys bien mary » / Et a celle heure celuy sieur de Barach ne nomma le nom ne surnom dudit sieur de Longle ne le prenom dudit du Breil dont ce tesmoign ayt apresent souvenance / Et dist celuy sieur de Barach a ce tesmoign que a ung mardy devers le matin ne declera point aultrement quel jour lesditz sieur de Longle le Bastart de La Hunaudaye celuy du Breil sen estoit allez assemblement a la chasse dedans la forest de La Hunaudaye en ung quartier de laquelle estoit lors le sieur de La Hunaudaye et que touz troys assemblement ilz estoit partiz de la meson de La Hunaudaye pour allez chassez aux sangliers en ladite forest et avoit deliberer ensemble de se tenir en ung endroit au cours de ladite chasse / Et que celuy sieur de Longle avoit dit ausditz Bastart et du Breil que si ilz voullont luy tenir bon quil leur feroit celuy jour tuer ledit sanglier / Et que ilz luy avoint respondu quilz luy tiendront compaignie et ne le lesseront point celuy jour / Et que en (f° 114) chassant ledit sieur de La Hunaudaye et aultres ses gens estans en ung aultre quartier de ladite forest que nestoint lesdit sieur de Longle Bastart et du Breil ceulx Bastart et du Breil avoint tue ledit de Beaumanoir / Et que celuy Bastart luy avoit passe ung espieu au travers du corps / Et que devers le soir diceluy jour le cheval dudit sieur de Longle sestoit randu au brouyt d'aultres chevaux qui estoit en ladite forest / Et que le landemain celuy sieur de Longle avoit este trouve mort en ladite forest en une touche de boays hors du chemyn / Dit aussi ce tesmoign quil ouyt dire audit sieur de Barrach que celuy sieur de Barrach avoit ouy dire ce declera point a qui que les gens serviteurs dudit sieur de Longle avoint dit audit sieur de Longle que nentreprint point avec ses paillarts et quel ny pavoit riens gagner sans delcerer de qui / Et que par plusieurs foiz ilz avoint eu debat ensemble de paravant celuy jour / Et est son record, ainsy signe J. de Rompieres Da. Miffseut.

⁴ Aumonerie du Roset à Plessé (Loire-Atlantique).

⁵ La seigneurie de Barrach appartient aux Tournemine. Pierre Tournemine, seigneur de Barrach, est l'oncle du seigneur de La Hunaudaye, François Tournemine et a été son curateur à la mort de son père.

⁶ Il s'agit ici de Jean Eder Beaumanoir, seigneur de Longle.

Du quiziesme jour de decembre audit an mill IIII^{cs} IIII^{xx} et seix

(f°115) Jehan de la Pronsonniere sieur de Brouere eaigé de trante cinq ans auditionnez que il dit tesmoign jure dire voir examine et enquis respondre par son serment que troys ou autre ans a ung jour dont il nest membre, il estant ou bourgc de Syon ou quil estoit paroillement ung nomme missire Loys du quel sceut le sournom / mes est [personne] du sieur de La Hunaudaye / il ouyt dire audit missire Loys en plant des chiens que qui estoit venuz de la Beraudiere audit sieur de La Hunaudaye que la dame de La Beraudiere estoit mariee mes que tout le monde estoit pas contant et quil ne failloit que ung bon filz du putain pour en fer la despeche sans aultres parolles dire ne de qui il la tenoit ne pour quelle cause il dist lesdites parolles / Et pour ce que ce tesmoign veut que ledit missire Lys estoit ung peu embeu ne luy demanda la declaracion desdites parolles / Et ne parla plus de la matiere avecques luy / Et est son record ainsy seigne J. de Rompieres Da. Miffeut.

Du lundy XVIII^{me} jour de decembre lan mill IIII^{cs} IIII^{xx} et seix

(f°116) Yvonnet Jolis du bourgc de Quinin et du [Moisher] eaigé de vingt ung an auditionné que il dit tesmoigner jurer dire voir examine et enquis respondre par son serment que ung peu avant la Toussains deroine passer a ung jour de jeudy aultrement ne savoit declerez le jour le moys ne sepmaine ce tesmoign estant en la meson de La Beraudiere en Angou en laquelle il demourast lors avecques deffunct Jehan Eder sieur de Beaumanoir et sa compaigne dame dudit lieu de La Beraudiere veut armez environ leure de disnez en ladite meson de La Beraudiere le sieur de La Hunaudaye le sieur de Syon et le sieur du Hommet freres et avecques eulx plusieurs de leurs gens les noms desquelz que ce tesmoign dit congnoistre sont nommez cy apres / Savoir des gens dudit sieur de La Hunaudaye ung nommé Moussaye mestre dostel dudit sieur, ung nommé Mahé son homme de chambre, ung nommé Vincent son taulleur, ung nommé Guillaume, bastart de La Hunaudaye, ung nommé Nogent escuier de cuysine, ung nommé [...] mestre queu dudit sieur, ung nommé Jacques Bendre et ung nommé Petit Allain pallefrenier dudit sieur ; avec ledit sieur de Syon ung nommé Collint et lautre nomme Billon / Et avecques ledit sieur du Hommet, François de la Damer, Robert tailleur dudit sieur, Guyon Rohon, ung nommé Johan paige, ung nomme Pierres le barbier pallefrenier / Et avecques ledit Guillaume bastart de La Hunaudaye [...] / Et audit lieu de La Beraudiere fust lesditz nommé en compaignie desditz (f° 117) sieur de Beaumanoir et de ladite dame de La Beraudiere par le temps dun moys sauff ung jours esquelz ilz furent en chemyn pour se retrouver a La Hunaudaye / Ainsy que ce apres ce tesmoign declera durant lequel temps que celuy sieur de La Hunaudaye et aultres de sa compaignie furent audit lieu de La Beraudiere ilz furent touz ensemble grande chere faisant marque de grant amour antre ensemble / allerent a la chasse et plusieurs desditz jours daunerent et firent plusieurs esbatz ainsy que gens de tel estat quilz estoit et font et que sentre ayment ou doivent sentre aymer ont accoustumé de faire ensemble / Et par aucuns diceulx jours ouyt ce tesmoign que ledit sieur de La Hunaudaye dist en plant dudit sieur de Beaumanoir en la presence de ladite dame : « Mon pere, je fuys venue devers vous affin que vous me aidez et que vous menez le commendement en ma meson je suys perdu car je suys embete nont mon bien sera perdu si vous ny menez remede, je veulz que vous prenez la charge de ma meson sil vous plaist et me veulx me commander par vous » / Et faisant celuy sieur de La Hunaudaye maniere en disant lesdites parolles destre fort couroussé / Et celle dame de La Beraudiere respondit : « Ne vous chaille [préoccuper] mon filz nous yron mon amy et moy et feron voz besognes et mectrons la police en votre maison et entre voz gens » / Et aussy dist en plant audit sieur de (f° 118) Beaumanoir : « Nous yrons, mon amy, affin que nous mectons la

police en la meson de mon filz » / Et celuy sieur de Beaumanoir respondiit : « Je le veulz Madame et mais il me faut aller a Longle et a La Haye et de la je me rendroy a vous » / Et celle dame dist lors : « Mon amy, si vous ny venez quant et moy je nyroit point » / Et celuy sieur de Beaumanoir respondiit : « Madame il me fault aller veoirs mes besognes / Et aussi jay a parler a Monseigneur le Mareschal⁷ que je trouveray a Nantes et de la je seroy aussi tost a La Hunaudaye que vous » / Et celle dame dist : « Mon amy, vous vendrez quant et moy ou je nyroit point » / Et lors celuy de Beaumanoir : « Et bien, je le veulx Madame » / Et rendirent eulx troys assemblément du jour quil devoit partir dudit lieu de La Beraudiere pour aller audit lieu de La Hunaudaye / Et assez pres deulx estoit partie des gens dudit sieur de La Hunaudaye qui pouront ouyr lesdites parolles / Savoir ung nommé Mahé, lautre nommé Vincent, lautre Guillaume Bastart de La Hunaudaye (f° 119) lautre nommé Moussaye, ung nommé Nogent, le sieur de Lavanture⁸ / Et aultres dont il nest a present souvenant quilz alloint et venoient par la chambre ou ilz estoit / Et [...] desfoiz quilz en parlerent ainsy que dit est quelle fit a la garderobe pres la salle de ladite meson de La Beraudiere y estoit lesditz sieur de Syon et du Hommet / Dit aussi que apres les dessus nommez avoit esté audit lieu de La Beraudiere par le temps dessus merche lesditz nommez lesditz sieur de Beaumanoir et sa compaignie ce tesmoign et aultres des gens dudit sieur de Beaumanoir a ung jour de salemady partirent dudit lieu de La Beraudiere pour allez touz ensemble audit lieu de La Hunaudaye et tindirent leur chemyn par chaucn jour jucques au jour de mardy ensuyvant / auquel jour ilz arriverent dudit lieu de La Hunaudaye a leur de disnez / auquel lieu ils trouverent la dame dudit lieu de La Hunaudaye⁹ qui grandement receu le dit seigneur de Beaumanoir et ladite dame de La Beraudiere sa compaignie et leur fist grande chere et grant receil et eulx touz ensemble firent (f°120) grant chere monstrans signes de grant amour en lun a lautre / Et le jedy ensuyvant devers le soir diserent ceulz sieur de La Hunaudaye et ses freres quil aimeroient aller le landemain a la chasse courrir ung sanglier disans audit sieur de Beaumanoir quil yroit avecques eulx dont celuy sieur de Beaumanoir fut comptant / Et le landemain qui estoit jour de vendredy ensuyvant devers le matin diceluy jour iceulz sieur de La Hunaudaye, de Syon, du Hommet et de Beaumanoir acompaignez de plusieurs de leurs gens entre lesquelz estoit Petit Jehan Bastart de La Hunaudaye et Jehan du Breil, allerent ensemble a la chasse pour courrir ung sanglier a la forest dudit lieu de La Hunaudaye / Et audit jour fut mis un petit sanglier en cours et fut prins / Et ce fait sen retournerent audit lieu de La Hunaudaye / Et devers le soir diceluy jour parlerent ensemble daller encore le lendemain a la chasse / Et deffait celuy landemain sen retourenent en ladite forest pour devers encore veoirs la chasse dun sanglier ce tesmoign et aultres (f° 121) des gens dun chacun en leur compaignie furent serche et queste de bestes / Et aussi ne trouverent riens sen retournerent / Et devers le soir diceluy salemady derechieff diserent ceulx de La Hunaudaye et ses freres audit de Beaumanoir quil aimeroit aller le landemain a la chasse aux lievres / disant celuy de La Hunaudaye audit seigneur de Beaumanoir quilz nyroit gueres loign / Et le landemain qui estoit le dymanche apres avoir ouy la messe disnerent lesditz sieurs davant nommez en la cuisine dudit lieu de La Hunaudaye / Et en disnant ouy ce tesmoign que ledit Jehan du Breil dist [...] que illecques estoit que ce tesmoign ne scavoit a present nommez que si ledit seigneur de Beaumanoir avoit le commendement de la meson de La Hunaudaye que celuy seigneur avoit dist quil luy bailleroit, quil mectroit dehors ledit du Breil et renvoyroit les bastars dudit lieu en France, que celuy de Beaumanoir avoit impesché ledit sieur de La Hunaudaye de aller devers le sieur de Laval avecques lequel celuy du Breil disoit quil devoit avoir une place darchez et que

⁷ Marechal de Rieux, Jean IV de Rieux.

⁸ Jean de Tréal, sieur de Lavanture, ancien gouverneur de François Tournemine, seigneur de La Hunaudaye.

⁹ Il s'agit de la première épouse de François Tournemine, Marguerite du Pont, avec laquelle il s'unit vers 1475.

a present moyen il lavoit perdue et en (**f°122**) disant lesdites parolles sembloit estre fort couroussé et feisait meniere de voulloir faire quelque oultraige / Et apres avoir disné audit lieu de La Hunaudaye sen allerent lesditz sires davant nommez ce tesmoign et aultres de leurs gens declerez cy davant, par les champs pour devoir trouver ung lievre / Et comme ilz alloint par les champs trouverent un homme de villaige qui dist ausditz sires quil avoit veu en passant par un lieu quil leur monstra de loign quatre ou cinq biches, sur lesquelles parolles celuy seigneur de La Hunaudaye dist quil aimeroit y allez deffait se miserent touz au chemyn a y allez / Et quand ilz furent pres iceluy lieu ceulx qui gardit les chiens descomptèrent et fut trouvé une biche laquelle fut mise en cours et prinse / Et ce fait diserent quil aimeroit sen retourner et en retournant querir ung lievre et le courir que en retournant dist celuy sieur de La Hunaudaye que entre le lieu ou ilz estoit et le chasteau de La Hunaudaye ilz trouverent ung lievre se miserent a la queste du lievre/ Et nen fut point trouvé et se rendirent audit lieu de La Hunaudaye (**f°123**) et devers le soir diceluy jour durant le souper et apres soupper parlerent encore ledit sieur de La Hunaudaye, du Hommet et de Syon de allez le lendemain a la chasse aux sangliers / Et demendast audit de Beaumanoir sil yroit / Et celuy de Beaumanoir respondi quil estoit contant / commandirent ensemble dy aller. Et deffait le lendemain qui estoit le lundy sen allerent lesditz sires ce tesmoign et aultres de leurs gens entre lesquelz estoit les davant nommez / Et paravant partir commandirent quilz se rendirent aux Fossees Blancs¹⁰ quelx lieux sont en ung endroit de ladite forest et que ceulx qui yroint pour faire la visee se rendroint audistz fossees pour faire le rapport et touz ensemble sen allerent droit en ladite forest / avoit ce plan sesditz chiens courans en une lesse et le bastart de Beraudiere et ung nommé Jehan Rouxel troys levriers appartenant audit sieur de Beaumanoir / entrerent ensemble en ladite forest ce tesmoign suyvant ledit de Beaumanoir / Et en chemynant se escarterent et sen allerent lesditz sires du Hommet et de Syon en ladite forest / Et (**f° 124**) ceulx seigneurs de La Hunaudaye et de Beaumanoir se tindirent ensemble / et pres deulx estoit lesditz Petit Jehan Bastart et du Breil / Et en ung endroit dist celuy sieur de La Hunaudaye a ce tesmoign quil demourast en ung lieu quil luy monstra / par deux foyz riterées le luy dist ce que ce tesmoign ne voullait faire pour faire que les chiens que ce tesmoign avoit estoit audit sieur de Beaumanoir / Et pour ce que a la seconde foiz ce tesmoign ne voullut faire ce que celuy seigneur de La Hunaudaye luy avoit dit celuy sieur de La Hunaudaye dist encore en rudes parolles qui demourast / Et dist audit seigneur de Beaumanoir : « Mon pere, faites le demourez » / Dist celuy sieur de Beaumanoir a ce tesmoign que demourast et que quant il voiroit que le sanglier seroit en cours quil mist de ses chiens acourir de ceulx que ce tesmoign congnoissat qui estoit les meilleurs pour beste noire / Et tantost apres ung nommé Olivier de La Brosse qui estoit a present se rendit ausditz seigneurs de La Hunaudaye et de Beaumanoir qui estoit dedans ladite forest / Et leur dist que ledit sieur de Syon avoit trouvé deux grans sangliers en ung lieu de ladite forest quil declera (**f° 125**) mes nen est ce tesmoign a present souvenant / Sur quoy celuy seigneur de La Hunaudaye donna des esperons a son cheval, disant audit sieur de Beaumanoir : « Allons »/ Et lors ~~celuy~~ dist celuy du Breil en plant audit sieur de La Hunaudaye qui tenoit ung espieu en sa main, nous dist : « Baillez moy cest espieu car sil vient jen auray aujourduy leschine » / Et celuy sieur de La Hunaudaye respondi : « Pances tu que je ne soy homme a le tuer aussi bien que toy ? » / Et celuy du Breil dist encore : « Monsieur, baillez le moy jen auroy a myt leschine » / Et celuy sire luy dist : « Prenez celuy [de Camel, nom d'un personnage] que veez la car vous naurez point le mien » / Et deffait celuy du Breil prit lespie

¹⁰ « Fossees/fossé blancs » renvoyant certainement à un espace défriché de la forêt de La Hunaudaye dont l'emplacement pourrait se situer en contrebas de la position en hauteur du Bois et de la Roche Guihallon proche de Trégomar.

que celui [Camel] tenoit et sen allerent assemblement droit aux Fosseiz Blancs, et audit lieu parlerent ceulz sieurs de La Hunaudaye, de Beaumanoir et aultres de leurs gens cy davant nommez de courir ausditz sangliers disant celui seigneur de Beaumanoir quil estoit tant pour celle heure et que lon ne pouvoit pas retrouver les chiens quil ne feust nuyt / Et celui sieur de La Hunaudaye respondit quil ne pouvoit challoir que ilz estoient pas (**f°126**) loign de la meson / et que les chiens se y rendirent bien / et sur tant se miserent a partir diceulz en ranc en cours et les aultres a la hué et se despartirent densemble et fist celui seigneur de Beaumanoir demourer a ce tesmoign o ses chiens en ung endroit et sen alla dedans ladite forest en la traversant / et apres luy allerent lesditz du Breil et Petit Jehan Bastart et ung nostre parlant serviteur dudit sieur de La Hunaudaye et estoit environ deux heures a pres medy et ung quart de heure apres avoir ouyt ce tesmoign ledit sieur de La Hunaudaye crier et lentendit bien neantmoins quil estoit loign de luy pour tant quil congnoissoit se son / Et tout incontinent a pres des aultres crierent et aultres huerent feisant un grant cry et grant bruyt plus grant que ce tesmoign avoit oncques bien faire pour chasse de sanglier / Et aussi ne veut ce tesmoign et neut congnoissance que a la chasse des sengliers on fist hué ne sonnerie de cor se non entendit [...] et veut la beste, il doibt [...] veue et prins a pres la chasse ce que ce fut fait (**f° 127**) seullement fut [...] chasse et tellement arriverent et huerent que lon neust pas ouy le cry dun homme dun guet deappant/ Et en feisant celui cry pasa parle cours audvant de ce tesmoign ung petit porchut apres lequel le tesmoign mist quatre de ses chiens ainsy que ledit sieur de Beaumanoir luy avoit commandé / Quel porchut demoura en ladite forest / Et furent bien une heure environ a faire celle crys et acorner / Et apres ce et tout incontinent ouyt ledit seigneur de La Hunaudaye resoner de retraicte / Et ce fait sen alla ce tesmoign querir ses chiens et les prendre pour les amenez a La Hunaudaye / Et deffait les prins et les y mena / Et audit lieu trouva lesditz seigneurs de Syon et les aultres dessus nommez sauff lesditz sieur de La Hunaudaye, du Hommet et de Beaumanoir ledit du Breil et ledit Petit Jehan Bastart et y asonnerent lesditz sieurs de La Hunaudaye et du Hommet deux heures apres nuyt fuiante / Et en leur compagnie estoit ledit sieur de Lavanture qui navoit point esté a la chasse / Et noyt ce tesmoign quilz allerent le querir / Et par avant quilz asonassent demanda ce tesmoign ausditz bastart de Beaumanoir (**f° 128**) et Rouxel ou estoit ledit seigneur de Beaumanoir et ou ilz lavoit lessé / Et ilz respondirent quil estoit avecques lesditz sires de La Hunaudaye et du Hommet qui n'estant pas encor venuz et quilz estoient touz ensemble / Se rendirent lesditz seigneurs de La Hunaudaye, du Hommet et de Lavanture en ladite meson de La Hunaudaye et se miserent en une garde robe se enfermerent dedans tellement quil ny entroit personne / Et tantost apres sort celui seigneur de Lavanture a ladite chambre nen sortant celui bastart de Beaumanoir luy demanda ou il alloit / Et celui seigneur de Lavanture luy respondist en basse voieix quil alloit devers la dame de La Beraudiere luy dire que son mary estoit mort et lors celui bastart se sorta / Et ce fait sen alla ledit seigneur de Lavanture en la chambre ou estoit ladite dame / Et notamment que ce tesmoign eust ouy lesdites parolles que celui sieur de Lavanture avoit dit demanda audit bastart qui i estoit / Et celui bastart respondit que ledit sieur de Beaumanoir estoit mort / Et tantost apres veut ce tesmoign alumer une torche a laquelle lesditz sieurs de La Hunaudaye, du Hommet et de Syon furent conduitz dicelle (**f°129**) garde robe jucques en la chambre ou ladite dame estoit / Et lors ouyt dire comment entre les gens de la meson que lesditz sieurs estoient allez devers ladite dame luy dire que ledit de Beaumanoir son mary estoit mort et quilz pleuroint touz en la chambre / Et tantost apres ouyt dire ce tesmoign que ledit sieur de La Hunaudaye en montant a la chambre de ladite dame ~~dist a ung homme~~ dist a ung nommé Nogent quil allast dire a la justice de Lamballe que ledit seigneur de Beaumanoir estoit mort et quil avoit esté tué en la forest / Aussi demanda a ung nommé Berthlemer aller le lendemain matin en ladite forest ce tesmoign et ledit bastart de Beaumanoir en sa compagnie

des le point du jour et se rendirent au lieu ou avoit esté assis le cours et le descompte des chiens ou dedans la forest et a distance du lieu ou ce tesmoign avoit esté assigné pour tenir ses chiens dun grant traict darc environ trouverent le corps dudit de Beaumanoir et pres diceluy corps distance dun giet de [pallet] veut ce tesmoign en lendroit ou avoit esté celuy cours assis grande habondance de sangc (**f°130**) sur la terre apar essoit que ~~le lieu ou il fut trouve~~ le corps avoit esté trayné du lieu ou estoit le sangc juc au lieu ou il fut trouvé / et estoit bleu par le visaige savoir ung coup sur le nez a travers lautre marchouere / ung aultre en la teste se rendant sur loeil lautre au coste destre lautre au flanc / lautre en la [mamelles] / lautre en lautre cousté en lautre mamelle lautre en lestomac deux aultres ou braz destre et iceluy bras rompu ung peu plus bas que les paulne, lautre en les paulne destre par deroin, ung aultre en les paulne gausche / Et par aultant que ce tesmoign veut lesdiz corps dit ce tesmoign que ceulx du corps et des bras furent de lestoc dun espieu / iceulx du visaige de taille daultre ferement que dun espieu / Et quant ilz leurent trouvé retourna ce tesmoign audit lieu de La Hunaudaye pour devoir dire et signiffiez quil avoit esté trouvé / Et comme il y alloit rencontra sur le chemyn lesditz seigneurs de La Hunaudaye, du Hommet et de Syon et aultres des gens de la meson / Auxquelz ce tesmoign dist que celuy de Beaumanoir avoit esté trouvé, sur quoy celuy sieur de Syon retourna (**f° 131**) tout incontinent audit lieu de La Hunaudaye et les aultres sen allerent ou estoit le corps et paraillement ce tesmoign le regarderent et puis sen allerent en la meson dun des forestiers dudit lieu de La Hunaudaye nommé Thomas Le Bourdaz en actendant les gens de la justice de Lamballe a leur quilz y arriverent environ le[ur] de vespres diceluy jour entre lesquelz estoit le procureur dudit lieu de Lamballe et les aultres ne les cognoest veurent et visiterent le corps dudit deffunct en la presence dudit seigneur de La Hunaudaye / Et ce fait sen allerent / Et fut le corps porté des celle heure en leglise de Saint Aulbin¹¹ a distance de La Hunaudaye dune lieue environ et par le commandement meismes dudit seigneur de La Hunaudaye / Interrogé si deparavant les jours quil a decleré cy devant lesditz du Breil et Petit Jehan Bastart avoit acoustumé de aller a la chasse quant le dit sieur de La Hunaudaye ou des gens de la maison y alloint dit que celuy Bastart aucunefoiz y alloit et les oncques ny avoit veu aller celuy du Breil jucques aceulz jours / Jaczoit que ce tesmoign y eust este par plusieurs foiz tant audit lieu de La Hunaudaye que a La Beraudiere en la compagnie desditz sieurs et de chacun / Et aussi ne avoit oncques veu ce tesmoign deparavant celuy jour que ceulz Bastart et du Breil beussent ne (**f°132**) mengeassent au plat et a la table desditz sieurs ce de lun deulz / Ainsy quilz firent celuy jour mes dit que celuy jour ilz beurent et mangerent au plat desditz sieurs du Hommet et de Syon que disnerent en ladite forest / Et ce pavoit lon contantes de boire lesditz du Breil et Petit Jehan Bastart / Interrogé si par autre foiz ilz avoit point veu que lesditz sieurs allassent ainsy souvent a la chasse comme ilz firent a celle foiz, dit que non puyt que quant ilz y avoit esté ung jour quilz se repousoint deux ou troys jours / Interrogé si celuy de La Hunaudaye monstroist estre desplesant de la mort dudit de Beaumanoir / Dit que quant il estoit davant les gens dudit de Beaumanoir il feisoit morte chere mes ouyt dire ce tesmoign deux ou troys jours apres la mort a ung nommé Allain porteur de boays en ladite meson que celuy seigneur de La Hunaudaye avoit dit : « Nous ferons encore bonne chere, nous avons tout » / Et est son record / Ainsy signé J. de Rompierres Da. Miffeut quilz [...] et ung autre paroillement [...]

¹¹ Il s'agit de l'abbaye cistercienne de Saint-Aubin-des-Bois implantée dans la forêt de La Hunaudaye proche du château.

Du mardy dixneufiesme jour de decembre audit an mil quatre centz quatre vingt seix.

Pierres de la Marre procureur de la court de La Hunaudaye eaigé de quarante ans audtionnez que il dit tesmoigner jurer dire voir examiné et enquis recorde par son serment que a ung jour de mardy puix la Toussains aultrement ne savoit declerez le temps il estant en la ville de Lamballe a la deluivrance des causes ordonnances que se de la court celuy jour veut asoner ung homme que lon appelloit le bastart de La Haye et Guillaume Boterel devers les gens de la justice dudit lieu / Et leur diserent que le jour precedent qui estoit le lundy le sieur de Beaumanoir avoit esté tué en la forest de La Hunaudaye et que le sieur de La Hunaudaye les envoit querir pour aller veoirs celuy seigneur de Beaumanoir en la maniere comme il avoit esté / Sur lesquelles parolles furent lesdites causes recuees jucques au lendemain et fut commandé a ung chacun y aller / Et a celle ocasion y eut grande esmocion en la ville et disoient les aucuns que se estoit ledit seigneur de La Hunaudaye qui avoit esté tué en ladite forest fut la cloche sonne [...] (f° 134) nombre de gens tant de la justice que aultres assemblez diceluy lieu sen allerent en ladite forest de La Hunaudaye et ce tesmoign en leur compaignie entre lesquels gens de justice estoit le procureur de Lamballe / Et en y allant estoient bien quarante ou cinquante chevaulx / Et remonsterent en une lande pres ladite forest ledit sieur de La Hunaudaye que chevauchoit droit ausditz gens / Et quant il fut pres deulx dist audit procureur et aultres gens que ledit sieur de Beaumanoir avoit esté tué en la forest et quil aimeroit que lesditz gens de justice veissent le corps qui encor estoit en ladite forest ou lieu ou il avoit esté trouvé gisant que des le matin bien matin il avoit fait fere la serche par ladite forest pour savoir ou il estoit / Et en plant ainsy ensemble sen allerent au lieu ou estoit le corps dudit de Beaumanoir / fut celuy corps veu et visité en la presance dudit sieur de la Hunaudaye et desditz gens de justice et fut trouvé quil avoit grandes playes au corps savoir une au cousté senestre deux en la poitrine et une aultre en lestomac / Et aussi fut trouvé quil en avoit deulx environ la teste / Savoir une au visaige et laultre en (f°135) la teste se rendant sur une sourcille et lors dist celuy sieur de La Hunaudaye que lavoit fait venir des religieux de labbaye de Saint Aubbin pres ledit lieu de La Hunaudaye pour le corps dudit de Beaumanoir emporter et le mectre en terre en leglise de Saint Aubbin dudit lieu ou il disoit lune des dalmes dudit lieu de La Hunaudaye quelle il appela Constance de Bretagne¹² avoit esté en sepulturee / Et apres ladite visee ainsy faicte sen retournerent lesditz gens de justice ce tesmoign et aultres que estoient allez dudit lieu de Lamballe en ladite ville de Lamballe ne fist ce tesmoign pour ce que lesdites causes ordinaires avoint esté recueuees jucques au lendemain et que a la delivrance dicelle il amenoit que ce tesmoign que y avoit a besongner y fust / Et dempuix ceulx jour de mardy ne veut ce tesmoign le dit seigneur de La Hunaudaye jucques au jeudy et vendredi ensuivant que ce tesmoign de sa [commission] et pour ce que lesditz gens de justice y retournerent pour fere lenqueste dudit cas et retourna pour audtitionnez des tesmoins ausditz gens de justice pour tant que le cas avoit esté commis en la juridiction de La Hunaudaye ce tesmoign est procureur duquel lieu ce tesmoign trouva envoyé ledit sieur de La Hunaudaye (f° 136) ses gens et parlerent celuy sieur de La Hunaudaye et ce tesmoign des choses dont ilz avoint a besongner touchant ledit cas de ce qui estoit affaire / Et devers le soir diceluy vendredy ou le sabmady ensuivant devers le matin nept menbré le quel, ledit sieur de La Hunaudaye et sa mere diserent

¹² Le passage renvoie ici à l'hypothétique mariage de Guillaume Tournemine (premier de la lignée) et Constance, duchesse de Bretagne au XII^e siècle. Il s'agit d'une légende filiale qui vise à inscrire les Tournemine dans un passé illustre tout en justifiant la position acquise dans le duché en cette fin XV^e siècle (titre de baron en 1487).

a ce plant quil aimeroit quil allast ou envoiast des gens de la justice de Lamballe a Lentreguier¹³ ou lon disoit que Petit Jehan Bastart de La Hunaudaye et Jehan du Breil qui avoient fait le meuctre estoit pour savoir quelle confession ilz avoit fait audit lieu et l'apporter prestement es gens de la justice de Lamballe pour savoir si lon les pouvoit prendre en celuy lieu dont ce plant fut contant et leur acorda quil yroit et luy fist celle dame bailler par son maistre dostel nommé Pierres de Champran quatorze pieces dor pour y aller ou envoyer / Et aussi pour besongner au formulaire des enquestes / Et diceluy lieu de La Hunaudaye sen alla ce tesmoign en sa meson celuy jour de sabmady et y coucha / Et le dymanche ensuivant monta ce plant a cheval pour aller audit lieu de Lantreguier passa par ladite ville de Lamballe et parta le lendemain dudit lieu / luy dist la charge susdit que lesditz sieur et dame luy avoient baillé / Et demanda sil (f° 137) [envoieroit] a Lentreguier / lequel dist que mieux valloit que ce plant allast veoirs audit lieu de Lentreguier si lesditz Bastart et du Breil y estoient et sil les y trouvoit que le mandast audit lieutenant / Et que incontinent il y roit dont ce tesmoign fut contant / Et a celle henor baille ce tesmoign desditz quatorze escuz audit lieutenant pour lesdites enquestes et [...] seix escuz et dix sept blancs pour la despance quilz avoient fait le jour que lesditz gens de justice avoient esté a La Hunaudaye a faire lesdites enquestes et [...] en a fait sa despance en partie et aultres partie la encore / Et audit lieu de Lentreguier ce tesmoign arriva le lundy au soir et trouva Thomas Hanleuer prevost dudit lieu qui vouloit monter a cheval et aller hors / parla ce tesmoign audit prevost et le fist demourer pour celuy soir audit lieu de Lentreguier et soupperent ensemble et parlerent ensemble dudit cas et des gens que lon disoit que l'avoit fait. Et aultre furent present le lieutenant dudit prevost Jouhan le Forestier ung nommé Lezmant greffier dudit lieu Vincent [...] autrefois receveur [...] quels et chacun diserent a ce plant que Jehan Bastart de La Hunaudaye et Jehan du Breil sestoient renduz audit lieu de Lantreguier (f° 138) et avoit confessé l'avoit fait mes que dempuis le vendredy precedant ilz ne les avoient veuz disans que lesditz Bastart et du Breil sen estoient allez / Et que aucuns disoient quilz avoient veu ung petit vesseau en la mer et que lesditz Bastart et du Breil sestoient mis dedans et sen estoient allez en Angleterre ou en Flandres / Et lors ce plant pria et resqueste les dessus nommez de luy baillé ou faire bailler par escript et quilz avoient confessé audit lieu de Lantreguier touchant celuy meuctre dont ilz furent auteurs / Et deffait celuy lieutenant monstra audit prevost ce que en avoit esté escript et puis le baille e ce parlant et l'appartaz avecques luy et encore la mais en a bailler ung double aux greffiers de Lamballe et iceluy escript fut leu par ce maistre Allain Lerard estant a La Hunaudaye en la presance de la ladite dame / Interrogé sil avoit point eu decharge de parler audit Bastart et du Breil sil les eust trouvez audit lieu / Dit que non mes avoit bien charge dy faire parler les gens de justice dudit lieu pour savoir la verite dudit cas et sil y en avoit daultres participans / Interrogé sil a point eu de congnoissance quil y eust hayne entre ledit seigneur de La Hunaudaye et ses freres ou leurs gens et ledit de Beaumenoir (f° 139) Dit que au comancement que celuy de Beaumenoir fut marié a ladite dame il ouyt bien dire en la meson dudit seigneur de La Hunaudaye entre les gens y demourans que les freres dudit seigneur nen estoient contans et que a celle ocasion il et plusieurs des gens de ladite meson [...] a point ouy parler / Aussi dit que dempuis ledit cas avenu il a ouy dire aupres des gens de la meson de La Hunaudaye que le dymanche precedant ledit meuctre celuy de Beaumenoir avoit noyseye avecques aucuns des serviteurs de la maison / Et aussi avoit impescher ledit sieur de La Hunaudaye de aller en Nantes avecques le sieur de Laval laquelle il perdoit par celuy moyen / Et a celle ocasion celuy du Breil avoit compseu hayne envers le dit de Beaumenoir / Interrogé si les gens de la meson de La Hunaudaye ont point reffuser l'entree dicelle aux parens dudit deffinct ou a aucun deulx dempuis le deceix avenu / Dit autre ouy dire (f° 140) a Guillaume

¹³ Il s'agit du Minihy (asile ecclésiastique) de Tréguier dans les Côtes-d'Armor.

Boterel escuier de cuysine que ung jour [...] Joachim Eder frere dudit deffunct avoit esté a La Hunaudaye et pour tant que le seigneur dudit lieu avoit deffendu au capitaine de non y lesser entrez nulz des gens dudit deffunct et quilz lavoint blasme devers le duc que lentrete luy avoit este reffusee / aulcunement ne le seut / Et est son record / Ainsy signe J. de Rompierres da Miffeut.

Jehan de Coesquen sieur de [La -paye] eaigé de trante troys ans auditionnez que il dit tesmoigner jurer dire voir examine et enquis record par son serment que des environ quinze ans deroins il eut congnoissance de feu Jehan Eder sieur en son vivant de Beaumanoir / Et des le temps dun moys a ouy ce tesmoign la veu audit chasteau de La Hunaudaye et y estant ladite dame de La Hunaudaye, le sieur dudit lieu et ses freres quels en celuy temps y faisoient (**f° 141**) bonne chere ensemble [...] jucques au lundy ensuyvant / Auquel jour de lundi devers le matin ce plant fut audit chasteau et y trouvé Jehan du Breil assis soubz le ballet¹⁴ pres de luys de la salle dudit chasteau le salua et sentre demandast de leurs nouvelles / Et ne feisoit pas grant chere comme il avoit de coustme et semble a ce tesmoign que celui du Breil avoit quelques chouse en desplaisir en son entendement / Ne luy demanda point ce tesmoign quil avoit / Et aussy ne le luy dist point ledit du Breil mes seulement demanda a ce tesmoign si avoit encore a desieuner quil dist que ouy / Et sur fait ledit du Breil mena ce tesmoign en ladite salle pour desieuner avecques Allain Bertelemer et les gens dudit sieur de Beaumanoir / mes alors quilz y arriverent lesditz nommez avoint desjuné et pour tant ledit du Breil mena ce tesmoign en la cuysine ou estoit lesditz sieurs de La Hunaudaye et de Beaumanoir a desjeuner / Et entra ce tesmoign en ladite cuysine / les salua, illecques le dit Beaumanoir demanda a ce plan des nouvelles et il desieunere dist quil la iroit veoirs et apres ce ledit sieur dist a ce plant quil yroit a la chasse ce plant respondit quil nyroit point celuy jour (**f° 142**) de la mort et meurtre avenu en la personne dudi de Beaumanoir, nen seut riens a certain mes a ouy dire tout notoirement que ledit Jehan du Breil et Petit Jehan Bastart de La Hunaudaye avoint perpetué ledit meurtre et que a celle cause estoit et sont futiffs et nestoient ne sont venuz oudit château que avoint de acostume / Interosgé si james il a veu ne sceu quil y eust debat ne question entre ledit sieur de La Hunaudaye ses freres et ledit de Beaumanoir dit que non, ayns dit quil a ouy dire audit sieur dempuix ledit meurtre et deceix dudit de Beaumanoir quil avoit baillé a celui de Beaumanoir la charge de commendement de toute la police de sa meson et monstroit par ses manieres estre fort couroussé dont celui de Beaumanoir avoit esté ainsy tué et meutry / Interosgé sil seut ne veut james que il y eust debat parolles ne menaces entre ledit de Beaumanoir et ledit du Breil et Petit Jehan Bastart ne aultres gens de ladite meson de La Hunaudaye dit que non / Interosgé si autre foiz paravant ledit meurtre il a point esté a la chasse avecques ledit sieur de La Hunaudaye et si celui du Breil y avoit esté esfoiz que ce plant y a este / Dit que par plusieurs foiz et devers jours quil ne savoit a present declerez il a esté a la chasse en la compaignie dudit (**f° 143**) sieur de La Hunaudaye mes la pluspart des foiz quil y a este ya veu ce plant le dit du Breil / Et acostume celui du Breil a y aller / Et est son record Ainsy signe J. de Rompierres da Miffeut.

Guillaume Guehault [...] lun des veneurs dudit sieur de La Hunaudaye eaigé de soixante ans auditionnez que il dit tesmoigner jurer dire voir examine et enquis respondre par son serment que mardy derroin eut trois sepmaines environ arriverent audit chasteau lesditz deffunct ladite dame et plusieurs aultres de leurs gens / et le sabmady ensuyvant furent a la chasse en la

¹⁴ Dans le dictionnaire du Moyen Français (1330-1500) à l'entrée BALET : « *galerie couverte par un toit en saillie ; petit auvent* ».

forest de La Hunaudaye / y fut ce tesmoign et aultres de leurs gens entre lesquels estoient lesditz petit Jehan Bastart de La Hunaudaye et Jehan du Breil et Thomas le Bourdaz et y fut prins ung sanglier qui fut porté audit lieu de La Hunaudaye / Diceluy lieu fut encore au nom dudit de Beaumenoir au servir de se peaulx ne seut a quelle [heure] ilz furent celuy jour a la chasse pour ce que deparavant celle (f° 144) heure nen avoit ouy parler / Et devers le soir diceluy jour parlerent encor de aller a la chasse le landemain / Et luy semble que lesditz sieurs demandast audit de Beaumenoir sil yroit / et quel respondist quil en estoit contant / Et le landemain qui estoit le dymanche apres que lesditz sires eurent ouyr la messe et desjuné audit lieu de La Hunaudaye monterent a cheval et sen allerent ainsy quilz disoient a la chasse et davant eulx estoient plusieurs de leurs gens et ny alla point ce plant et preindrent une beste fauve / la veut ce tesmoign audit lieu de La Hunaudaye et y fut mengee / parlerent encore lesditz sieurs de La Hunaudaye, du Hommet et de Syon de aller le landemain a la chasse aux sangliers et eulx et ledit de Beaumenoir commandirent quilz yroit / et le landemain au matin qui estoit le lundy ensuyvant ouyt dire que ledit seigneur de Syon estoit aller a la visee / Et tant tost apres partirent lesditz sieurs de La Hunaudaye et de Beaumenoir dudit chasteau disans aller pour deux sanglier que lon leur avoit rapporté estre en ladite forest au cartier du Boays escongnes devers La Hisaudraye et vindirent autres leurs gens que illecques estoit [...] ce tesmoign estoit lun se y rendre et que tout [...] ilz rendissent aux Fossez Blancs ou lon devoit faire le rapport de la visee / ce que ce plant et les autres (f° 145) firent et se rendirent en ung aultre cartier appellé Ladre es potz pour illecques faire les descompte et hue sur lesdites bestes ainsy que lesditz sires leur commanderent / Et au depart de lassemblee ledit deffunct entra en ung quartier de ladite forest et a pres luy entrerent par celuy endroit lesditz petit Jehan Bastart et du Breil demandant celuy de Beaumenoir audit du Breil sil tueroit bien le sanglier / Et celuy du Breil respondist que ouy. Et eulx troys seulz sen allerent en ladite forest / ne seut ce tesmoign quelle part et estoient lesditz du Breil et Petit Jehan apré ayans chacun son espie en la main / Et estoit ledit deffunct a cheval sur ung cheval boyant [...] oreilles et avoit une espee au cousté. Et oncques pour leur entré en icelle forest ne les veut ce plant pour celuy jour / Et incontinant apres ladite entree asonnerent et huerent et furent par le temps dune heure environ en ladite forest sans cesser les ungs de sonnez et les aultres de huer / Et apres ainsy sonné et hué par longs temps ouyt ce tesmoign que celuy sieur de La Hunaudaye et sembloit estre bien loign du lieu ou estoit ce tesmoign acoura apparavant [...] Thomas Le Bourdaz que le dit sieur avoit appelé et dist quil aimeroit (f° 146) y aller et deffait se y en allerent et aussi les aultres qui estoient de la hué et trouverent ledit sieur a lun des bourgc de ladite forest devers Tregormar¹⁵ / Et eulx y asonner dist celuy sieur de La Hunaudaye qui avoit envoyer querir du vin ainsy quil demandast a Tregomar quil aimeneroit boire / Et deffait ce tesmoign et les aultres que illecques estoient entre lesquelz estoient lesditz sieur du Hommet et de Syon venirent. Et apres autre veu dist celuy sieur quil estoit fait quil aimeroit sen aller et prins chemin a sen aller droit audit lieu de La Hunaudaye et passa par la meson dudit Bourdaz et ce tesmoign se rendit en sa meson quil a dit estre en ladite forest et ledit lieu de La Hunaudaye / Et de celle heure en plus longc ne veut lesditz sieurs de La Hunaudaye, du Hommet et de Syon ne aultres qui avoient esté a ladite chasse et combien que ce tesmoign retourna ung peu apres audit lieu de La Hunaudaye pour avoir du pain quel y print et en emporta avecques luy ne veut point lesditz sires ne aultres gens de ladite meson / Et ne parla a personne fors au portier et bouteiller auquel bouteiller demanda ce tesmoign le pain quil a print / Et lors estoient lesditz sires encore armez en ladite meson / Et celuy jour la vespree (f° 147) se rendit audit chasteau et apres luy et ung pou apres volee de becasses passee se y rendit ledit sieur et luy y avoit demander si ledit seigneur de Beaumenoir estoit venu et il

¹⁵ Trégomar à l'ouest de la forêt de La Hunaudaye.

luy fut respondu que non / demanda aussi qui estoit encore a venir / et il luy fut dit que lesditz du Breil et Petit Jehan estoient encore a arriver / Et sur tant sen alla en une chambre dudit chasteau ou il a costume se desabiller / Et aultre chose ne ouyt dire pour celuy soir / Et dit que le lendemain qui estoit le mardy il veut les serviteurs aller par la forest disans que le sieur de Beaumanoir estoit des le soir devant demoura en ladite forest / Et quilz alloint le sercher / Et a celle ocasion y alla ce tesmoign qui est lun desditz serviteurs et se rendirent touz assemblement au lieu ou ce tesmoign avoit este assigné et mis pour estre a la hué et de la decallerent un pou plus bas ainsy que ce tesmoign avoit veu ledit deffunct et lesditz Petit Jehan Bastart et du Breil allez ensemble que est a distance diceluy ou avoit esté ce tesmoign assis dun traict darc environ / Et illecques veurent le corps dudit deffunct et quatre religieux de lordre de labaye de (f° 148) Sainct Aubbin que le gardoint demoura ce tesmoign en celuy lieu / Et tout incontinant apres y arriverent ledit sieur de La Hunaudaye et ses freres et les gens de la justice de Lamballe entre lesquelz estoit le procureur quelz firent despouillez et visiter le corps dudit deffunct par ung barbier que illecques estoit duquel ne tesmoign ce le seut le nom mes dit quil est de la ville de Lamballe / Et luy trouva ainsy quil dist traize playes mortelles fut emporté a ladite abbaye / lesditz sieurs lesditz gens de justice et autres gens lallerent conduire feisans mander iceulx sieurs et monstrans grans signes den estre fort desplaisans / Interogé si james il avoit veu debat ne parolles remonstrances entre ledit deffunct et ledit du Breil et Petit Jehan et sil avoit point congneu quil y eust hayne [...] entereulx dit que non / Interogé sil eut oncques cognoissance par ouir ou aumtremment que lesditz sieurs de La Hunaudaye du Hommet et de Syon ne aultres de leurs gens eussent hayne que ledit de Beaumanoir / ne si james il fut present que aucun le menassast en prendre a la seurté de luy / Dit que non dont a present (f° 149) il soit membré / Et respondit que on dit tout notoirement que lesditz du Breil et Petit Jehan Bastart ont tué et mis a mort le dit deffunct / Et a ouyt ce tesmoign que ainsy est pour tant que oncques puis la mort dudit deffunct les dictz du Breil et Petit Jehan ne se sont renduz audit chasteau ainsy qui avoit acoustumé / Et est son record ainsy signe J. de Rompierres Da Miffeut.

(f° 149) Thomas Le Bourdaz eaigé de quarante cinq ans audtionnez que il dit tesmoign jure dire voir examine et enquis respondre par son serment que ung moys a ouy a ung jour de mardy aultrement ne savoit declerez le jour il veut arrivez en la meson et chasteau de La Hunaudaye ladite dame du Hommet et le sieur de Beaumanoir son mary avecques lesquelz avoint esté deparavant lesditz sieurs de La Hunaudaye du Hommet et de Syon enffans de ladite dame par (f° 150) long temps et se y estoient esbatuz ainsy que ce tesmoign avoit ouy dire / Et lors de larrivee desditz de Beaumanoir et dame, du Hommet quelle fut environ mydy diceluy jour de mardy ouyt dire ce tesmoign commenda entre les gens de ladite meson que lesditz sieurs de Beaumanoir et dame du Hommet sa femme estoient allez en ladite meson de La Hunaudaye pour y demourez [...] / Et icelle venue fut fait grant chere en ladite meson tant celuy jour que troys ou quatre jours apres. Et allerent lesditz sieurs a la chasse par chacun diceulx jours comme semble a ce tesmoign chanterent danserent et firent plusieurs esbatz monstrans par les signes et manieres quilz fesoient avoir grant amour et dilection ensemble / Et oncques ne sceut ne congneut ce tesmoign que entre eulx y eust hayne ne inimitié en aucune maniere / Et dit que le dymanche eusst celuy mardy ce tesmoign estant dudit lieu de La Hunaudaye ouyt que ledit sieur de La Hunaudaye du Hommet et de Syon diserent que le landemain ilz yroint a la chasse aux sengliers en la forest dudit lieu de La Hunaudaye et que ledit sieur de Beaumanoir yroit avecques eulx dont celuy de Beaumanoir dist estre contant / Et lors dist celuy sieur de Syon (f° 151) quil avoit le landemain faire la visee des le bien matin / Et la diserent que le raport sen feroit aux Fossees Blancs quilz se y rendirent touz / Et celuy lendemain qui estoit le lundy ledit sieur de Sion mena ce tesmoign avecques luy en ladite forest pour faire ladite visee / Et lors

ouyt dire a des gens de ladite meson nest membré a qui que en ung aultre cartier dicelle forest que en celuy ou ledit sieur de Syon alloit estant allez le sieur du Hommet rapelland lun des veneurs dudit sire pour paroillement faire ladite visee / Et quilz se devoit rendre ausditz Fossez Blancs pour faire leur rapport trouverent le dit sieur de Syon ce plant les [truies] de deux grans sangliers / Et sur tant par Olivier Le Gaigneurs qui estoit avecques eulx enmenerent dire audit sire quil avoit trouvé lesditz troies et quil se rendist audit sieur de Syon a la terre es potz ce que fist ledit sieur de La Hunaudaye / Et avecques luy ledit sieur de Beaumanoir et plusieurs de leurs gens entre lesquels estoit Petit Jehan Bastart de La Hunaudaye et Jehan du Breil / Et lors que furent asonner assemblement ledit sire demanda une bouteille disant vouloit faire boire ledit sieur de Syon son frere (f° 152) et lors fut dit que Jehan du Breil avoit bien le vin de ladite bouteille mes que le dit sieur de Beaumanoir avoit baille de l'argent a Olivier Le Gaigneurs pour aller emplir ladite bouteille a Saint Aubbin / Et sur veut ledit sieur tancza avec ledit du Breil davoit beu ladite bouteille / Et incontinant ariva ledit Gaigneurs o ladite bouteille pleine de vin et dicelle beurent ledit sieur lesditz du Hommet et Syon et de Beaumanoir et plusieurs aultres de leur compaignie et entre autres celuy du Breil en beut plusieurs foiz / Et apres quilz eurent oudit lieu bien beu et mengé fut ainsy que Allain Berthemer, Jehan Rouxel serviteur dudit sieur de La Hunaudaye de Beaumanoir et aultres [...] se departirent pour aller audesur parler et hué dicelle chasse / Et par avant celuy parlerent ledit du Breil demendast audit sieur que luy baillast son espee quil lui respondist que non feroit et quil estoit homme pour bien lemploiez et que mesme ledit du Breill en avoit une quel du Breil dist quil turoit celui jour le grant sanglier et quil en auroit leschine en jurant le sang Dieu demanda celuy du Breill audit Petit Jehan Bastart sil luy tienderoit bien quil jura le sang dieu que ouy et sur tant ledit sieur de Beaumanoir (f° 153) appela lesditz Petit Jehan et du Breill disant par telles parolles ensemblement tenuz avecques moy : « Je vous ferai tuer celuy grant sanglier » et estoit environ neuff ou dix heures du matin partirent diceluy lieu touz ensemble et entrerent oudit bouais / Et tout incontinant qui furent entrez oudit boais ledit sieur de Syon leur monstra les [errs, pas d'animaux] du grant sanglier sur lesquellesse couplerent plusieurs de leurs chiens encore faisant ledit descompte se partirent dicelui lieu et allerent savoir ledit sieur de Syon deux serviteurs du sieur de Beaumanoir lun nommé Esnault et lautre Gilles de la [...] et ledit sieur de Beaumanoir lequel petit Jehan Bastart et Jehan du Breil ledit sieur de Beaumanoir a cheval sur ung petit cheval [...] une espee amouse lesditz Bastart et du Breill estoit apré et avoint chacun deulx ung espye et oudit ledit du Breill [une] dague [et le] Bastart aucun cousteau ne baston oultre ledit espie et a celle heure ledit sieur de Hommet et aultres en sa compaignie estoit allez ung aultre quartier de ladite forest bien logn dileques pour fere la hué comme celuy (f° 154) sieur de La Hunaudaye tout incontinant chasse et [...] et les aultres huerent / Et en ce faisant fut trouvé ung sanglier et iceluy acourerent les chiens quilz avoint descompté / Et pour tant que ceulx qui [approchent] la beste que les chiens couroint ne valloit gueres fut asoné retraicte / Et retrouverent deffait leurs chiens / Et allerent celuy fere lesditz sieurs de Syon et du Hommet Guillaume Bastart de La Hunaudaye parlant a plusieurs aultres descomptez en ung aultre lieu nommé le Boays Guihallon¹⁶ au quel lieu ilz chasserent / Et ne trouverent rien / Et lors retournerent les chiens et fut dit que ledit sieur sen estoit a La Hussonaye¹⁷ / Et incontinant lesditz sieurs du Hommet et de Syon et la pluspart des gens estans a celle chasse se y rendirent / Et ne se rendirent ledit sieur de Beaumanoir ne lesditz Petit Jehan Bastart et Jehan du Breil que avecques luy estoit allez par cy le Boays ainsy que dit est / Et en celuy lieu de La Hussonaye fut ledit sire par loign temps pour actendre que ledit sire de Beaumanoir se y rendist demande a plusieurs de ceulx

¹⁶ Position au nord de Trégomar, un menhir dit de « *la roche de Guihalon* » et un bois l'entoure.

¹⁷ Position également au nord de Trégomar.

que illecques estant ou estoit ledit sieur de Beaumanoir et si lon lavoit point veu / Et il luy fut respondu (**f° 155**) nest membre par qui que oncques prins le descompte il navoit esté veu / et lors celuy sieur envoya a ladite Le Gaigneurs devers Tregomar vers lequel cartier celuy sire avoit [été] pour veoirs si ledit de Beaumanoir se y estoit point rendu / Et que sil le trouvoit quel luy dist que il et ses freres sen alloint davant au chasteau / Et fut tant ledit sieur et sieur du Hommet qui estoit a cheval prindirent chemyn a aller au chasteau de La Hunaudaye et paroillement ledit sieur de Syon ce tesmoign et aultres qui estoit apré / Et en chemyn veu ce tesmoign en une lande le cheval sur lequel ledit de Beaumanoir estoit alle a ladite chasse qui encore avoit la selle sur le doz / Et apres ledit cheval veurent ledit sire et sen aprocha cuidant le prendre et incontinant ledit cheval print a huer vers luy et le lessa celuy sire et il et ledit sieur du Hommet tout incontinant prindirent aultre chemin que celuy a aller audit chasteau / Et celuy sieur de Syon ce tesmoign et aultres qui estoit apres sen allerent audit chasteau et y arriverent environ deuze heure avant soleil couchant / Et pour ce que lesditz sieurs de La Hunaudaye et du Hommet y estoit arrivez ce tesmoign et aultres (**f° 156**) Le Gaigneurs sen partirent dudit chasteau et sen allerent boire assemblement cheix Boulouy poursuyvant dudit sieur de La Hunaudaye / Et ung pou apre jour [...] retourna ce tesmoign oudit chasteau / Et ouyt dire tout notoirement entre les gens de la meson que ledit sieur de La Hunaudaye estoit arrivé et ne feisoit que aruer / et deffait le veu ce tesmoign a celle henor oudit chasteau / Et sembloit a ce tesmoign que ledit sire estoit couroussé / Et en plant avecques les gentilzhommes que illecques estoit il lui ouyt dire ce tesmoign que en sen allant audit chasteau es une lande pres ladite forest le cheval dudit de Beaumanoir et que la selle estoit toute sanglante quil lavoit grant paine que ledit sieur de Beaumanoir ne fust blesé et quil falloit faire dilligence den avoir des nouvelles et celle nuyt envoya ledit sieur querir le soubzgarde desditz forestiers nept membrer par qui disant que lon luy feist scavoir que fust le lendemain au point du jour devers luy et fist venir le plus quil peult des forestiers dicelle forest avecques luy commanda es gens de la meson aller des le bien matin sercher par ladite forest si lon trouveroit ledit de Beaumanoir / Et celuy jour de lendemain qui fut le mardy ledit sieur et ses freres [...] et plusieurs aultres allerent sercher ledit de Beaumanoir / Et ouyt dire lors (**f° 157**) ce tesmoign que plusieurs des gens de ladite meson estoit allez davant et veu lesditz sires alloint a ladite serche ce tesmoign en leur compaignie / fut dit esditz sieurs nest membré par qui que ledit de Beaumanoir avoit esté trouvé mort en ladite forest par aucuns des serviteurs dudit sire et dudit de Beaumanoir et partie des religieux de labbaie de Saint Aubbin sen allerent lesditz sieurs voir au lieu ou le corps dudit de Beaumanoir avoit esté trouvé / Et paroillement y alla ce tesmoign et veut le dit de Beaumanoir mort et [...] plusieurs playes [et a cette] heure veut que lesditz sieurs de La Hunaudaye et du Hommet firent de grandes lamentacions et pleurerent mes ne veut point le corps dudit de Beaumanoir estoit ce tesmoign le jour dare et demy oncques / Et ce ouyt ne veut aucune chouse du meurdre a presens en la personne dudit de Beaumanoir / Et dempux celle mort et trouvé a ce tesmoign ouy dire tout grandement en ladite meson que lesditz Petit Jehan Bastart et Jehan du Breil avoit occis et mis a mort ledit sieur sesditz freres ce tesmoign et aultres gens de ladite meson pour tant pour tant questoint allez avecques luy a ladite chasse ainsy que dit est / Et que (**f° 158**) dempux icelle ilz ne sestoint trouvez a ladite meson et chasteau ainsy que les aultres serviteurs de ladite meson desquelx ilz estoit avoit fait / Interogee si james il avoit sceu et veu que ledit de Beaumanoir et lesditz Petit Jehan et du Breil eussent parolles ne debat ensemble ne ouy a ce tesmoign petit Jehan et du Breil donner menaces a celuy sieur de Beaumanoir / Dit que non mes dit que dymanche et lundy deroins celuy du Breil ressembloit estre alteré et dist a ce tesmoign celuy lundy a ladite chasse quil avoit le cœur froit et que vin quil beust ne le povoit eschauffer / Aussi respondist que ledit du Breil

estoit debatiff et entrepreneur de rudes debatz o toutes gens et est son record / Ainsy signe J. de Rompierres Da. Miffeut.

(f° 159) Olivier Le Gaignours eaigé de trante ans auditionnez que il dit tesmoigner jurer dire voir examine et enquis respondist par son serment que lundy deroin eut troys sepmaines devers le matin ledit sieur de Syon mena ce tesmoign avecques luy en la forest dudit lieu de La Hunaudaye pour fere la visee daucuns sangliers que celui jour il ledit sire et ledit sieur de Beaumanoir devoit chasser / Et luy dist celui sieur de Syon que en ung aultres cartier de ladite forest estoit allez lesditz sieurs du Hommet et parllant lun des veneurs dudit sire pour paroillement fere une aultre visee que touz se doivent rendre aux Fossez Blancs pour fere le rapport de leurs visees audit sieur et sieur de Beaumanoir / Et en faisant ladite visee trouverent ledit sieur de Syon ce plant les cris de deux grans sangliers / Et sur tant que le commandement dudit sieur de Syon y alla ce tesmoign dire audit sieur qui estoit ausditz Fossez Blancs parlerent ledit sieur de Beaumanoir quilz avoient trouvé lesditz [truies] et quilz se rendissent audit sieur de Syon a la Ladre es potz ce qui firent lesditz sieur et sieur de Beaumanoir et leurs gens en lesquels estoient lesditz petit Jehan Bastart de La Hunaudaye et Jehan du Breil / Et dist le sieur du Hommet qui sestoit rendu ausditz Fossez Blancs quil vouloit desiuner fut (f° 160) apporté du pain du vin et de la chair se print celui petit Jehan a trancher audit sieur du Hommet nen tranchant veu ce tesmoign que incontinant que celui sieur de Syon avoit prins ung morceau celui Petit Jehan en prenoit ung aultre dont il despleut audit sieur du Hommet ainsy quil sembloit a ce tesmoign combien quil ne luy en ouyt riens dire / Et deparavant ne avoit oncques veu ce tesmoign audit Petit Jehan fere telles chouses / Et apres que celui Petit Jehan eut mengé demanda a ce tesmoign qui tenoit une tasse et une bouteille ou y avoit du vin que luy baillast a boire / Et lors ledit sire dist a ce tesmoign que gardast bien le vin et sur le reffusa a ce tesmoign en bailler audit Petit Jehan sur lequel reffus celui Petit Jehan par une maniere effrenté print la tasse que ce tesmoign avoit demanda a ce tesmoign a boire / Et ce tesmoign luy respondit que le sieur de Syon navoit point desjuné et quil aimeroit luy garde du vin / Et lors celui Petit Jehan print ladite bouteille [...] a ce tesmoign et beut tout le vin / Et de ce eut celui de Beaumanoir congnoissance pour tant quil bailla de l'argent a ce tesmoign en luy disant quil allast emplir ladite bouteille a Saint Aubbin ce que ce fist ce tesmoign / Et apres estre (f° 161) retourné audit lieu de la Ladre es potz, ouy dire ce tesmoign que a la ruee que y avoit fait lesditz sieur ledit sieur avoit demandé une bouteille pour faire boire ledit sieur de Syon son frere et quil luy avoit esté dit que Jehan du Breil avoit veu le vin de ladite bouteille mes que ledit sieur de Beaumanoir avoit baillé de l'argent a ce tesmoign pour aller le faire emplir a Saint Aubbin / Et que ledit sieur avoit tanczé avecques ledit du Breil d'avoit veu ledit vin / Et ce tesmoign a rué avecques eulx o ladite bouteille pleine de vin, beurent ledit sieur et lesditz sires du Hommet, de Syon et de Beaumanoir aultres celui du Breil en beut plusieurs foiz / Et apres que eust oudit lieu beu et mengé fut advisé par ledit sieur que Allain Berthelemer et aultres qui furent choisiz que ce tesmoign ne scavoit a present nommez yront au cours et par sesditz sieurs pour aller au descompte et hué / Et [...] ilz voulerent parler ledit du Breil demanda audit sieur qui luy baillast son espye quel sire luy respondist que non feroit et quil estoit homme pour bien lemployer / Et aussi mesmes que ledit du Breil en (f° 162) avoit ung, quel du Breil dist en parolles fere quil tueroit celui jour le grant sanglier et quil en auroit leschine par le sangc Dieu demanda celui du Breil audit Petit Jehan Bastart sil luy tendroit bien, iceluy Petit Jehan respondit en jurant : « Le sangc Dieu que ouy » / Et surtout partirent diceluy lieu touz ensemble et entrèrent en ladite forest / Et tout incontinant y furent entrez ledit sieur de Syon leur monstra les cries dun grant sanglier / Sur laquelle montre commandirent descompter plusieurs de leurs chiens / Et comme lon feisoit ledit descompte se despartirent diceluy lieu et allerent / Savoir ledit sieur le

sieur de Syon deux serviteurs du sieur de Beaumanoir lun nomme Esnault et lautre Gilles de La Moussaye [...] et aultres une part / Et ledit sieur de Beaumanoir lesditz Petit Jehan Bastart et Jehan du Breil une autre part estoit celuy de Beaumanoir a cheval sur ung petit cheval beau une espee au cousté et lesditz Bastart et du Breil ayans chacun une longue dague / Ne a present audit Bastart aucun coustras ne baston o ledit espie / Et ledit sieur du Hommet et aultres en sa compagnie estoit allez une aultre (f° 163) quartier bien logn dillecques pour fere la hué / fut [a la] chasse et luy semble que ce fut ledit sieur de La Hunaudaye qui commenza et incontinant les aultres sonerent et huerent fut couru et chasse ung petit prochut / Et pour tant que lesditz sieurs aprenerent que la beste que les chiens couroit ne valloit gueres commanderent rompre et retirer leurs chiens ce qui fut fait / Et incontinant sen allerent celuy sieur lesditz sieurs de Syon et du Hommet Guillaume bastart de La Hunaudaye parlant a plusieurs aultres descompter en ung aultre lieu nommé le Boays Guihallon auquel lieu ne trouverent riens et ny estoit point lesditz sieur de Beaumanoir, Petit Jehan et du Breil / Et lors retirerent encor les chiens et se rendirent en ung aultre cartier que se appellé La Hussonaye / Auquel lieu ne se trouverent ne rendirent paroillement ledit sieur de Beaumanoir ne lesditz Petit Jehan Bastart et Jehan du Breil que avecques luy estoit allez par cy le boays au premier descompte ainsy que dit est / Et a celuy lieu de La Hussonaye fut ledit sieur et sesditz freres par longc temps atendans ainsy que dist ledit sieur ledit sieur de Beaumanoir se y rendeust / Et (f° 164) apres avoir actendu par aucun temps [...] Le Gaigneurs dudit Tresgolmart [Trégomar] / vers lequel cartier ledit sieur dist avoir corue pour veoirs si ledit de Beaumanoir se y estoit point rendu / Et ce fait ledit sieur et dessus nommez prindirent chemyn a aller au chasteau de La Hunaudaye et paroillement ce tesmoign et les aultres qui estoit apré / sen allerent lesditz sieur de La Hunaudaye et lesditz sieurs du Hommet a cheval par ung chemyn / Et ledit sieur de Syon ce tesmoign et aultres qui estoit apré par ung autres et y arriverent environ soullail couchant / Et non lesditz sieurs de La Hunaudaye et du Hommet. Et ce tesmoign voyant quilz nestoient venuz sen alla a la visee en laquelle ce tesmoign demoura par ledit lieu de La Hunaudaye / Et comme environ jour couchant retourna audit lieu de La Hunaudaye et en la salle dudit lieu trouvé ledit sieur et ses freres / Et lors ouyt dire ce tesmoign a des gens de la meson que ce tesmoign ce scavoit nommez que ledit sieur avoit trouvé en une lande le cheval sur lequel ledit de Beaumanoir estoit aller a ladite chasse / et a pres ledit sieur [...] il sestoit apurché de luy pour le prandre que ledit cheval sestoit prins a ruer (f° 165) contre ledit sire / Et tantost apres louyt ce tesmoign dire audit sire / Et aultrement luy ouyt dire que la selle dudit cheval estoit sanglante / Et quil avoit grand paour que ledit sieur de Beaumanoir ne fust blesé. Et quil failloit fere dilligence den scavoir des nouvelles / Et celle nuyt envoya ledit sire querir le subgarde desditz forestz ne seut par qui dist que lon luy feist [et] que feust le lendemain au point du jour devers luy et fist venir le plus [tôt] que peust des forestiers dicelle forest avecques luy / Et commande aux gens de la meson aller des le bien matin sercher par ladite forest si lon trouveroit ledit subgarde et plusieurs aultres allerent sercher ledit de Beaumanoir / Et ouyt dire lors ce tesmoign que plusieurs des gens de la meson estoit allez davant / Et comme lesditz sieurs alloint a ladite serche ce tesmoign en leur compaignie fut dit esditz sieurs nest membré par qui que ledit de Beaumanoir avoit esté trouvé mort en ladite forest par daucuns des serviteurs dudit sieur et dudit de Beaumanoir par ce que des religieux de labbaye de Saint Aubbin, sen allerent lesditz sieurs droit au lieu ou le corps dudit (f° 166) de Beaumanoir avoit esté trouvé / et paroillement y alla ce tesmoign et veut ledit de Beaumanoir mort et [...] plusieurs playes et a celle heure veut que lesditz sieurs de La Hunaudaye et du Hommet firent de grandes lamentacions et pleurerent mes que veut point ledit seigneur de Syon / Et du lieu ou ce tesmoign veut le corps dudit de Beaumanoir estoit ce tesmoign le jour precedant a la chasse a distance dun traict darc et demy environ / Et ne ouyt ne veut aucune chouse du meurdre commis en la personne dudit de Beaumanoir / Et

dempuis celle mort [...] ce tesmoign ouy dire tout notoirement en ladite meson que lesditz Petit Jehan Bastart et Jehan du Breil avoit occis et mis a mort ledit de Beaumenoir / Et ainsy en presence dudit sieur seditz freres ce tesmoign et aultres gens de ladite meson pour tant questoint allez avecques luy a ladite chasse ainsy que dit est / Et que dempuix icelle ilz ne sestoint trouvez a ladite meson et chasteau ainsy que les aultres serviteurs de ladite meson desquelz ilz estoit avoit fait / Interosgé si james il avoit sceu ne veu que ledit de Beaumenoir lesditz Petit Jehan et du Breil eussent parolles ne debat ensemble / Ne cy aceulx Petit Jehan et du Breil donnez menasses a celuy seigneur de Beaumenoir dit que non / mes dit que dymanche (f° 167) et lundy derroins celuy du Breil ressembloit estre alteré / et dit a ce tesmoign celuy lundy a ladite chasse qui avoit le cœur froit et que vin quil bu ne le pouvoit eschauffer / Ainsy respondit que le dit du Breil estoit debatiff et entrepreneur [...] et debatz o toutes gens / Et est son record / Ainsy signé J. de Rompierres da Miffeut.

(f° 167) Du mercredi vingtiesme jour de decembre lan mil III^{cs} III^{xx} et seix

Raoulet Mahé de la parouesse de Boubrac en levescher de Treguier, eaigé de trante ans auditionné que il dit tesmoigner jurer dire vroy examine et enquis respondre par son serment que des le temps de doze ans a environ il alla demourez avecques ledit sieur de Beaumenoir nagueres decede / Et y a demourer continuellement jucques a son deceix / Et des le temps de neuff ans a environ ouyt parolles de mariaige devers ledit sieur de Beaumenoir et la dame de La Hunaudaye (f° 168) lors venant lequel mariaige en disoit quil se devoit faire / Et par une foiz environ celuy temps veut ce tesmoign celuy sieur de Beaumenoir deliberer de aller a Rennes on lon dist que ladite dame estoit pour la demen fiancer / Et y alla deffait mes ne peut parler avecques elle obstant la multitude du peuple quelle avoit environ elle / mes Joachim Eder y parla ainsi que ce tesmoign ouy dire a aucun dont ce tesmoign nest souvenant des noms / Et deslors ouyt dire ce tesmoing a plusieurs que tout commencerent entre les gens qui avoit congnoissance dudit mariaige que ledit seigneur de La Hunaudaye et ses freres empeschoint tant quilz pouvoit / Et nen estoit contens / Et que a celle ocasion quilz heroint ledit sieur de Beaumenoir le menassoit de luy fere desplesir sil se avanczoit a se y marier / Et apres autrement esté deux ou troys jours a Rennes sen retourna celuy de Beaumenoir audit lieu de Beaumenoir / fut bien seix ou sept ans sans aller devers ladite dame ne en lieu quelle feust pour tant quil avoit esté deffendu audit de Beaumenoir de parler ainsu que ce tesloign ouyt dire audit de Beaumenoir par plusieurs foiz de non y aller ne se trouvez entre elle / Et durant celuy temps se tenoit ladite dame a La Beraudiere ainsy (f° 169) que ce tesmoign ouyt dire a plusieurs que ce tesmoign ce savoit nommez / Et apres la mort du roy deroin decedé¹⁸ ouyt dire ce tesmoign a daucuns des gens de la meson de ladite dame que ledit sieur de La Hunaudaye avoit esté a La Beraudiere / Et avoit amener avecques luy ladite dame a La Hunaudaye / Et autre moys de septembre deroin eut troys ans le duc envoya querir ladite dame audit lieu de La Hunaudaye par Gallault Chanczon et mestre Guillaume Duclerc [en-] dun mandement du duc que celuy de Beaumenoir avoit impece deparavant laquelle impectacion ce tesmoign fut en la compagnie dudit de Beaumenoir comme serviteur / Et ung moys apres veut ladite dame en la ville de Nantes et au jour que ce tesmoign la y vit fut present ce tesmoign es espouzailles delle et dudit de Beaumenoir quelle feust en leglise de Saint Jehan de Nantes / Dit que apres la toussains deroine et environ la Saint Martin¹⁹ celuy de Beaumenoir envoya ce tesmoign audit lieu de Beaumenoir pour devoir fere garder des beuffs que y estoit o pour

¹⁸ Il s'agit de Louis XI mort le 30 août 1483.

¹⁹ Le 11 novembre de chaque année.

ferre recevoir de l'argent de ceulx en devoit / Et audit lieu de Beaumenoir fut par le temps de huit jours environ. Et jucques ad ce que ung nomme ~~Joachim~~ serviteur dudit sieur du Hommet luy apporta des lettres que ledit (f° 170) de Beaumenoir luy avoit baillees pour les bailler a ce plant, fist lire ce tesmoign lesdites lettres et pour ce que par icelle celui de Beaumenoir mandoit que ce plant sen retournast tout incontinent a La Beraudiere / devers luy ce tesmoign monta a cheval et prit chemyn a sen retourner audit lieu de La Beraudiere / Et en y allant ouyt dire sur chemyn que ledit de Beaumenoir et sa compaigne ledit sieur de La Hunaudaye ses freres et touz leurs gens sen alloint a La Hunaudaye / Se rendit ce tesmoign en la ville de Rennes par ung homme que ce tesmoign ne cognoist luy fut dit que lesditz sieurs et dame avoint passé et sen alloint a La Hunaudaye, entra ce tesmoign au logeix ou ilz avoint loge et demanda aux gens qui y estoient ou lesditz sieurs et dame alloint coucher et si ledit de Beaumenoir y estoit / Et il luy fut respondut quilz alloint coucher a la Chapelle Chaussé²⁰ et que le de Beaumenoir y estoit, retourna ce tesmoign droit a ladite Chapelle les y trouva et avecques eulx se rendit ce tesmoign jucques a Jugon, auquel lieu ilz arriverent le lundy [...] de la presentacion nostre dame comme semble a. ce tesmoign / devers le soir et y coucherent sauff ledit sieur de La Hunaudaye et ses gens qui sen allerent a la Hunaudaye auquel lieu lesditz de Beaumenoir et sa compaigne et (f° 171) le sieur de Syon et leurs gens se rendirent le mardy adesur / Et y fut ce tesmoign en leur compaignie jucques a le vendredy ensuivant auquel jour ce tesmoign par le commendement de Beaumenoir sen alla audit lieu de Beaumenoir pour y mener ses chevaulx et deffait les y mena et sey mit jucques au mardy ensuivant que le Bastart de La Haye se y rendit apporta des lettres a ce plant de par ladite dame et luy dist que ledit de Beaumenoir estoit mort, fist lire les lettres par les quelles estoit contenue quelle mandoit a ce tesmoign aller a Lentreguier pour recevoir cent escuz du receveur de lehandroit et veoirs si les gens qui avoit tué ledit de Beaumenoir y estoient point / Et le mercredy ensuivant print ce tesmoign chemyn a aller au lieu de Lentreguier et y ariva devers le soir et apres avoir mes son cheval en lestable sen alla a ce plant devers le greffier dudit lieu et luy demanda la confession qui avoit fait iceulx qui avoint tué ledit de Beaumenoir pour tant que la ruce qui avoit fait ce tesmoign au logeix, ce tesmoign sestoit enquis sil estoit point de mencion de la mort dudit de Beaumenoir et il lui avoit esté dit que les gens qui lavoint fait estoient audit lieu de Lentreguier et avoit esté banny le jour precedant / Quel greffier luy respondit qui navoint point (f° 172) ladite confession et que le lieutenant dudit lieu lavoit / Et au lendemain au matin se rendit ce tesmoign devers le vicair de levesque et Treguier qui estoit en leglise / Et les requist de luy faire baillez prestement ladite confession, enmenerent querir ce luy greffier au quel il firent commendement de baillez prestement a ce plant ladite confession dedans deux heures / Et lors veut ce tesmoign lesditz Petit Jehan Bastart de La Hunaudaye et Jehan du Breil en ladite eglise qui se promenoient ensemble / sen sortirent ce tesmoign et le dit greffier de ladite eglise et allerent devers le lieutenant du prevost dudit lieu quil luy fist bailler [...] ladite confession la print ce tesmoign et laporta avecques luy jucques a Beaumenoir et la bailla a mestre Jehan Nepron senneschal de Beaumenoir / Et le salemady ensuivant ce tesmoign dom Henry Lotot et Yvonnnet Jollys²¹ partirent dudit lieu de Beaumenoir et sen allerent devers ladite dame et luy porta ce plant les cent escuz qui avoua euz dudit receveur / Et lors que ce tesmoign et les aultres de sa compaignie entrerent en la chambre de la dite dame celle dame se print a pleurer et demanda a ce plant sil avoit esté a Lentreguier, et si lesditz Bastart et du Breil y estoient, lequel luy respondist que ouy et plusieurs aultres parolles parlerent ensemble / Et le lendemain veut les

²⁰ Au nord-ouest de Rennes, commune de la Chapelle-Chaussée (Ille-et-Vilaine).

²¹ Yvonnnet Jolis, 25 ans en 1486, du bourg de Quintin (Côtes-d'Armor), témoin auditionné dans ces procès-verbaux (f° 116-132).

(f° 173) sieurs du Hommet et de Syon en ladite meson / Lesquels lors quilz appercurent ce tesmoign et aultres de sa compaignie se prindirent de le menacer et faire mauveise chere. Et aussi le firent plusieurs des gens de ladite meson demenderent a ce plant et audit Dom Henry quelle chere en leur disant quilz estoit au commandement de ce tesmoign et dudit dom Henry / Et que james ilz navoit en plus grant deuil de homme / Et ce tesmoign et ledit dom Henry les menerent / Et ce fait sen retournerent audit lieu de Beaumanoir / Dit oultre que jeudy deroin Jouachim Eder, ce tesmoign en sa compaignie, partirent pour aller a La Hunaudaye parler a ladite dame / Et comme ilz furent audavant de la porte dudit chasteau dudit lieu et demanderent y entrer, le portier dudit lieu refusa oupvrir la porte disant quil ny enteroit personne et que celuy Jouachim et ce tesmoign sen retournassent et deffait sur lesdites parolles sen retournerent en Lamballe combien que aucuns de ladite meson les firent boire au dehors de ladite porte / Et apresent dist le bastart de [...] que lon ferast la porte / Et que ledit Jouachim et ce tesmoign tirassent en avant. Et est son recod, ainsy signé J. de Rompierres da Miffeut.

(f° 174) Guillaume Boterel escuier de cuysine de la maison du sieur de La Hunaudaye eaigé de quarante troys ans auditionnez que il dit jurer dire voir examine et enquis respondre par son serment que par avant la Toussains deroin ne scavoit dire quand jours, celuy sieur lesditz sieurs de Syon et leurs gens dont ce tesmoign estoit luy preindirent chemyn a aller a La Beraudiere veoirs la dame de La Hunaudaye mere dudit sieur / Et deffait se y en allerent et y trouverent lesditz sieurs du Hommet et assemblement y furent par le temps de trois sepmaines et deux jours feisans grande chere telle que gens de tel estat ont acostumé de faire / Et durant celuy temps par plusieurs ~~ouyt~~ jours ouyt ce tesmoign que ledit sieur de La Hunaudaye dist audit sieur de Beaumanoir et sadite compaignie quil vouloit que ledit de Beaumanoir et sadite compaignie [pranseissent] la charge et le commandement de sa meson et quil vouloit se commander par eulx / ce que celuy de Beaumanoir et ladite dame sa compaignie luy accorderent et prindirent jour pour y aller / Et apres lesdites parolles et au temps dudit meurtre prindist lesditz sieurs et dame leur chemyn a aller a La Hunaudaye et touz assemblement se y rendirent a ung jour de mardy qui estoit la presentacion Notre Dame²² et y furent jucques au deceix dudit deffunct assemblement (f° 175) feisans grande chere et chacun des jours qui semble a ce tesmoign furent a la chasse pour tant quil avoit la charge de la cuysine de la meson dudit sieur pour laquelle charge fere luy avoint ~~fer~~ aller hors ladite meson pour fere les pensions dicelle / Et aussi luy avoit celuy sieur de Beaumanoir baillé la charge de fere la despance du voyaige quilz avoint fait dempuix ledit lieu de La Beraudiere, avoit baillé vingt escuz / Et desiroit ce tesmoign le seroine ainsy quil panczoit et desiroit estre / Et le jour de lundy ensuiyvnt²³ allerent lesditz sieurs de La Hunaudaye, du Hommet, de Syon et de Beaumanoir a la chasse disans aller courir ung sanglier / Et des le matin apres avoir desjuné en la cuysine ainsy que souvente foiz Ilz avoint acostumé de fere sen allerent devers la forest dudit lieu de La Hunaudaye et plusieurs de leurs gens en leur compaignie quelx ce tesmoign ne savoit apres nommez et retournerent et demoura ce tesmoign en la meson pour tant qui estoit venu des beuffs de basse Bretagne pour la pension de ladite meson quil enmenoit fere tuer et abiller / Et apres que ce tesmoign eut besoigné en ladite meson et fait des choses de son office pour tant quil estoit ennuyé sen sortit hors icelle tirant devers (f° 176) ladite forest pour savoir et congnoistre quant lesditz sieurs retourneroint / Et tout incontinant veut et recongneut ce tesmoign lesditz sieurs de Syon et aultres gens quil estoit a pié et sen retournant droit en

²² La présentation de Marie au Temple le 21 novembre.

²³ Le lundi 27 novembre.

ladite meson de La Hunaudaye tint ce tesmoign son chemyn en son esbatant / Et tantost apres retourna audit lieu de La Hunaudaye et y arriva que une heure avant volee de bequace et ja [dèjà] y estoit ledit sieur de Syon que ce tesmoign trouva en la quysine assis sur un banc disant et aussi aperssoit quil estoit fort lasse / Et apres sestre ung peu reponsé et leure de volee de beqaces venue sen alla celuy sieur de Syon a la panetherie pour y devoir prendre des beqaces / Et puix retourna sans aportez aucune chouse / Et bien tost apres comme a jour couchant arriva audit lieu de La Hunaudaye ledit sieur de La Hunaudaye et le sieur du Hommet son frere / Et aucuns de leurs gens / Et eulx y arrivez demanderent a aller soupper, les fist ce plant servir et en servant veut lesditz sieurs de Lavanture qui paroillement y estoit / Et a celle heure demanda celuy sieur de La Hunaudaye ou estoit ledit sieur de Beaumeneoir et sil estoit point venu / Et il luy fut respondut par les gens que illecques estoit qui nestoit point venu / Et lors ledit sieurs sesditz freres et ledit sieur de Lavanture diserent scavoir lun pareilles parolles : « il pourra bien sen estre aller cheix son aute ou boucange » (f° 177), lautre : « il pourra bien avoir pourchaser le sanglier sil la veu » et ainsy sentre diserent lesdites paroilles et sembloit a ce tesmoign que lesditz sieurs estoit fort couroussez dont celuy sieur de Beaumeneoir nestoit venu / Et commenderent a de leurs gens que illecques estoit aller par la forest sercher si ilz en avoient point de nouvelles dont y eut parler que ce tesmoign ne savoit a present nommez que se miserent a chemyn pour devoir y aller mes pour ce quil feisoit si noir que lon ne voyoit encore point demourerent / Et apres que lesditz sieurs eurent actendu par long temps acheverent de soupper et ny furent plus guerres / Et tout incontinant dist celuy sieur de La Hunaudaye a ses gens que illecques estoit que des le landemain bien matin lon allast a la forest et que loin serchast par tout a lenviron si celuy de Beaumeneoir y estoit / Et pour ce que en souppant il fut dit que Petit Jehan Bastart de La Hunaudaye et Jehan du Breil nestoit venuz dist celuy sieur de La Hunaudaye en faisant le commendement a ses gens quil avoit paour que lesditz Bastart et du Breil eussent fait quelque desplesir audit sieur de Beaumeneoir / Et le lendemain au matin ce tesmoign estant audit lieu de La Hunaudaye veut ledit sieur et ses freres et plusieurs des gens de la meson entre lesquels ce tesmoign estoit aller fere la serche (f° 178) par ladite forest pour ledit de Beaumeneoir / Et en faisant celle serche fut raporté que ung des religieux de Saint Aubin²⁴ lavoit trouvé mort en ung endroit de ladite forest / Et tout incontinant se y rendirent lesditz sieurs et en y allant diserent a ce tesmoign quil allast devers les gens de la justice de Lamballe leur dire le cas qui estoit advenue en ladite forest / Et deffait du commendement desditz sieurs et chacun y alla ce tesmoign parla au procureur qui estoit a lesglise de Saint Jehan et luy dist le cas / Et incontinant celuy procureur fist sonner la cloche pour fere lassemblee des gens de justice de la ville leur signiffiez celuy cas quelz se rendirent au lieu acoustumé / Et apres le cas remonstre monterent a cheval environ quarante hommes et sen allerent touz ensemble ce tesmoign en la compaignie jucques en ladite forest laquelle ce tesmoign trouva ledit sieur de La Hunaudaye / Et luy dist ce plant que lesditz gens de justice estoit venuz / Et tout incontinant se rendirent celui sieur de La Hunaudaye du Hommet et de Syon devers lesditz gens de justice / Et eulx longs ensemble sen allerent au lieu ou avoit esté ledit de Beaumenoir ainsi que lon disoit firent ceulx gens de la justice visiter le corps dudit de Beaumenoir et la veut ce tesmoign paroillement et y fut trouvé plusieurs playes tant au corps que a la teste / Et aperssoint lesditz playes du corps ou esté (f° 179) donnees despys et celle de la teste daultre ferremens / Et avoir le braz destre rompu et celle visitacion faite fut celuy corps enseuvely et porte a ladite abbaye de Saint Aubin par le commandement dudit dieur de La Hunaudaye / Et plus les aultres sieurs et aultres de leurs gens conduit jucques a ladite abbaye / Interrogé si ledit sieur de La Hunaudaye et ses freres avoient point de hayne que contre ledit

²⁴ Abbaye voisine de Saint-Aubin-des-Bois.

sieur de Beaumenoir / Dit que dempuez le mariaige dudit sieur de Beaumenoir et de ladite dame consumé il na point eu de congnoissance quil eust entre eulx hayne ayns semble ayme comme père et filz pouvoit faire / Et par leurs signes et manieres monstrant au grande amour lun avecques lautre mais deparavant leur avoit ouy dire ce tesmoign quilz ne aymoint point ledit sieur de Beaumeneoir / Interosgé sil a point eu de congnoissance que lesditz Bastart et du Breil eussent hayne contre ledit sieur de Beaumenoir / Dit quil na point eu de congnoissance que entre ledit sieur de Beaumeneoir et ledit Bastart y eust aucune hayne mes bien dit autrement ouy dire audit du Breil par plusieurs foiz paravant ledit deceix advenu quil ne aymoioit point ledit de Beaumenoir / Et ung jour dont ce tesmoign ne savoit apresent fer declacacion pour tant que ce tesmoign (**f° 180**) eut congnoissance que ledit sieur de Beaumenoir avoit respondit au sieur de La Villeniére mestre dostel du sieur de Laval pour celuy du Breil avoit une place darcher en la compaignie dudit sire / Et quil avoit esté acordé audit sieur de Beaumenoir nen avoit esté celuy du Breil acteur ce tesmoign dist audit du Breil en demandant pour quoy il ne aymoint point ledit sieur de Beaumenoir veu quil luy avoit fait celuy bien et que oncques ne luy avoit fait mal / Et celuy du Breil respondit quil savoit bien quil a avoit du bien mes que neantmoin ce il ne le pouvoit aymer et ne lameroit james / Interosgé si lesditz Bastart et du Breil sont serviteurs domesticques dudit sieur de La Hunaudaye / Dit que ledit Bastart est domesticque et que ledit du Breil ne nept pas mes va et vient en ladite meson de La Hunaudaye par intervalles et non pas comme domesticque / Et seullement frequente pour tant que sa femme se y tient et y a esté de longc temps paravant [nourri]. Dit aussi que jeudy deroin environ leure de medy se rendit au davant dudit chasteau Jouachim Eder et aultres en sa compaignie demendast celuy Joachim a lentrete diceluy chasteau dist quil vouloit parler a la dame de La Hunaudaye pour son grant profist / Et pour ce que ce tesmoign avoit plus de congnoissance audit Jouachim que (**f° 181**) nulz des aultres de ladite meson que lors estoit en icelle, furent ce tesmoign et aultres gens de ladite meson a ung dacord ensemble que ce tesmoign parleroit audit Jouachim et lui respondroit a ce quil voudroit demandroit se rendit ce tesmoign au davant dudit Jouachim et demanda audit Jouachim quil vouloit / Et celuy Jouachim luy respondit quil vouloit parler a ladite dame et pour son grant profist / Et lors ce tesmoign dist que ledit sieur de La Hunaudaye estoit aller en Nantes / Et que a son partir il avoit deffendu a celuy a qui il avoit baillé la garde diceluy chasteau et a ce tesmoign que personne du monde ny entrast sil nestoit de la meson du duc ou personne mandasté et apres quilz noseroient y lessez entrer ledit Jouachim / Et lors ledit Jouachim dist par telles parolles ou semblables : « [de]puix que vous avez celle charge vous avez raison de la garder et faire, et quant elle me auroit esté baillé que a vous je men feroit jamais », le fist boire ce tesmoign / Et ce fait sen alla ledit Jouachim / Et aultre reffus ne luy fut fait dont ce tesmoign ayt eu congnoissance et est son record ainsy signé J. de Rompierres da Miffeut.

(**f° 182**) Pierres de Champran, maistre dostel de la dame de La Hunaudaye, eaigé de cinquante quatre ans auditionnez dist tesmoigner jurer dire voirs examine et enquis requeste et par son serment que des le temps de troys ans ains que il estoit en la meson de La Beraudière ou ladite dame pour lors estoit veu arriver en icelle meson le sieur de La Hunaudaye et le sieur de Syon son frere et aultres leurs gens en leur compaignie et y fust par tant jours que ce tesmoign ne savoit a present decleré et a lun diceulx et en la fin enmenerent ladite dame de La Beraudiere avecques eulx dist aller a La Hunaudaye dont celle dame nestoit constante ainsy que sembloit a ce tesmoign par les manieres que ladite dame fist / Et deffait menast ladite dame audit lieu de La Hunaudaye / Ainsy que ce tesmoign ouyt dire dempuez jusque entre fut par le temps dun moys environ et jucques ad ce quelle fut mariee avecques ledit sieur de Beaumenoir qui fut

encore iceluy temps dempuix le quel mariaige ladite dame estante a La Haye Eder²⁵ a present audit sieur de Beaumenoir envoia des lettres a ce tesmoign qui estoit amener audit lieu de La Beraudiere pour luy enmener des lettres qui estoit en ung coffre et dont icelle dame luy envoia les cleffs et quelle lettres ce tesmoign choaisit et feisoit mencion du mariaige devers elle et deffunct le sieur de La Hunaudaye²⁶ (f° 183) et les luy enmena / Et par de jours apres sen alla ce tesmoign devers elle audit lieu de La Haye et apres avoir parler avecques elle danciennes choses congneut ce tesmoign quelle vouloit pledoier avecques ledit sieur de La Hunaudaye touchant les choses luy prises en sondit mariaige et son douaire quelle vouloit, mes pour tout ce ne congneut ce tesmoign que entre elle ledit sieur de Beaumenoir son mary ne ledit sieur de La Hunaudaye ses freres ne lun deulx y eust hayne contenue aultrement ne a autre ocasion dont ce tesmoign ayt a present souvenance ayns a veu que par aucuns aultres jours que dempuix il a [...] o lesditz sieur de Beaumenoir et sa compaigne tant en la meson de Longle que de La Beraudière ou ilz se sont tenuz par aucun temps / Et y ont ledit sieur de La Hunaudaye, ses freres, esté avecques quilz sentre feisoit bonne chere et montroint grans signes ~~davoir~~ d'avoir amitié ensemble / Dit que environ la Toussains deroine celuy sire de La Hunaudaye se rendist en sa meson de La Beraudière et paroillement lesditz sieurs du Hommet et de Syon et y furent par force temps que ce tesmoign ne savoit a present declerez / Et avoit celui sieur de Beaumenoir et ladite dame sa compaigne mandé ainsy quilz diserent (f° 184) a ce tesmoign audit sieur de La Hunaudaye y aller les veoirs par lettres quilz luy donnerent pour tant que des avant ledit sieur de La Hunaudaye leur avoit mandé quil les vouloit aller veoirs. Et du temps quil y fust fut parler par eulx de tenir en lamour une meson touz ensemble et vivre a communs despans / Et avoit aultant de serviteurs les ungs que les aultres / Et dist autre ledit sieur de La Hunaudaye quil ne vouloit que nulles gens que iceulx que ladite dame luy ordonneroit / Et sur icelle parolles commandirent de aller a La Hunaudaye ce quilz firent deffait / Et preindrent chemyn des le salemady ensuivant que fut salemady deroin eut troix serviteurs que semble a ce tesmoing / Et demoura ce tesmoign audit lieu de La Beraudière pour anciennes choses que ladite dame luy avoit dit faire / Et mardy deroin eut quinze jours se rendit ce tesmoign a La Hunaudaye et luy asoné luy fut dit que le jour precedant ledit sieur de Beaumenoir avoir esté tué en la forest dudit lieu de La Hunaudaye / Et tantost a present veu ce tesmoign que ledit sieur de La Hunaudaye et sesditz freres parlerent et lenmenerent fesans maniere destre courrousez de la mort dudit de Beaumenoir et encore navoit point parlé ce tesmoign a ladite dame pour tant que lesditz sires nestoient (f° 185) point en la meson de ce tesmoign et aussi que ladite dame qui avoit ceu la venue de ce tesmoign luy en avoit mandé quil ne allast point devers elle jucques ad ce que elle le mist mandé / Et tout incontinant lesditz sieurs arrivez et aultres parlez avecques ce tesmoign sen allerent touz ensemble ce tesmoign en leur compaignie devers ladite dame qui estoit en sa chambre feisans chacun de sa part de grande lamentacions et pleurans / Et avoit plus longement en fist ladite dame quant elle veut ce plant / Et en ce faisant ainsy celle dame lesditz sieurs de avoir esté cause de la mort dudit de Beaumenoir et quilz lavoit fait faire quilz [-ferent] et firent de grans sermens, quilz nen savoint riens / dont ladite dame se contenta, parla ce tesmoign avecques ladite dame / Et entre aultres parolles luy dist quelle vouloit envoyer querir ce plant / Et que le lendemain au matin quelle y enverroit ung homme le quel elle commanda faire demourer / Et le lendemain qui fut le mercredy ce tesmoign par le commandement de ladite dame alla a lenterrement dudit deffunct qui fut enterre en leglise de labaye de Saint Aubbin pres ledit lieu de La Hunaudaye nen fist ce tesmoign la mise / Et dempuix na bouge ce tesmoign dudit lieu de La Hunaudaye / Dit

²⁵ Il s'agit du manoir de La Haye Eder entre Vannes et Nantes.

²⁶ Il s'agit ici de sa première noce vers 1425 avec Gilles Tournemine, seigneur de La Hunaudaye (décédé en 1474).

autrement (**f° 186**) que jeudy deroin environ deux heures apres medy Jouachim Eder se rendit audit chasteau acompaigne dautres gens demandast y entrez et disant quil vouloit parler a ladite dame / Sur lesquelles parolles ce tesmoign dist quil lalloit dire a ladite dame nommé, il chemyna, luy fut dit par ledit homme et Guillaume Boterel quil ny allast point et que ledit Jouachim ne ceulx qui estoit avecques luy ne enteroient ja / et quil leur avoit esté deffendu de part lesditz sieur de La Hunaudaye / Et sur tant demoura ce tesmoign Et ouyt que lesdit homme et Boterel diserent audit Jouachim quil ny entreroit point et quil leur avoir esté deffendu et sen alla celuy Jouachim / Et apres quilz sen furent allez sen alla ce plant devers ladite dame Et luy dist que ledit Jouachim avoit esté au davant dudit chasteau cuidant parler avecques elle mes que lon navoit point voullu quil y entrast / Et lors dit ladite dame quelle estoit bien navré quelle ne avoit parlé audit Joachim combien que ledit deffunct son mary ne laimoit point / Et que celuy Joachim luy avoit faire perdre beaucoup de son bien et quelle navoit peu fere son apprompt o le dit deffunct / Interrogé (**f° 187**) si ladite dame a esté audit lieu de La Hunaudaye en son liberal ambition si elle a ses gens et son estat ainsy quelle avoit acoustumé dit que ouy bien dit que dempuix ledit deceix elle sest tenu en une chambre sans gueres en partir mes tousiours a este servi ainsy que deparavant elle avoit acoustumé par des gens de sa meson / Et ne sont les gens de ladite meson de la dame tant ce tesmoign que aultres epeschez de aller la [...] ou ilz veullent ou que ladite dame les veult envoyer pour ses affaires et quant ce tesmoign le sauroit en feroit la [...] complainte la part quil congnoiseroit que la justice en seroit fecte / Et est son record ainsy signé J. de Rompierres Da. Miffeut.

(**f° 188**) A La Hunaudaye

Du vingt cinquiesme jour de decembre audit an mill III^{cs} IIII^{xx} et seix.

(**f° 188**) Dame **Marie de Villiers** dame de La Hunaudaye du Homet aigé de quarante ans auditionnez que elle dit jurez dire vroy interogee et enqueste et requeste que comme deux moys deroans Franczoys Tournemyne son filz sieur de La Hunaudaye acompaigné de Jehan Tournemyne son frere se transporta a La Beraudiere en pays d'Anjou auquel lieu ce tesmoign et noble escuier Jehan Eder sieur en son vivant de Beaumenoir mary espoux de ceste place demourant et remonstra audit de Beaumenoir et a ce tesmoign pour lamener a la police et commendement qui estoit en sa meson et chasteau de La Hunaudaye quil dist nept pas bien a son goe [goût], les parla tres affectueusement et en grant instance de aller a celuy lieu de La Hunaudaye pour luy et aidans a mectre police en commendement dicelle et entre ses gens quilz ayans pitié et compassion de luy, luy presenterent y aller et deffait partirent de celuy lieu, salemady eut troys personnes en ung moys et amenerent en celuy chasteau de La Hunaudaye et mardy ensuyvant avoit semblé a ce tesmoign par entre eulx parler de commendement / Et assignerent tenir pour (**f° 189**) y locsoigner a lundy mardy ou mercredy de la sepmaine ensuivante / Et dit que le salemady ensuivant leur arrivee arriva audit chasteau devers le soir ung messaiger de par le sire de Laval quil porta une lettre audit sire de La Hunaudaye conten quil allast devers luy a Vitré pour aller a Nantes devers le duc avecques le sire de Laval, quelle lettre ledit sire de la Hunaudaye monstra audit Eder et a ceste place leur demanda leurs conseil sil y iroit ou non quilz en donnerent conseil de ny aller point pour celle henor / de quoy fut constant ledit sire de La Hunaudaye / Et le lendemain qui estoit le dymanche peu avant mydy ledit Eder dist a ceste place que Jehan de Treal, Guillaume Desnoes et autres gens de la meson le tenoient en leurs parolles et pour le conseil quil lavoit donne audit sire de La Hunaudaye de ne allez point a Vitré / Et alors a ceste place dist quelle leur en parleroit / Et apres desur diceluy

jour ce tesmoign parla audit de Treal²⁷ et Denoes de ce que dessus et leur remonstra comment ilz avoit traité et grondé sondit filz au temps passé et quil lavoit embecté et quelle y mectroit permission bien breff / Et apres telles parolles sonditz filz et ses freres et avecques eulx ledit Eder et aultres gens de ladite meson allerent a la chasse en la forest de La Hunaudaye et y pourchasserent une beste fauve / Et ouyt dire celuy jour au soir entre les gens de sa meson quilz avoit soupper (f° 190) touz ensemble audit chasteau et avoit entrepris de aller le lendemain au matin courrir ung sanglier en ladite forest et celuy soir apres soupper danserent chanterent et feroit bonne chere ensemble sans que a sa veut souvenance ne congnoissance lun deulx pensa mal faire a lautre avecques ressemblant touz les nommez sentre aymez que fere, puis allez se coucher et le lendemain au bien matin ledit Eder se leva et se abilla et dist aller a la chasse et desfait veu ce tesmoign que lesditz sires de La Hunaudaye et de Beaumanoir monterent a cheval et sen y sortirent hors ledit chasteau / Et durant quilz furent a ladite chasse ce tesmoign estant en sa chambre au chasteau dudit lieu de La Hunaudaye et pencza ainsy que lesditz sires de La Hunaudaye du Homet et de Syon ses enfens ou ledit Eder son mary avoit quelque mal et dist a une de ses damoiselles nommee Jehanne de Marennes par telles parolles ou semblables « Ha Marenne jay le cœur froit terriblement, jay grand peur quil y ait quelque chose en ceste chasse que ilz point venuz allez veoirs en bas silz sont point venuz » et a celle heure peut bien estre deux heures apres midy sen aller ladite damoiselle et tantost rentra devers ce tesmoign et luy dist que : « a ceste heure riens, encore riens », venu demeurer ce tesmoign en sadite chambre et (f° 191) tousjours avoit en son impartement que y ait quelque mal en ladite chasse et une heure ou deux apres dist ladite damoiselle a ceste place que ledit sire de La Hunaudaye et ses freres estoit venuz mes que ledit sire de Beaumanoir nest point venu / Et lors dist ce tesmoign que ledit de Beaumanoir est donques mort et se print a pleurer / Et lors avecques une de ses damoiselles le diserent que celui de Beaumanoir pouvoit bien estre aller en quelque lieu environ la forest pour soy estbatre et que plustost il navoit point de mal et a ceste parlante dist que : « Mon espoux eu quel le lui eust mandé et que jamais ne alloit en lieu quil ne luy dist ou mandast » / Et tantost apres celles parolles arriva en la chambre de ceste place ledit Jehan de Treal que luy y [...] de ce tesmoign que celuy de Treal lui alloit dire quelque chouse de son mary et demande estre parlant que pleurer audit de Treal a lautre quil fust en ladite chambre par telles parolles ou semblables : « Est il mort ? » et celuy de Treal par luy respondist quil ne savoit mes que ledit sire de La Hunaudaye dist avoir trouvé le cheval dudit de Beaumanoir en landes pres ladite forest et quil doubtoit que ledit de Beaumanoir estoit vers et que celuy sire de La Hunaudaye pourvoit des gens par la forest pour le chercher / Et bien tost apres ont dit (f° 192) ce tesmoign nept membrer [se souvenir] a qui que lesditz Petit Jehan Bastart de La Hunaudaye et ledit Jehan du Breil nestoint point venuz et quil pouvoit bien estre avecques luy / Et lors ceste place dist que celuy sire de Beaumanoir estoit mort / Et deffait avecques apresent ne le veut ce tesmoign / Et a ouy dire tenir notoirement aux gens de ladite meson que lesditz Jehan du Breil et Petit Jehan appelé Bastart de La Hunaudaye avoit meurtry et mis a mort ledit Eder lundy deoroin eut trois sepmaines en quartier de Boucamboy / Et quilz estoit futiffs hors celle meson et oncques ny estoit venuz / Interosgee quelx gens elle suspecté davoit occis et meurtry sondit mary / Dit que nulz fors [sauf] lesditz du Breil et Petit Jehan pour les causes precedantes / Interosgee si james elle ouyt sceut ne veu que ledit sire de La Hunaudaye, Georges Tournemyne, Jehan Tournemyne, freres, ses enfans donassent menasses de mal faire audit Eder ne silz avoit point conceu hayne avecques luy / Dit que non ains sen aymoioit comme a present tres fort / Et aussi dempuix la mort dudit Eder a ouy jurer a sesditz enfans quil ne avoit fait ne fait faire [...] ne conspirer la mort dudit deffunct Eder ayns

²⁷ Jean de Tréal, sieur de Lavanture, marié à la fille du seigneur de Beaubois en Bourseul (Côtes-d'Armor).

quilz et chacun en estoit bien couroussez (**f° 193**) et vouleissent avoir donné beaucoup de bien et que la mort ne sen feust ensuys / Et est son record ainsy signé Jehan de Rompierres Da. Miffeut.

(**f° 193**) Jehanne de Marennes des Pres danjou eaigé de vingt ans auditonnez que elle dit jurer dire voir examine et enquise, recorde que de longc temps elle a esté et est demourante avecques ladite dame de La Hunaudaye et du Hommet et que paravant ung an deroin ladite dame et lesditz de Beaumenoir quelz estoit mariez ensemble allerent demourez a La Beraudiere en Anjou auquel lieu ilz ont demouurer jucques apres deux moys deroins entre lequel temps le sieur de La Hunaudaye acompaigné de Jehan Tournemyne son frere sieur de Syon et aucuns de ses serviteurs entre lesquels (**f° 194**) estoit le dit Jehan du Breil alla audit lieu pour veoirs ladite dame sa mere / Et y fut environ ung moys durant lequel temps ce tesmoign veut y arrivez le sieur du Hommet / Et eulx troys assemblement avecques ladite dame et ledit sieur de Beaumenoir son mary fere grande chere san esbatre et faire toutes choses dautre et familiale les ung avec les aultres ainsy que pere et enfant pouvoit fer / Et oncques ne sceut que entre eux y eut debat et rancune ne moveise parolles dicte par plusieurs foiz de lun par lautre ne aussi entre ledit du Breil et ledit sieur de Beaumenoir ne aultres des gens de la meson dudit sieur de La Hunaudaye / Ayns veut ce tesmoign des celuy temps que celuy de Beaumenoir estoit anvieux de fere du bien audit du Breil, luy ouyt dire quil le mectroit cheix le sieur de Laval en quelque bonne charge / Et apres que lesditz sieurs de La Hunaudaye, du Hommet et de Syon eurent esté audit lieu de La Beraudiere par lespace dun moys environ sen allerent audit lieu de La Hunaudaye et en enmenerent avecques eulx ledit sieur de Beaumenoir et dadite dame de la Beraudiere sa compaignie et y arriverent a ung jour de mardy a leure du soir des lequel jour et dempuix jucques au jour de lundy fut ce tesmoign entendu cy apres parler ilz ont fait grande chere sans avoir entreprinse aucune (**f° 195**) distencion iniustice ne rancune dont ce tesmoign ait eu congnoissance / Et dit que le dymanche ensuyvant ladite arrivee ledit sieur de La Hunaudaye ses freres ladite dame leur mere et ledit sieur de Beaumenoir soupperent oudit chasteau feisans grande chere ainsy que dit est et en souppant deliberent par entre eulx daller le lendemain a la chasse aux sangliers en la forest dudit lieu de La Hunaudaye nept membré lequel en fut serviteur / Et que le landemain qui estoit le lundy devers le matin les y vit ce tesmoign allez / Et dempuix le temps quilz y furent nommé encore deux ou troys heures apres medy ce tesmoign estant en la chambre de ladite dame / Et avecques elle ladite dame dist a ceste plant pareille parolle ou semblables : « Marenne, ma mye, helas sont ilz point venuz de la chasse, jay le cœur si froit, il me dit quil y a quelque chose mal a point par entre eulx ». Et a ceste plant en la confortant luy dist quilz nauvoit point tant a venir. Et assez tost apres sonnerent bruyt en la chambre de ladite dame que ilz estoit venuz de la chasse et lors ladite dame et ceste plante ou bas du chasteau pour savoir si ledit de Beaumenoir estoit venu / Et deffait y alla et entra en une garde robe basse en laquelle elle trouva le sieur de La Hunaudaye le sieur du Hommet Jehan de Treal et aultres. Et (**f° 196**) incontinant quelle fut entore demanda ceste plant ou estoit ledit sieur de Beaumenoir / Et celuy de Treal respondit quil estoit mort et que Jehan du Breil et Petit Jehan Bastart de La Hunaudaye lavoint tué / Et sur tant ceste plante leur dist pareilles parolles ou semblables : « Helas madame est nostre prix que ainsy est » / Et lors ledit sieur de La Hunaudaye qui illecques estoit en pleurant et sembloit a ce tesmoign que lestoit fort couroussé / Dist quil ne savoit comment le dire ne fere dire a ladite dame sa mere et quil eust voullu estre mort disant que sestoit la plus grant fortune que james luy estoit arriver / Et apres celles parolles ceste plante alla devers la dame / Et a lentrete quelle fist en ladite chambre celle dame luy demanda par telles parolles ou semblables : « Et prins des nouvelles Marenne » / Et ce tesmoign lui respondit : « Madame Monsieur de Beaumenoir est point

encore venu » / Et lors celle dame dist : « Il est doncques mort » et se mist a pleurer et se coucha sur une petite couchette qui est en ladite chambre / Et elle estoit ainsi couché et bien tost apres sortirent devers ladite dame ledit Jehan de Treal auquel a l'entree quil fist en ladite chambre ladite dame demanda par telles parolles ou semblables : « Comment est il mort ? » / Et celui de Treal respondit (**f° 197**) : « Madame lon ne sceut ou est Monsieur de Beaumanoir et lon doute que puix que Jehan ~~bastart Jehan~~ du Breil et Petit Jehan Bastart ne soient venuz quilz l'ont tué » / Sur laquelle responce ladite dame qui se estoit levee de sadite couchette se leva en plourant et a present cheut touz pasante sur ladite couchette et y demoura pour celle nuyt / Et que gne soit la pluspart / Et le lendemain au matin lui fut dit nept membré par qui que ledit de Beaumanoir estoit mort et quil avoit este tué en laforest dudit lieu par lesditz du Breil et Petit Jehan / Interosgee si oncques elle sceut ne eut congnoissance que lesditz sieurs de La Hunaudaye, sieurs du Hommet, de Syon ou aultres de leurs gens eussent hayne avecques ledit de Beaumanoir / Et si elle ouyt oncques a aucuns deulx en presence ou absence de luy le menasser de luy fere desplesir mal et ennuy. Dit que non sauff que elle dit que le dymanche precedant ledit meurtre elle estant en la meson et chasteau de La Hunaudaye ouyt dire a plusieurs des gens et serviteurs de ladite meson que ce tesmoign ne scavoit a present nommez que Guillaume Desnoes et Jehan du Breil nestoint point contans et sont bien marriz dont celui sieur de Beaumanoir avoit impesché ledit sieur de La Hunaudaye de aller en Nantes avecques le sieur de Laval qui lavoit mandé (**f° 198**) pour y aller / Et quilz en avoient parler en rudes parolles audit de Beaumanoir mes que celui sieur de Beaumanoir leur avoit respondit doucement que ledit sieur de La Hunaudaye navoit nulles [gens] et quil ny devoit pas aller ainsi / Interosgee si lesditz Petit Jehan Bastart et du Breil ont point esté en la meson de La Hunaudaye et si elle les y a point veuz dempuix ledit meurtre ainsy commis en la personne dudit de Beaumanoir dit que non ayns a ouy dire comment entre les gens de ladite meson quil sen estoit fuiz et que oncques puix ilz ne seront trouvez entre eulx / Et est son record ainsy signé J. de Romperres Da. Miffeut.

(**f° 199**) Marie la Bastardee aigé de quatorze ans auditionnez que elle dit tesmoign jurer dire voir examiner et enquis requeste par son serment que des le temps de troys ou quatre ans a elle a eu cognoissance de Jehan Eder sieur en son vivant de Beaumanoir et des celui temps et dempuix la veu fer quartier en la meson de La Hunaudaye en laquelle ce tesmoign a demourer et encore demoure a present / Et y a fait celui de Beaumanoir par plusieurs fois voyages quil y a esté grande residence / Et ung moys environ que il et la dame de la Beraudière sa compaigne y arriverent et luy semble qye ce fut a ung jour de mardy / Et y ont esté ensemble avecques lesditz sires de La Hunaudaye, du Homet et de Syon freres ensfens de ladite dame fasans grande chere ainsy que gens de tel estat ont acostumé de fere jucques au lundy ensuivant devers le soir duquel jour, elle ouyt dire entre les gens de la dite meson que Jehan du Breil et Petit Jehan Bastart de La Hunaudaye avoient tué ledit de Beaumanoir / Et aultre occasion veut ce tesmoign fere mauveise chere esditz sires et dames et aultres gens de La Hunaudaye / Et aultrement na point sceu la maniere comment ne locasion pour quoy ledit de Beaumanoir a esté tué. Interosgee si avecques elle sceut (**f° 200**) ne eut congnoissance que ledit sire de La Hunaudaye sires du Homet, de Syon ou aultres et les gens eussent hayne avecques ledit de Beaumanoir et si elle ouyt avecques a aucuns deulx en prendre ou [...] de luy le menasser de luy fere desplesir mal et ennuy / Dit que non sauff quelle dit que le dymanche precedant ledit meurtre elle estant en la meson et chasteau de La Hunaudaye, ouyt dire a plusieurs des gens et serviteurs de ladite meson que ce tesmoign ne furent a present nommez que Guillaume Desnoes et Jehan du Breil nestoint point contans et estoient bien marriz dont celui sire de Beaumanoir avoit empescher ledit sieur de La Hunaudaye de aller en Nantes avecques le sieur de Laval qui lavoit mandé et

quilz en avoint parler en rudes parolles audit sieur de Beaumenoir mes que celui sieur de Beaumenoir leur avoit respondu doucement que ledit sire de La Hunaudaye navoit nulles gens et quil ny devoit pas aller ainsy. Interosgee si lesditz du Breil et Petit Jehan Bastart ont point esté en la meson de La Hunaudaye et si elle les y a point veuz dempuix ledit meuctre ainsy commis en la personne dudit de Beaumenoir/ Dit que non ayns a ouy dire comment entre les gens de ladite meson quilz (f° 201) sen estoient fuiz, et que avecques eux ilz ne sestoint trouvez encore eulx et est son record ainsy signé Jehan de Rompierres Da. Miffeut.

(f° 201) Jehan de La Moussaye sieur de Lorgeril mestre dostel du sieur de La Hunaudaye eaigé de soixante ans auditionnez que il dit tesmoigner jurer dire voir et enquis record par son serment que dymanche deroin eut ung moys environ par environ medy il se rendit au chasteau de La Hunaudaye y trouva ledit sieur pour lors a disner acompaigne dudit sieur de Beaumenoir ses freres et aultres / Et apres disner ledit sieur de Beaumenoir dist a ce plant que aucuns des gens de ladite meson le detenoint en les parolles pour ce que disoint que lavoit voullu garder et deffait gardit ledit sieur de aller pour lors devers le sieur de Laval a Vitré / Et ce plant luy respondi tout gracieusement que ce nept point cause de son soy couroussez (f° 202) ne declara point a ce plant les nomz de ceulx que ainsi le detenoint en leurs parolles / Interosgé si celui jour de dymanche il veut ne ouyt aucunement aucuns des gens dicelle meson ne aultres qui eussent parolles remonstrances avecques ledit de Beaumenoir / Dit que non, ains dit que par ledit sieur ses freres ledit de Beaumenoir les dames et damoyselles et aultres gens de ladite meson feisoient meilleure chere que longc temps il avoit veu fere audit chasteau sans rancieur ne ire [colère] les ung aux aultres que apressent. Desponse oultrement que le lendemain au matin ce plant trouva ledit sieur de La Hunaudaye et ledit de Beaumenoir assis lun pres lautre a une table en la cuysine dudit chasteau et disoint ensemble faisant bonne chere / Et apres disner ce plant tira ledit de Beaumenoir apres luy remonstra comment ilz devoit fere celui jour la police et ordonnance de lestat dicelle meson / Et que les beuffs pour que de la pension dicelle meson estoient arrivez et que [...] seroit bien ayfaire quil respondi a ce plant que parlast avecques ladite dame et que ilz ne seroient que bien peu de temps a la chasse et a la venue ilz auseroient sur ce / Et sur tant monterent ledit sieur et lesditz de Beaumenoir a cheval allerent a la chasse que disoint et au soir (f° 203) ledit sire ses freres et aultres gens que estoient allez a ladite chasse fors ledit sieur de Beaumenoir Jehan du Breil et Petit Jehan appelle Bastart de La Hunaudaye arriverent audit chasteau / Et ouyt dire ce plant celui soir que ne savoit questoit devenu ledit sieur de Beaumenoir et en furent ledit sieur ses freres et aultres gens [...] bien fort couroussez / Et dit que le lendemain au bien matin qui fut le mardy ce plant ouyt dire a plusieurs gens dudit chasteau que ledit sieur de Beaumenoir avoit este trouve meurdry [...] en la forest dudit lieu de La Hunaudaye et des lors ouyt dire et dempuix tousiours a ouy tenir tout notoirement que lesditz Jehan du Breil et bastart avoint meurdry et occis ledit sieur de Beaumenoir / Et a celle cause en estoient et son futiffs et ne se sont aucunement renduz au chasteau ainsy quil avoint de coustume / Interosgé si james il sceut ne ouyt que lesditz de Beaumenoir du Breil et Bastart eussent eu debat ne parolles remonstrances ensemble dit que non / Interosgé oultre si james il ouyt ne veut aucun debat entre ledit sieur ses freres ne lun deulx dune part et ledit sieur de Beaumenoir dit que non ainczons les a veuz tousiours sentre aymer / Et est son record ainsy signé J de Rompierres Da. Miffeut.

(f° 204) Louyse de la Ville Thebault dasmoiselle eaigé de vingt ans auditionnez que celle dit tesmoigner jure dire voir examine et enquis record par son serment que environ la Toussains deroine eut ung an elle alla a La Beraudiere demourer avecques ladite dame de La Hunaudaye et des celui temps ya continuellement demoura jucques a present / durant lequel temps elle

ouyt dire communement entre les gens de la meson de la Beraudiere que la [pro-pt] dentre le sieur de Beaumanoir mary de ladite dame et le sieur de La Hunaudaye et ses freres avoit este fait et quelz sentre aymoint fort / et deffait les veut ce tesmoign par aucuns jours en ladite meson de La Beraudiere feisans grande chere monstrans lun a lautre avoit famillarement et grande amour ensemble / Et oncques ne veut ne sceut que entre eulx y eust debat, menasses rancunes ne debat en aucune maniere dempuix le temps susdit / Bien dit que a ung jour dont elle nest membré elle [estoit] audit lieu de La Beraudiere ou ledit de Beaumanoir estoit, ouyt dire audit de Beaumanoir que lesditz de La Beraudiere luy avoit dit que lesditz de Syon luy avoit dit que ledit de Beaumanoir vouloit vendre la piece et seigneurie du Hommet a ung personnaige que ledit de Beaumanoir nomma lors mes nen est a present ce tesmoign (f° 205) souvenante / Et que a celle cause il en estoit bien couroussé avecques ledit sieur de Syon et aultres parolles de hayne na point sceu ce tesmoign desditz nommez ne devant deluix / Dit aussi quil y a ung moys oncques quelle arriva en la compaignie de ladite dame audit lieu de La Hunaudaye et luy semble que ce fut a ung jour de mardy / des le quel jour et dempuix jucques au lundy ensuivant elle a veu lesditz sieurs fere grande chere ensemble chante et danser aller a la chasse et sy esbatre assemblement / Et audit jour de lundy devers le soir veut ce tesmoign esditz sieur de La Hunaudaye et ses freres faire moveise chere / Et lors ouyt dire comment entre les gens dudit lieu de La Hunaudaye que Jehan du Breil et Petit Jehan Bastart de La Hunaudaye avoint tué le dit de Beaumanoir et que a celle cause ilz ne sestoint point renduz en la meson ainsi quilz avoit acoustumé ayns sen estoient fuyz / Et dempuix celuy lundy mes ne savoit dire a quel jour ce tesmoign ouyt dire a Jehan de Treal quil avoit ouy dire audit du Breil peu avant la mort dudit de Beaumanoir que celuy de Beaumanoir aultrement declerez lesdites parolles et oncques ne sceut ce tesmoign par ouy dire ne aultrement que aucuns des gens desditz sieurs de La Hunaudaye et ses freres eussent hayne avecque ledit de Beaumanoir (f° 206) Interosgé si dempuix celuy lundy elle a point veu lesditz du Breil et Petit Jehan Bastart audit lieu de La Hunaudaye / si elle a point sceu quilz y ont esté / Dit que non / Et est son record ainsy signé J. de Rompierres Da. Miffeut.

(f° 206) Beatrix de Lescuz damoiselle aigé de vingt ans auditionné elle dit tesmoigner jurer dire voir examine et enquisse record par son serment que des le temps de troys an quatre ans elle a eu congnoissance de Jehan Eder sieur en son vivant de Beaumanoir et des celuy temps et dempuix la veu fer quartier en la meson de La Hunaudaye en laquelle ce tesmoign demoura et encore demoure a present et ya fait celuy de Beaumanoir par plusieurs foiz quil y a esté grande residance / Et ung moys a environ il et la dame de La Beraudiere sa compaignie y arriverent et luy semble que fut a ung jour de mardy et fut este ensemble avecques (f° 207) les sieurs de La Hunaudaye, du Hommet et de Syon freres enfans de ladite dame feisans grande chere ainsy que gens de tel estat ont acoustumé de faire jucques au lundy ensuivant devers le soir duquel jour elle ouy dire entre les gens de ladite meson que Jehan du Breil et Petit Jehan Bastart de La Hunaudaye avoint tué ledit de Beaumanoir / Et a celle cause veut ce tesmoign fere mauveise esditz sieurs et dame et aultres gens de ladite meson / Et aultrement na point sceu la maniere comment, ne locasion pour quoy ledit de Beaumanoir a este tué / Interosgee si oncques elle sceut ne eut congnoissance que lesditz sieurs de La Hunaudaye sieurs du Hommet et de Syon ou aultres de leurs gens eussent hayne avecques ledit de Beaumanoir et si elle oyt dire que a aucuns deulx en presence ou absence de lui le menassa de luy faire mal et encore dit que non / Interosgee si lesditz du Breil et Petit Jehan Bastart ont point esté en la meson de La Hunaudaye et si elle les y a point veuz dempuix ledit meudre ainsy commis en la personne dudit de Beaumanoir dit que non ayns a ouy dire comment entre les gens de la meson quels sen estoit

fuytz et que oncques jours ils ne setoint trouvez devers eulx et est son record, ainsy signé J. de Rompierres Da. Miffeut.

(f° 208) Marguerite de La Noue damoiselle aigé de trante cinq ans auditionnez que elle dit tesmoigner jurer dire voir examiner et enquis, recorde par son serment que des le temps de troys ou quatre a environ elle a eu congnoissance de Jehan Eder sieur en son vivant de Beaumanoir / Et des celuy temps et dempuix la veu frequenter en la meson de La Hunaudaye, en laquelle ce tesmoign demoura et encore demoure a present / Et y a fait celuy de Beaumanoir par plusieurs voyaiges quil y a esté grande residance / Et ung moys a environ que il et la dame de La Beraudiere sa compaignie y arrivent et luy semble que ce fut ung jour de mardy et y ont este ensemble avecques les sieurs de La Hunaudaye, du Hommet et de Syon freres enfans de ladite dame feisans grande chere ainsy que gens de tel estat ont acoustumé de faire jucques au lundy ensuyvant devers le soir duquel jour elle ouyt dire entre les gens de ladite meson que Jehan du Breil et Petit Jehan Bastart de La Hunudaye avoint tué ledit de Beaumanoir et a celle ocasion veut ce tesmoign fer mauveise chere esditz sieurs et dame et aultres de ladite meson / Et aultrement na point sceu la maniere comment ne locasion pour quoy ledit de Beaumanoir a esté tué / Interosgé oncques elle sceut ne eut congnoissance que lesditz sieur de La Hunudaye, sieurs du Hommet et de Syon ou aultres de (f° 209) leurs gens eussent hayne avecques le dit de Beaumanoir et si elle ouyt oncques a aucuns deulx en presence ou absence de lui le menasser de luy fere desplaisir mal et enny / Dit que non / Interosgé si lesditz du Breil et Petit Jehan Bastart ont point esté en la meson de La Hunaudaye et si elle les y a point veuz dempuix le meudre ainsy commis en la personne dudit de Beaumanoir dit que non ayns a ouy dire comment entre les gens de ladite meson quilz sen estoit fuiz / Et que oncques puis ilz se sestoint trouvez encore eulx / Et est son record, ainsy signé J. de Rompierres Da. Miffeut.

Jehan Gallart aultrement dit Boulouy poursuyvant dudit sire aigé de trante ans auditionnez que il dit tesmoigner jurer dire voir et enquis record par son serment que dempuix la venue de ladite dame et dudit deffunct jucques au jour de lundy deroin eut trois sepmaines ou ung moys nept membré le quel, il les a veuz audit chasteau fere bonne chere ensemble sans autre veu ne ouy que entre ledit deffunct et (f° 210) les gens dudit sire eust en nulles parolles [offenses] ne autre en debat ensemble, juczons avoint ensemble toute bonne amour et dillection comme apressoit / Et dit que on dit tout notoirement que lesditz du Breil et Petit Jehan ont tué et mis a mort ledit deffunct et que a celle sont futiffs et ne sceut ou ilz sont / Et est ce que deponse, ainsy signé J. de Rompierre Da. Miffeut.

Olivier Josses portier dudit chasteau eaigé de soixante ans auditionner que il dit tesmoigner jure dire voir et enquis record par son serment que mercredy deroin eut ung moys ou troys sepmaines arriverent audit chasteau ladite dame ledit deffunct et plusieurs aultres / Interosgé si puix leur rueue jucques au lundy eussent que fut ledit deffunct meurdry et occis ledit sieur, ses freres ne lun des gens dudit chasteau ne aultre ont eu nulles parolles [...] ensemble ne silz avoint point conseu hayne avecques ledit deffunct par avant le jour dudit meudre / Dit que non a sa souvenance (f° 211) juczons durant celuy temps les a veuz fere bonne chere / Et dit que dymanche deroin eut ung moys ou trois semaines que fit le jour precedant dudit meudre lesditz du Breil Petit Jehan Bastart et ledit deffunct coucherent audit chasteau / Et dit que le landemain qui est le lundy au bien matin Guillaume Guehault [...] dist a ce tesmoign que ledit sieur devoit aller a la chasse et que se levast a ouvrir la porte / Et dit que bien tost apres ledit Pellant alla hors la porte dudit chasteau en compaignie dudit sieur du Hommet / Et disoint aller davant fere la visee des sangliers / Et par apres ledit sieur ledit deffunct et aultres partirent

dudit chasteau a y aller / Et apres eulx alla ledit Jehan du Breil qui [tenoit] les levriers et estoit enbastonne dung espye et le dit Petit Jehan Bastart qui paroillement avoit un espye / Et estoit alle longc temps davant / Et dit que ledit jour devers la vespree ledit sieur de Sion et aultres gens dudit chasteau retournerent les premiers / Et tantost apres y arrivent ledit sieur et lesditz sieurs du Hommet etn leur compaignie estoit entre aultres Jehan de Treal qui paroillement en celui jour navoit aucunement (**f° 212**) este oudit chasteau / Et celuy jour de lundy au soir ne veut point ledit de Beaumenoir ne aussi lesditz du Breil et Petit Jehan audit chasteau / Et le lendamin au matin ledit sieur envoya grant nombre de ses gens pour fere serche par ladite forest / Et y alla ce ~~tesmoign~~ ledit sieurs de luy meimes / Et celuy jour ouyt dire que ledit de Beaumenoir avoit est trouve mort en ladite forest / Et recorde que ont dit tout notoirement que lesditz du Breil et Petit Jehan ont occis et mis a mort ledit deffunct / Et pour tant que on dit quil estoit demourez seulz o ledit deffunct. Et que oncques puis ne furent vuz et est bien estan quilz ne sont aucunement dempuis veuz audit chasteau ne y sont a present/ Et est son record ainsy signé J. de Rompeirres Da. Miffeut.

(**f° 213**) Pierres Le Maistre lun des bouteillers de la meson dudit sieur de La Hunaudaye eaigé de trante deux ans auditionnez que il dit tesmoigner jure dire voir examine et enquis, recorde par son serment que a ung jour de mardy luy semble quil y a trois sepmaines ou ung moys aultrement ne savoit declerez le temps il estoit en (**f° 214**) la meson dudit lieu de La Hunaudaye veut arrivez environ leure de medy diceluy jour en ladite meson ledit sieur de Beaumenoir ladite dame sa compaigne et plusieurs aultres tant leurs gens que dudit sieur de La Hunaudaye, a laquelle arrivee fut fait grande chere / Et y eut grant recueil fait audit sieur de Beaumenoir et a ladite dame par ledit sieur de La Hunaudaye et sa compaigne les freres dudit sieur et aultres gens de la meson dudit lieu de La Hunaudaye chanterent danserent allerent a la chasse par plusieurs deudit jours et son esbaterent ensemble dempuis ledit mardy jucques au lundy ensuyvant / Sans ce que ce tesmoign sceust par ouy dire ne autrement que entre eulx y eust debat rancune ne disencion ayns monstrant plusieurs signes et maniere autre lun a lautre grande amour et familiarite / Et dit que celuy jour de lundy au bien matin, il fut deliberé audit chasteau de aller a la chasse, alla ce plant seul a la visee, trouva ledit Petit Jehan Bastart au boays seul quil dist qui navoit riens trouvé / Et paroillement ce tesmoign luy dist que non avoit il prendirent derecheff chacun son chemyn pour fere serche de quelques [truies] puis se rendirent aux fossez blancs auquel lieu est le raport de ladite vissé / lesditz sire ses freres ledit (**f° 215**) ledit de Beaumenoir ledit Bastart, Jehan du Breil et plusieurs aultres / Et lors que ce tesmoign y arriva print le tout diceluy lieu disans aller au sieur de Syon que ilz disoient leur avoit fait sauf que avoit trouvé les truies de deux grans sangliers, trouverent ledit sieur de Syon et avecques luy parllant lun des venneurs dudit sire, Thomas le Bourdaz et plusieurs aultres / Et tout incontinant que ce tesmoign fut arrive en ung lieu appellé la[dre] espotz, ledit sieur de Beaumenoir le envoya au cours auquel il alla en compaignie daultres et fut plusieurs temps et pour tant que ne veut aucune beste audit cours tirent les chiens une aultres part / Et noyoint que ledit sieur sesditz freres et aultres estans a ladite chasse feussent allez a present lesditz chiens / Et sur tant ce plant partit dudit lieu et sen alla audit chasteau trouva en son chemyn Gilles de La Moussaye [...], Francois [R-gnet] quels ~~parlerent~~ paroillement allerent audit chasteau / Et dempuis le vespre diceluy jour ouyt dire a ung nomme bastart serviteur dudit sieur de Beaumenoir quil croit que son meste fust mort / Et le lendamin ledit sire sesditz freres et la pluspart de leurs gens allerent a ladite forest sercher ledit de Beaumenoir / Et a leur retour ouyt dire quilz lavoit trouve mort et navre de plusieurs playes ~~de laquelle mort ledit sieur sesditz freres et~~ (**f° 216**) ~~la plus part de leurs gens allerent a ladite forest sercher ledit de Beaumenoir / Et a leur retour ouyt dire quilz lavoit trouve mort et navre de plusieurs playes /~~

de laquelle mort ledit sieur sesditz freres et aultres gens de ladite meson ont mener grant dueil / Et disoit lors notoirement que Petit Jehan Bastart de La Hunaudaye et Jehan du Breil lavoint tué / Et ainsy le presentoit ledit sieur de La Hunaudaye et sesditz freres et aultres gens de la meson pour tant que ceulx Bastart et du Breil ne sestoint dempuix ladite chasse trouvez ne veuz en ladite meson / Interosgé si deparavant ledit jour de lundy il avoit veu aucun contens ne debat ne parolles de rancune entre ledit sieur de Beaumanoir et ledit sieur de La Hunaudaye, ses freres ne aultres gens de leur meson ne semble donner menasses / Dit que non / Et est son record ainsy signé J. de Rompierres Da. Miffeut.

(f° 217) Du vendredy vingt deuxieme jour de decembre lan mil IIII^{xx} IIII^{xx} et seix

Jehan Rouxel eaigé de vint quantre ans auditionnez tesmoign jure dire voir examine et enquis / recorde par son serment que puix la saintct Jehan deroine il avoit servy ledit sieur de Beaumanoir quel sieur de Beaumanoir et dame Marie de Villiers sa compaignie puix ung moys deroin estoit venuz du manoir de La Beraudiere ou de paravant estoit demourez demourez en la meson et chasteau de La Hunaudaye / Et dempuix quilz y furent arrivez y avoint et leur avoit esté fait par le sieur de La Hunaudaye et ses freres grant chere jucques au lundy ensuyvant [...] que allerent a la chasse en la forest de La Hunaudaye partirent le matin diceluy jour dudit chasteau de La Hunaudaye lesditz sieurs de La Hunaudaye et de Beaumanoir ensemble a cheval et en leur compaignie apre ce plant Yvonnet bastart serviteur dudit de Beaumanoir, Allain Berthelemeur, ung nommé Honpegay serviteur dudit de Beaumanoir et aultres dont ce plant nept membré des noms allerent ensemble jucques a ung lieu que lon appelloit les Fossez Blancs auquel lieu se devoit fer le raport des viseurs de ladite chasse auquel lieu se trouva Georges Tournemyne sieur de Hommet et plusieurs aultres qui avoit esté a fere ladite visee quilz diserent qui navoint trouvé riens que valleust / Et sur tant survint ung messaiger duquel ce tesmoign ne sceut le nom quil dist que lesieur sieur de Syon avoit (f° 218) trouvé en lun des quartiers de ladite forest deux sangliers et celles parolles ouys allerent le tout dicelle compaignie la part qui estoit ledit sieur de Syon auquel lieu se despartirent et les ung durent envoiez avecques les aultres au descompte alla ce tesmoign audit cours o les chiens et leuvriers dudit sieur de Beaumanoir par le [commandement] de sondit mestre / Et dit oultre que le lundy dont il a parlé qui fut autre environ troys sepmaines que luy semble le sieur de Syon ce plant qui avoint esté a la chasse ainsy quil a dit sen retournast audit chasteau de La Hunaudaie et y arrivent de grant jour / Et pavoit bien estre troys ou quatre heures apres medy / Et devers le soir diceluy jour que environ demye heure de nuyt y arrivent lesditz sieurs de La Hunaudaye et du Hommet et le sieur de Laventure en leur compaignie touz a cheval et diceluy jour navoit veu ce tesmoign ledit sieur de Lavanture jcuques a celle heure / Et ouyt dire ce tesmoign entre les gens de la meson dont il nept souvenant des noms que lesditz sieurs de La Hunaudaye et du Hommet avoint esté a Beauboys²⁸ querir ledit sieur de Lavanture pour dire a ladite dame que ledit sieur de Beaumanoir estoit mort ainsy quil penczoint / Aussi fut ce tesmoing present en la chambre de ladite dame que iceluy sieur de La Venture dist tantost apres a ladite dame que celuy sieur de Beaumanoir nestoit point retourner et que lon presumoit quil estoit mort pour ce que ledit sieur de La Hunaudaye (f° 219) disoit avoir trouvé ledit cheval dudit de Beaumanoir pres la forest / Et que la selle diceluy cheval estoit senglante / Et lors se sera ladite dame et fist de grandes lamentacions mandant a ce tesmoign et a plusieurs aultres que estoit en ladite chambre sortir hors ladite chambre / Et dempuix celle entree qui furent lesditz sieurs de La Hunaudaye et du Hommet ne les veut ce tesmoign jucques au lendemain que ce tesmoign les

²⁸ Manoir de Beaubois en Bourseul (Côtes-d'Armor) : Jean de Tréal est marié à la fille du seigneur de Beaubois.

veut en la forest dudit lieu en laquelle ilz se rendirent pour fer la serche dudit de Beaumanoir / laquelle serche celuy sieur de La Hunaudaye avoit commandé des celuy soir estre faite / Et que le tout de ses gens y allassent au moyen duquel commandast ce tesmoign et quatre religieux de labayye de Saint Aubbin que ce tesmoign avoit prins / furent ladite serche par avant que ledit sieur de La Hunaudaye et ses freres et aultres gens y arrivassent et le trouverent mort et mavre de plusieurs playes en ladite forest et disoit lors notoirement que Petit Jehan Bastart de La Hunaudaye et Jehan du Breil l'avoient tué et ainsy le presumoit ledit sieur de La Hunaudaye et sesditz fresres et aultres gens de la meson pour tant que celuy du Breil ne avoint esté veuz en ladite meson / Interosgé si par avant ledit jour de lundy il avoit veu aucun contens ne debat ne (f° 220) parolles de raucunes entre ledit sieur de Beaumanoir et ledit sieur de La Hunaudaye ses freres ne aultres gens de leur meson ne sentre amer menasses dit que non / Et dempuix la nouvelle venue de la mort dudit sieur de Beaumanoir a veu ce tesmoign audit sieur de La Hunaudaye et ses freres menez et faire grant dueil dicelle mort / Et que silz pouvoit retrouver ceulx qui avoint fait quilz les feroient pugniz que leur deust coustez / Et est son record. Ainsy signé J. de Rompierres Da. Miffeut.

Allain Berthelemer eaigé de quarante cinq ans auditionner que il dit tesmoigne jure dire voir examine et enquis, recorde par son serment que salemady eut ung moys que semble a ce tesmoign il estant a La Beraudiere sen alla en la compaignie du sieur de Beaumanoir et la dame de La Beraudiere sa compaignie o lesquelz ce tesmoign demouroit lors jucques en la meson de La Hunaudaye et pareillement furent a la [...] voyaige le sieur de La Hunaudaye, le sieur du Hommet et le sieur de Syon enfans de ladite dame / Et audit lieu de La Hunaudaye arriverent lesditz sieur et dame de Beaumanoir le mardy (f° 221) ensuyvant environ leure de medy / Et y furent assemblement avecques lesditz sieur de La Hunaudaye, du Hommet et de Syon et leurs gens jucques au lundy ensuyvant feisans grande chere monstrans pleine maniere de fer signes damour et dillection ensemble / Et oncques ne sceut ce tesmoign que entre eulx y eust hayne dempuix le mariaige consumé devers ledit sieur de Beaumanoir et ladite dame / Et que gnesoit dempuix que l'appointement avoit esté fait a Rozet ou ilz avoint esté ung peu apres apres ledit mariaige consulumé que fut troys ans a environ / Et durant quilz dit estre a La Hunaudaye ont esté lesditz sieurs a la chasse par deux ou troys jours / par deux dicelux jours savoir le vendredy celuy jour de lundy y a esté ce tesmoign en leur compaignie et paroillement lesditz Petit Jehan Bastart de La Hunaudaye et Jehan du Breil y furent par chacun des jours que ce tesmoign y fut et aultres gens et serviteurs desditz sieurs / Et dit que celuy jour de lundy devers le ~~mat~~ matin iceulx sieurs de La Hunaudaye et de Beaumanoir qui estoient en la cuisyne dudit lieu et y disnoient diserent a ce tesmoign et a Jehan Rouxel que illecques estoient que allassent davant a la forest mener les levriers audit sieur de Beaumanoir quilz se rendassent es Fossez Blancs / Et paroillement se y rendirent lesditz sieurs de La Hunaudaye et levriers et se rendirent aux Fossez Blancs (f° 222) de Beaumanoir / Et bien tost apres survint en celuy lieu ung homme et se semble a ce tesmoign que ce fut o [les gages] lequel dist ausditz sieurs que lesditz sieurs de Syon avoit trouvé les truies dun grant sanglier ou cousté ou il estoit / Et ceulx sieurs diserent quil enmenoit y aller et deffait sen y allerent ce tesmoign et aultres de leurs gens en leur compaignie et se rendirent a larder es potz pres Lessardaye²⁹ auquel lieu ilz trouverent ledit sieur de Syon et le sieur du Hommet Et pouvoit bien estre environ mydy ou une heure / Et illecques furent lesditz sieurs descompter les chiens et les gens que illecques estoient mectres les ungs a la hue et les aultres au cours fut ce tesmoign et ledit Rouxel au cours avecques leurs levriers / Et tout incontinant veut ce tesmoign lesditz sieurs de La Hunaudaye et du Hommet entrer en ladite

²⁹ Juste à côté de La Hussonais, cf. carte IGN.

forest et paroillement bien tost apres veu ce tesmoign ledit de Beaumanoir aller devers la forest iceulx petit Jehan Bastart et du Breil en sa compaignie / Et par ung endroit entrerent touz en ladite forest / mes ne sceut quelle part ilz allerent / Et en plus longc pour celuy jour ne veu ce tesmoign ledit sieur de Beaumanoir fut trouve ung sanglier courerent et huerent les gens que illecques estoint par l'espace dun grant de heure environ / Et pour ce que lesditz sieurs veurent que ne estoit chose qui valleist que il ouyt le lesserent et tirerent en ung aultre cartier de ladite forest (**f° 223**) qui se appelle BoisGuihallon³⁰ et paroillement ce tesmoign et les autres qui estoint a ladite chasse sauff lesditz de Beaumanoir, Petit Jehan, du Breil, Esnault qui ne se y rendirent point, fut chassé en celuy endroit mes ne fut riens trouvé / Et pour celle cause et aussi quil estoit pres que nuyt sen retournerent ce tesmoign ledit Rouxel, le bastart de Beaumanoir et ung nommé Colmet serviteur dudit sieur de Syon audit lieu de La Hunaudaye / Et que ilz estoint en chemyn veurent ledit sieur de Syon qui estoit apré et les suyvoit le contre attendirent ce tesmoign et les aultres tellement quil les ataignit et touz ensemble se rendirent audit lieu de La Hunaudaye ung pou avant vollee de beqases / Et tant tost apres estoit leure de vollee de beqaces passee se rendirent audit lieu de La Hunaudaye le sieur de La Venture que ce tesmoign navoint point veu diceluy jour / Et tout incontinant lesditz sieur de La Hunaudaye et du Hommet quelz estoint touz a cheval se descendirent et allerent touz ensemble a la chambre a parer / Et tantost apres que il alloit par la meson trouva ce tesmoign le bastart de Beaumanoir en un des [virs] de ladite meson qui plouroit / luy demanda ce tesmoign quil avoit / Et il luy respondi que telles parolles ou semblables : « Helas je croy que mon mestre est mort car Monsieur a dit quil avoit trouvé son cheval et que la selle en estoit sanglante. Helas, que (**f° 224**) feron nous ? ». Et incontinant se rendit ce tesmoign en la salle dudit chasteau ou plusieurs des gens desditz sieurs estoint que parloint de ce que ledit sieur de La Hunaudaye avoit dit du cheval dudit de Beaumanoir / Et demandoit les ungs aux autres feisans maniere destre fort couroussez quelles gens de la meson deffailloint. Et ils sentre dist que lesditz Petit Jehan Bastart et Jehan du Breil ne sestoint point renduz / Et tout incontinant commendement du sieur lon a celle heure en ladite meson que puix que lesditz Bastart et du Breil deffailloinct / Et que ledit cheval avoit este ainsy trouvé quilz avoit tué ledit de Beaumanoir / Et tantost apres allerent lesditz sieur de La Hunaudaye, du Hommet et de Syon soupper en la chambre dudit sieur de La Hunaudaye et fut ce tesmoign a les servir / Et durant le service ouyt ce tesmoign que lesditz sieurs davant nommez pleurerent de ce que dessus et en plant ainsy out ce tesmoign que ledit sieur de La Hunaudaye dist quil et ledit sieur du Hommet avoint esté apres deux chiens que sestoint esbaitiz en chassant / Et nouyt bien ce tesmoign quil parla davoit trouvé le cheval dudit de Beaumanoir en la ferme quil a parlé cy davant mes ne luy ouyt point dire ce tesmoign pour ce que ce tesmoign servoit alloit et venoit par la meson pour le dit service / Et dit ce tesmoign que comme il et les aultres dessus nommez sen alloint de ladite forest alla a La Hunaudaye, il veut lesditz chiens courrir a lesquart / Et ouyt que celuy sieur de La Hunaudaye dist a ce tesmoign et aux aultres qui estoint (**f° 225**) ensemble quilz sen allassent davant que il et le sieur du Hommet alloint apres lesditz chiens / Et deffait les y vit allez ne sceut ce tesmoign si des celuy soir il fut dit a ladite dame que que ledit sieur de Beaumanoir estoit mort ou non mes des celuy soir et durant le soupper diserent lesditz sieurs et chacun es gens que illecques estoint que le lendemain on alast a la forest sercher ledit de Beaumanoir / Et en ce disant et durant ledit soupper leur veut ce tesmoign fere moveise chere / Et ne peurent guerres boire ne manger / Et deffait celuy lendemain bien matin ce tesmoign et troys religieux de labbaye de Saint Aubbin que ce tesmoign alla querrire en ladite abbaye / ledit Rouxel et ung nomme Esnault valet des chiens dudit de Beaumanoir allerent en ladite forest par les lieux ou ilz avoint esté avant

³⁰ Sur les hauteurs, au nord de Trégomar.

ferre le descompte / Et pres diceluy lieu trouverent le corps dudit de Beaumanoir et incontinant quilz leurent trouvé celuy Esnault retourna audit lieu de La Hunaudaye et tantost apres et environ leure de neuff heures se y rendirent lesditz sieurs et chacun / Et apres quilz eussent veu celuy sieur de La Hunaudaye commanda au bastart de Beaumanoir aller devers les gens de la justice de Lamballe et les amenez pour veoirs ledit de Beaumanoir. Et deffait apres medy diceluy jour se y rendit le procureur de Lamballe et aultres gens le veurent et visiterent et puis sen retournerent / Interrogé sil a point eu de congnoissance que entre (f° 226) le sieur de Beaumanoir et les gens desditz sieurs de la Hunaudaye, du Hommet et de Syon ou les aucuns deulx y eust hayne et inimitié dit que non sauff quil dist que deux ans a environ il ouyt dire audit du Breil que celuy sieur de Beauemenoir avoit autrefois fait un oultraige en la meson du pere dudit du Breil mes que une foiz il le luy rendroit chault moment / Et ce tesmoign luy demanda quel outaige sestoit / Et celuy du Breil luy respondit que celuy de Beaumanoir avoit forcé une des chambrières du pere dudit du Breil sans declerez aultrement la maniere ne qui estoit ladite chambrière / Et est son record ainsy signé J. de Rompieres Da. Miffeut [que sadite audition et que le rapt seroit fait et quilz se y renderoient sen allant ce tesmoign et ledit Rouxel en ladite forest et y menrent lesditz lesditz leuvriers et se rendirent aux fossez blancs apparu].

(f° 226) Guillaume de la Chaussee demourant avecques la dame de La Beraudière eaigé de vingt troys ans audtionnez que il dit tesmoigner jure dire vroy examine et enquis, recorde par son serment que des le temps de dix ou doze ans a il alla demourer avecques deffunct Jehan Eder sieur de Beaumanoir avecques lequel ce tesmoign demoura jucques a son deceix / Et dit que paravant le temps de troys ans deroins il eut congnoissance que le sieur (f° 227) de La Hunaudaye et ses freres ayment point ledit sieur de Beaumanoir et lavoint en hayne pour tant que celuy de Beauemenoir tenoit parolle destre marié avecques ladite dame qui estoit mere dudit sieur de La Hunaudaye et ses freres mes dempuis le mariaige consulmé qui fut audit temps de troys ans, a veu ce tesmoign lesditz sieur de La Hunaudaye sesditz freres le sieur de Beaumanoir et sa compaigne ensemble sentre fere grant chere monstrant grans signes et maniere de sentre aymer / Et oncques ne sceut ce tesmoign par ouy dire ne aultrement que entre eulx y [mauvaise] comptencion ne raucune sauff que environ [...] prenant deroin il estant a La Beraudière ouyt dire audit sieur de Beaumanoir en plant a ladite dame que le sieur de Syon avoit dit que le sieur de Beaumanoir avoit voullu vendre audit sieur de [Segraux] cinq cens livres de rente sur la [terre] du Hommet et que celuy sieur de Beaumanoir nen estoit contant. Et pou de jours apres se y trouva ledit sieur de Syon au quel celuy sieur de Beaumanoir le reprocha / Et par deux ou troys jours furent en ladite meson monstrant celuy de Beaumanoir nestre contant dudit sieur de Syon, a lun desquels jours ce tesmoign ouyt dire audit sieur de Syon que le sieur de Marbouc le luy avoit dit / Et ~~pour ce que celuy de Beaumanoir dist quil en avoit oncques parler ne fait parler~~ aussi dist ladite dame que a ceuy sieur de Marbouc le luy avoit dit / Et pour ce que celuy de Beaumanoir dist quil nen avoit oncques parler ne fait parler / Celuy sieur (f° 228) de Syon luyquist pardon par tant fut a ung et dacord / Et dempuis celuy temps jucques au temps dudit deceix les a veuz ce tesmoign sentre aymer et fere bonne chere ensemble aultant que gens de tel estat pourvoit faire sans destencion autre ne parler aucunes parolles de rigueur ensemble / Et dit que apres le deceix dudit de Beaumanoir il acoura a La Hunaudaye / Et pour ce quil avoit ouy dire sur chemyn pres Rennes que ledit de Beaumanoir avoit esté tué ce plant a la ruce quil fist audit lieu de La Hunaudaye en lentrete duquel lieu il trouva ledit sieur de Syon ce plant se print a pleurer / Et dist a ce plant que son mestre avoit este tué. Et ce plant luy respondit quil lavoit bien ouy dire sur le chemyn / Entra ce plant dedans le chasteau et trouva le sieur de La Hunaudaye, lequel dist paroilles parolles. Et ce tesmoign luy respondit quil navoit plus de mestre et avoit perdu celuy auquel il avoit plus dese que luy feist

du bien. Et celuy sieur de La Hunaudaye dist que ce plant ne avoit point perdu son mestre et que sil vouloit demourer avecques luy quil luy feroit du bien dont ce tesmoign le mercia et se tant se departirent et sen alla ledit sieur de La Hunaudaye hors ledit chasteau dist que oncques pux la mort dudit de Beaumanoir nen estoit bieng. Et est son record, ainsy signé J. de Rompierres Da Miffeut. [quil...paroiement celuy sieur de Syon se estoit ap pleurer].

(f° 229) A Jugon

Du salemady vingt troziemes jour de decembre lan mill IIII^{cs} IIII^{xx} seix

Guillemette de Lesque femme de Guillaume du Breil eaigé de quarante cinq ans auditionnez que elle dit tesmoign jure dire voir examine et enquis recorde par son serment que mercredy deroin eut ung moys Jehan du Breil, Jehan du Breil se rendit en la meson dudit Guillaume son frere dist quil avoit a besougnier avecques le sieur de La Hunaudaye et quil sen vouloit y aller Et deffait sen y alla ainsy quil dist / Et dempuix a ouy dire ce tesmoign comment quil et ung nomme Petit Jehan Bastart de La Hunaudaye avoint tué ledit de Beaumanoir autrement ne le sceut ne duparsur dont elle a este enquis. Ainsy signé J. de Rompierres Da. Miffeut.

(f° 230) Yvonnet Le Hantours eaigé de quarante ans environ que il dit jure desmoign jurer dire voir examine et enquis recorde par son serment que le vendredy avant la mort dudit de Beaumanoir quelle fut ung moys a environ / Il veut ledit Jehan du Breil en sa meson, dist sen aller a La Hunaudaye et dempuix ne le veut mes a ouy parler que lui et ung bastart nommé Petit Jehan Bastart de La Hunaudaye lavoit tué, autrement ne le sceut, ainsi signe J. de Rompierres Da. Miffeut.

(f° 230) Robin Bertran demourant a Pledelya³¹ eaigé de cinquante ung an auditionnez que il dit tesmoign jure dire voir examine et enquis, recorde par son serment que mardy deroin eut trois sepmaines ou ung moys aulcunement ne savoit declerez le temps, il arriva en sa meson environ leure de vespres de hors laquelle il avoit esté par le temps de dix jours environ / Et avoit esté a Ancenis pour querir du vin / Et a la ruee quil fist y arriva paroillement ung clerc que lon dist demourer avecques mestre Clemens [conesge] / lequeul demanda a ce plant sil avoit poin veu ledit ~~nes~~ mestre Clemens / Et ce plant luy respondit que nenny / Et ce tesmoign luy demanda (f° 231) que il y avoit celuy clerc luy respondit que le sieur de Beaumanoir avoit esté tué en la forest / Et avoit esté trouvé son cheval des le jour precedant mes non luy / et que encore lon estoit a le sercher en la forest / Et y avoit point esté trouvé / Et des avecques prins ce ouyt parler dudit cas fors quil dit avoir ouy dire notoirement que Petit Jehan Bastart de La Hunaudaye et Jehan du Breil lavoit tué celuy jour precedant en ladite forest / Et est son record, ainsy signé J. de Rompierres Da. Miffeut.

(f° 231) Pierres Ferron lieutenant de la court de Jugon soubz garde des forestz de La Hunaudaye jure dire voir interosgé et enquis, recorde par son serment que congnoiest le sieur de La Hunaudaye, Georges et Jehan Tournemyne ses freres, la dame de La Beraudiere et touz les gens de la meson / Et dit oultre que dymanche deroin eut trois sepmaines et que soit pux ung moys, ce tesmoign alla desant a la Hunaudaye pour veoirs ladite dame que nagueres estoit elle Jehan Eder sieur de Beaumanoir son mary et les gens venuz a La Hunaudaye au chasteau dudit (f° 232) de La Hunaudaye, les trouva feisans grant chere et les salua ce plant et fist la

³¹ Commune de Plédéliac (Côtes-d'Armor) où se situe le château de La Hunaudaye.

reverance / Et entre aultres lesditz sieurs de Beaumenoir et dame firent ung grant recueil et hommage a ce plant en luy disant : « Bon homme vous estes nostre bon et feal amy vous soys le bien venu », puis tost apres ledit sieur de La Hunaudaye appela a lui en l'entree de la grant chambre a parer ce plant et luy dist : « Si vous avez asur allez au bougc de Pledelya [Plédéliac] et dictes a mon receveur que y trouverez que l'assignacion des fermes de mes moullins qui est a muyt soit receueue en actendant que Monsieur de Beaumenoir y voye car pour le temps avenue il me vueil gronder par luy et par ma dame ma mere et que ma meson soit reglee a leur esgart, j'ay chomme a le fere ». Et a celle heure parta ce plant dudit chasteau et monta a cheval et alla audit lieu de Pledelya et y trouva ledit receveur nomme Franczoys Guyguemer auquel dist la charge que ledit sieur de La Hunaudaye luy avoit dit puix tantost apres ce plant sen alla oudit jour a sa meson a Jugon / Et le lundy precedant apres ce plant alla de sa meson [...] pour tenir les plez dudit sieur de Cacsdem dont il est seneschal / Et sen retourna soupper cheix luy / Et apres soupper environ deux heures de nuyt arriva cheix (**f° 233**) luy ung petit garczon quil dist a ce plant que ledit sire luy mandoit qui allast devers luy a La Hunaudaye touz chouses cessees sans luy dire pour quelle cause / ce plant luy respondist quil nestoit pas heure a ung vieil homme de aller la nuyt par pays et luy dist ce plant que il se leveroit bien matin et yroit devers ledit sire et deffait le mardy eussent au bien matin y alla. Et a son arrivé demanda au portier sil savoit point pour quelle cause ledit sieur lavoit envoyer querir / Et ledit portier luy dist quil y avoit mauveises nouvelles en la meson et que lon doubtoit que ledit de Beaumenoir ne feust mort ou blezé pour tant que de la chasse quil avoit esté le jour precedant a laquelle estoit il ne sen estoit point veu ne Petit Jehan Bastart, Jehan du Breil, ne lun deulx qui estoit entra en la forest ensemble / Et sur ce ce plant entra oudit chasteau et rancontra ledit sieur quil menoit grant desconfort et pleurer moult fort disant : « Mon soubz garde et mon amy j'ay grant paour que Monsieur de Beaumenoir ne soit blesé ou mort car il ne sen vint point au soir de la chasse, Petit Jehan bastart ne Jehan du Breil ne sen vondirent point paroillement, il fault (**f° 234**) a toute dilligence assemblez touz les forestiers et gens de touz pour y aller sercher les forestz et tout le quartier du pays ». Et deffait des ce que ledit sieur eut ouyt messe se assemblerent plusieurs forestiers et aultres gens quelx apres ladite messe dire partirent a aller esdites forestz en compaignie dudit sieur et dudit Georges son frere et aultres gens de la maison / A apres que furent entre [larouez] dom Olivier labaye de Saint Aubbin sourvint ung des gens dudit seigneur de Beaumenoir³², quil dist que ledit sieur de Beaumenoir estoit mort esdite forest et en ung quartier devers la ladre es potz et touz ensemble y allerent et trouverent ou dedans du tailleux hors le chemyn le sieur de Beaumenoir mort et estoit a revers les bras etandue / Et si tost que ledit sire de La Hunaudaye et Georges son frere ainsy le veurent mort se [serans] et menast grant desconfort et pleurerent plusieurs lermes. Et fut le corps dudit de Beaumenoir comendé garder en celuy lieu sans le remuer jucques a tant que les gens de la justice de Lamballe feussent venuz / Et deffait sur le vespre diceluy jour arriverent les gens de Lamballe Jehan [-delon] sieur de la [Fontamean] des serviteurs de la court de Lamaballe et plusieurs aultres notables gens quelx ledit sieur [jura] et fist prier et requerir de lever le corps et de le (**f° 235**) sercher et veoirs ses playes et de faire informacion que avoit ce fait / Et sur ce ledit de Beaumenoir fut par les sieurs et aultres gens que dudit procureur despouille en prendre du sire et de sondit frere / Et fut trouvé que avoit tant en sen corps que en sa teste et es braz plusieurs playes mortelles et disoit on publicquement et notoirement en celuy lieu que celuy meurdre avoit esté fait et commis par Petit Jehan Bastart de La Hunaudaye et par Jehan du Breil quels estoit entrez en ladite forest avecques celuy de Beaumenoir audit jour par avant

³² Il parle ici certainement du valet de chien de Beaumanoir qui le premier a trouvé le corps avec les religieux de Saint-Aubin-des-Bois.

sa mort / Et avoit en leurs mains chacun son espye et oncques puix ne avoit este veuz / Plus dist on que lon avoit veue esfer bourgcs de Lamballe lesditz Bastart et du Breil tenans lesditz espyez e leurs mains touz armez et effrenez / Et que avoint tiré pays droit a Saint Brieux puix apres fut ~~en partie dudit sur la garde~~ celui corps mort levé par le commendement dudit procureur en presence dudit soubz garde et forestiers couvert et mis en une charette et porte en leglise de labaye de Saint Aubbin en presence de laber dudit lieu de ses religieux et de plusieurs sieurs et notables gens. Et a celui jour et dempui y a en et ladite eglise plusieurs messes beguins ? et chastoitez et donnees dargent (**f° 236**) grandement et notablement / Et a tout ce estoit pres lesditz sieur et seditz freres quelx au veu de ce plant [gertoint] plusieurs lermes et pleurs ainsi que si ledit de Beaumanoir feust leur propre pere / Interogé sil a point veu ne ouyt esditz sire ses freres ne gens de sa meson de La Hunaudaye donnez audit de Beaumanoir nulles menasses de luy meffaire / Dit que non anczoirs dit que a la rué que lesditz de Beaumanoir et dame firent audit lieu de La Hunaudaye ledit sieur sesditz freres et chacun leur porterent tres grant honneur et reverance et demoustrant les ung aux aultres de grant amour feisoient grant chere sans aulcune discord que ce plant y apersceust / Et dit ce plant quil croyt fermement et si fort par plusieurs aultres du pays ainsy quil a ouy que ledit sieur de La Hunaudaye et sesditz freres sont innocens dudit meurdre / Et est ce que déposé. Ainsy signé J. de Rompierres Da. Miffeut quilz [...] et dautres gens de la meson ledit sieur de Beaumanoir appert.

(**f° 237**) Jehan de Beauboys escuier sieur dudit lieu³³ eaigé de cinquante ans auditionnez que il dit tesmoign jurer dire voir examine et enquis, recorde par son serment que puix la toussains deroine a ung jour de lundy environ deux heures apres medy environ ne savoit declerez le temps, se rendirent en la meson de ce plant et audit lieu de Beauboays le sieur de La Hunaudaye et le sieur du Hommet son frere touz seulz faisant chacun deulx mauveise chere / Et apres y estre arrivez dist celui sieur de La Hunaudaye a ce plant quil avoit grant paour et quil avoit trouvé en sen allant audit lieu de Beauboays le cheval dudit de Beaumanoir lavoit ayde prendre pour ce que celui cheval avoit rué que lui avoit lessé et que celui cheval estoit senglant / Et dist quil doubtoit que celui de Beaumanoir eust este tué / beurent et mangerent ung peu en ladite meson et puix sen allerent dans leur de soullail couchant partirent de ladite meson de Beauboays et avecques eulx sen alla Jehan de Treal gendre de ce plant³⁴ et sans aultre compaignie sen allerent assemblement ~~prent de ladite de Beauboays~~ / Et des le landemain qui fut le mardy et dempui a ouy dire ce tesmoign comment que ledit sieur de Beaumanoir estoit mort des celui lundy dont il a parler cy davant / Et que ung nommé Petit Jehan (**f° 238**) Bastart de La Hunaudaye et Jehan du Breil lavoint tué en ung endroit de la forest dudit lieu de La Hunaudaye quo se appelle Bourcamban qui est a distance de la meson de ce plant dune lieue et demye environ / Et est son record ainsy signé J. de Rompierres Da. Miffeut.

(**f° 238**) Guillemecte de Beauboays damoiselle femme de Jehan de Treal eaigé de dix neuff ans auditionnez que lle dit tesmoign jure dire voir examine et enquis record par son serment que lundy deroine eut trois sepmaines en ung moys aultrement ne savoit declerer le temps environ deux ou troys heures apres mydy diceluy jour, se rendirent en la meson de Beauboays apresence au pre de ce tesmoign lesditz sieurs de La Hunaudaye et du Homet touz seulz feisans mauveise chere et par leurs manieres sembloit a ce tesmoign quilz estoit fort couroussez / Et incontinant quilz furent arrivez dist celui sieur de la Hunaudaye au pere de ce tesmoign a ce

³³ La seigneurie de Beaubois en Bourseul.

³⁴ Jean de Tréal, gendre du seigneur de Beaubois.

tesmoign et (f° 239) aultres que illecqyes estoit que sur le chemyn en sen allant audit lieu de Beauboays il avoit trouvé le cheval du sieur de Beaumanoir lavoit aydé prandre mes pour ce quil avoit rué quil luy lavoit lessé / Et dist oultre que le cheval estoit senglant et quil avoit paour que celuy de Beaumanoir eusse esté tué / ne ouyt point ce tesmoign quil declerast pou estoit ledit cheval senglant / beurent en ladite meson mes ne seut si ilz y mangerent / Et ce fait monterent a cheval et sen allerent disans aller audit lieu de La Hunaudaye / Et enmenerent avecques eulx ledit Jehan de Treal mary de ceste tesmoign / Et eulx troys assemblement sans aultres compaignie partirent de ladite meson de La Hunaudaye de Beauboays / Et des le lendemain qui fut le mardy et dempuix a ouy dire ce tesmoign comment environ ceulx lieux que ledit de Beaumanoir estoit mort / Et que Petit Jehan Bbastart de La Hunaudaye et Jehan du Breil lavoint tué en la forest dudit lieu aultrement ne le sceut / Et est son record ainsy signé J. de Rompierres Da. Miffeut.

(f° 240) Jehanne de Beauboays damoyselle fille dudit sieur de Beauboys eaigé de saize ans auditionnez que elle dit tesmoign jure dire voir examine et enquisse, recorde par son serment que lundy deroin entre troys sepmaines ou ung moys aultrement ne sacvoit declerez le temps environ deux ou troys heures apres medy diceluy jour / se rendirent en la meson de Beauboays apres au pres de ce tesmoign lesditz sieurs de La Hunaudaye et du Hommet touz seulz feisans mauveise chere et par leurs manieres sembloit a ce tesmoign quilz estoit fort couroussez / Et incontinant quilz furent arrivez dist celuy sieur de La Hunaudaye au pere de ce tesmoign a ce tesmoign et aultres que illecques estoit que sur le chemyn en sen allant audit lieu de Beauboays il avoit trouvé le cheval du sieur de Beaumanoir lavoit cuydé [aider] prandre mes pour ce quil avoit rué quil luy lavoit lessé / Et dist oultre que le cheval estoit senglant et quil avoit paru que celuy de Beaumanoir eust esté tué, ne ouyt point ce tesmoign quil declerast ou estoit ledit cheval senglant beurent et mengerent en ladite meson / Et ce fait monterent a cheval et sen allerent disans aller audit lieu de La Hunaudaye / Et enmenrent avecques eulx ledit Jehan de Treal / Et eulx troys assemblement sans aultres compaignie partirent de ladite meson de Beauboays et des le lendemain qui fut le mardy (f° 241) et dempuix a ouy dire ce tesmoign comment environ eulx lieux que ledit de Beaumanoir estoit mort / Et que Petit Jehan Bastart de La Hunaudaye et ledit Jehan du Breil lavoint tué en la forest audit lieu aultrement le sceut / Et est son record, ainsy signé J. De Rompierres Da. Miffeut.

(f° 241) Fabienne Triguillon eaigé de vingt deux ans auditionnez que elle dit tesmoign jure dire voir examine et enquisse, recorde par son serment que lundy deroin eut troys sepmaines ou ung moys aultrement ne savoit declerez le temps eniron deux ou trois heures apres mydy diceluy jour se rendirent en la meson de Beauboays aupres dudit Jehan de Beauboays lesditz sieur de La Hunaudaye et du Hommet touz seulz feisans mauveise chere et par les manieres sembloit a ce tesmoign quilz estoit fort couroussez / Et incontinant quilz furent arrivez dist celuy sieur de La Hunaudaye audit de Beauboays a ce tesmoign et aultres que illecques estoit que sur le chemyn en sen allant audit lieu de Beauboays (f° 242) il avoit trouvé le cheval dudit de Beaumanoir lavoit cuyde prandre mes pour ce quil se estoit prins a ruer quil luy il lavoit lessé / Et dist oultre que le cheval estoit senglant / Et quil avoit paour que ledit de Beaumanoir esté tue / ne ouyt ce tesmoign quel declerast ou estoit ledit cheval sanglant, beurent et mangerent en ladite meson / Et ce fait monterent a cheval et sen allerent disans aller audit lieu de La Hunaudaye et emmenerent avecques eulx le dit Jehan de Treal / Et eulx troys assemblement sans aultres compaignies partirent de ladite meson de Beauboays / Et deux ou troys jours apres retourna celuy de Treal audit lieu de Beauboays et est son record, Ainsy signé J. de Rompierres Da. Miffeut.

A Quintin

Du vingt septieme jour decembre lan mill III^{cs} IIII^{xx} seix

Nycollas Lemoenne de la paroesse de Notre Dame de Lamballe demourant avecques labber de Coetmalouan³⁵ eaigé de dix neuff ans auditionnez que il dit tesmoigner jurer dire voir examine et enquis requeste par son serment que en la sepmaine qui fut la feste de Sainte Andre³⁶ laquelle fut a ung jour de jeudi comme semble a ce tesmoign, et a celuy jour mesme ce tesmoing que (**f° 243**) estoit aller au [...] au sieur de [...] et sen retournerent a labaye de Coetmalouan ouyt dire au bourgc de Boubrac a aucuns gens que illecques estoit dont ce tesmoign ne seu les noms que le sieur de Beaumenoir avoit esté tué et quil avoit eu ung coup de dague sans declaracion ne qui lavoit fait / Et diceluy lieu sen alla ce plant a ladite abaye / Et ouyt dire es gens dicelle abbaye tout comment que ledit abbé avoit avoit esté mandé des le mercredy precedant par le sieur de La Hunaudaye pour aller audit lieu de La Hunaudaye querir le corps dudit de Beaumenoir / Et y avoit fait mettre les chevaux de charette pour emporter le corps mes que durant que celuy abbé et ses gens avoit esté audit lieu de Beaumenoir que lon luy avoit mandé sen retourner / Et que les religieux de labaye de Saint-Aubin lavoit mis et apoter en leur abbaye / Et que les religieux de labaye et Sainct Aubbin lavoit mis et porter en abbaye / Ne ouyt point declerez qui avoit fait retournez ledit abbé dont a present il soit souvenant sauff quil luy semble avoir ouy dire que ledit sieur de La Hunaudaye luy avoit respondu sen retourner autrement ne le seut / Et est son requeste ainsy signé Jehan de Rompierres Da. Miffeut.

(**f° 244**) Yvonnet bastart de la Haye Eder demourant avecques le sieur de Beaumenoir eaigé de vingt deux ans audtionnez que il dit tesmoigner jurer dire voir examine et enquis requeste par son serment que dempuix la Toussaint deroin a ung jour de sabmady ledit sieur de Beaumenoir et sa compaigne lesditz de La Hunaudaye et le sieur de Syon partirent ensemble de la meson de la Beraudiere estant en Anjou et sen allerent jucques en la meson de La Hunaudaye sauff que le lundy ilz arriverent a Jugon / Et celuy soir sen alla celuy sieur de La Hunaudaye a La Hunaudaye et lesditz sieur de Beaumenoir et sa compaigne et ledit sieur de Syon et aultres de leurs gens dont ce tesmoign estoit lors demourerent audit lieu de Jugon / Et le lendemain environ leure de disner arriverent touz ensemble audit lieu de La Hunaudaye le sieur du Homet pour tant quilz se rendirent au davant de ladite dame qui est leur mere / Et le mercredy ensuivant furent lesditz sires de La Hunaudaye, du Homet, de Syon et de Beaumenoir a la chasse en la forest dudit lieu et y prendirent ung senglier que lesditz sires et ladite dame enmenerent au sieur de [Segeaux] et diserent lenvoier de part ledit sieur de Beaumenoir / Et dicelle sepmaine ne fust lesditz sieurs a la chasse a la congnessance de ce tesmoign jucques au lundy ensuivant ainsy que apres sera touché / Et dit que le dymanche precedant celui lundy devers le soir lesditz sires de La Hunaudaye (**f° 245**) du Homet de Syon et de Beaumenoir estans en la meson de La Hunaudaye a soupper feisans grans cheres ensemble monstrans signes et manieres de grant amytié et amour autant lun a lautre luy sire de La Hunaudaye du Homet et de Syon de aller a la chasse le lendemain en ladite forest courrir ung sanglier diserent audit de Beaumenoir quil y eut avec eulx dont celuy de Beaumenoir fut contant disant quil le vouloit et a celle henor ceulx sieurs de la Hunaudaye, du Homet et de Syon commanderent aux gens

³⁵ Abbaye de Notre-Dame de Coatmalouen (Côtes-d'Armor).

³⁶ La fête de la Saint-André, le 30 novembre.

de la meson que illecques estoit que ledit lendemain chacun feust prest pour aller courrir un sanglier en ladite forest et diserent ceulx sieurs du Homet et de Syon quilz yroit fere la visee par ladite forest, pour faire congnoistre lendroit ou ilz courront / Et furent a ung touz ensemble que le rapport se fera aux Fosseze Blancs en ladite forest et que audit lieux se rendirent touz ensemble / Et ledit lendemain quil est lundy matin que environ huict ou neuff heures veut ce tesmoign que lesditz sires de La Hunaudaye et de Beaumanoir estoit deliberer de aller a la chasse / Et a celle heure ouyt dire ce tesmoign a des gens de la meson que illecques estoit desquels ce tesmoign net souvenant des noms que lesditz sires du Homet et de Syon François de [...], Olivier de la Brosse, Petit Jehan Bastart de La (f° 246) Hunaudaye, Gilles de La Moussaye, Thomas Le Bourdaz estoit aller davant a la visee touz apre / Et aussi que lesditz sieurs de La Hunaudaye et de Beaumanoir eust dejuné en la cuysine dudit lieu de La Hunaudaye celuy sire de Beaumanoir commanda a ce plant a ung nomme Esnault et Jehan Rouxel ses serviteurs prandre ses chiens et les mener en ladite forest et se rendre ausditz Fosseze Blancs prendirent lesditz chiens tant courans que levriers et sen allerent en ladite forest et avecques eulx Jehan du Breil un nommé Hompegay, Allain Berthelemer, ung valet de chiens dudit sieur de La Hunaudaye et ung nomme [...] touz apres et se rendirent auditz Fosseze Blancs et en y allant passerent par [environ] deulx lesditz sires de La Hunaudaye et de Beaumanoir estans a cheval diserent a ce plant et aultres de sa compagnie devant nommez quilz se rendassent ausditz Fosseze Blancs ce quilz firent ainsy que dit est / Et ausditz Fosseze Blancs se rendirent deffait et y arriverent lesditz sieur de La Hunaudaye et Beaumanoir / Et y demourerent par aucun temps durant lequel se rendit audit lieu ledit sieur du Homet tant apre / Lequel leur dist quil avoit fait la visee en ung quartier de ladite forest / mes quil navoit riens trouvé / que vailleist luy demandoit sil avoit point desjeuner et il leur respondit que neny luy fut baille du pain [...] et de la chair que illecques estoit et que lesditz sieurs de La Hunaudaye et de Beaumanoir y avoit fait pour tant (f° 247) que ce tesmoign que les aultres beust et mengea et en beuvast et mengeant dist que lesditz sieurs de Syon son frere estoit aller en ung aultre quartier de la forest et ce savoit sil avoit riens trouvé / Et tantost apres ariva ausditz Fosseze Blancs ledit Olivier de la Brosse quil dist ausditz sires que le dit sieur de Syon avoit fait une visee en ung quartier de ladite forest quil nomma ladre es potz et y avoit trouvé les [ecarts] dun grant sanglier ou deux / Et lors celuy sieur du Homet demanda avoir ung cheval et ses [honzcaux] par ung nommé Petit Jehan en avoit esté mener ung cheval et porte ses honzcaux se honza celuy sieur du Homet et monta a cheval / Et estant touz que illecques estoit sen allerent en celuy quartier de ladre es potz duquel lieu ilz trouverent ledit sieur de Syon quil leur dist quil avoit trouvé les [...] dun grant sanglier en ung endroit quil monstra desjuna celuy sieur de Syon / Et pour ce quil y avoit plus de vin celuy sieur de Beaumanoir bailla de largent a ung nommé Olivier de la Brosse pour en aller querir en labbaye de Saint Aubbin ce quil fist / Et tantost apres avoir dejune iceulx sires et chacun desromperent les chiens et se [-ent] chacun apres / Et lors dist celuy de Beaumanoir a ce tesmoign et aux aultres qui tenoient ses levriers qui se [tenseissent] en ung lieu quil leur monstra qui estoit dehors ladite forest et tout incontinant alla apres (f° 248) ledit sieur de La Hunaudaye luy demanda ou lon mectroit le cours / lequel respondit audit de Beaumanoir quil le meist la place quil voudra et retourna celuy de Beaumanoir a ce tesmoign et aux aultres qui tenans les chiens et remonstra derecheff le lieu ou ilz devoit tenir leurs chiens levriers / Et dist audit Esnault que qui tenoit ses chiens courans quil allast au descompte mes quil ne descomptast point jucques a ce que la beste feust levee / sen alla celuy Esnault en ladite forest apres ouyt ce tesmoign ledit sieur de La Hunaudaye qui estoit entrer en ladite forest asoner chasse / entra celuy sieur de Beaumanoir tout incontinant en ladite forest Jehan Bastart et ledit du Breil audavant de luy ayans chacun son espye en la main / Et aussi ouyt aux aultres huer et sonnerent en huerent fort longuement / Et bien tost apres ouy dire ce tesmoign que lon

navoit trouvé que un petit porchet et que les chiens sestoint mis alencourir / mes que mon lavoit pas lessé / Et tout continant ouyt ledit sieur de La Hunaudaye en ung aultre quartier de ladite forest asoner a distance de sept traictz darc du lieu ou ilz avoint fait de desrompre et hors ladite forest en tirant devers langle / sur ce quil apparu ce tesmoign et les aultres qui tenoit les chiens se rendirent (**f° 249**) et paroillement le parssur des gens qui estoit allez en ladite chasse chasserent en celuy endroit et ny trouverent riens / Et aussi ny fut point ledit de Beaumanoir / Et sur tant fut asoner de retraicte / Et ce fait ce tesmoign et les aultres que estoit apre prendirent chemy a sen retourner audit lieu de La Hunaudaye et enmener les chiens / Et comme ilz sen alloint audit lieu de La Hunaudaye et estoit sur le chemyn se rendit a [ceste place] ledit sieur de Syon que paroillement estoit apre / Et touz assemblement sen allerent audit lieu de La Hunaudaye / Et comme ilz y chemynoient par la lande pres de ladite forest passerent paravant ce tesmoign lesditz sieurs de La Hunaudaye du Homet a cheval tenans leur chemyn a aller auparavant que audit lieu de La Hunaudaye ainsy que ce tesmoign et les aultres purent apercevoir a lesbact desditz chevaulx / Et en passant devers a ce plant audit sieur de La Hunaudaye ou estoit ledit sieur de Beaumanoir lequel lui respondi que avecques prinx le descompte ne lavoit veu et quil croyoit quil sen estoit aller davant / Se rendirent iceulx sieurs de Syon ce tesmoign et les aultres qui estoit apresent audit lieu de La Hunaudaye environ soulail couchant / Et encore nestoint arrivez lesditz sires de La Hunaudaye du Homet et de Beaumanoir ne lesditz Petit Jehan Bastart et du Breil / Et veut heure apres huit heures environ y arrivent lesditz sieurs de La Hunaudaye, du Homet et Jehan de Treal en (**f° 250**) en leur compaignie / Et dit ce tesmoign le savoir pour ce quil fut long temps a la porte dudit lieu a les attendre cuidant que ledit de Beaumanoir y asonast avecques eulx et feisoit ce tesmoign garder les torches pour les alumez quant lesditz sieurs asomeront / Et a la rueue quilz firent pour tant que ce plant ne veut ledit de Beaumanoir en leur compaignie ce temoign demanda audit sieur de La Hunaudaye ou estoit ledit de Beaumanoir lequel leur respondi encore que dempuix quil lavoit veu au descompte quil le lavoit veu et ne savoit ou il estoit / Et incontinant ceulx sieurs de La Hunaudaye du Homet et de Lavanture entretent en une garde robe de la meson au quel lieu ilz avoint acoustumé de se desabiller et fermerent luy sur eulx / Et furent long temps sans que personne y entrast ne en sortist et le premier qui sortit de ladite garde robe fut ledit de Lavanture auquel ce plant demanda ou lesditz sieurs avoit lessé le dit sieur de Beaumanoir / lequel lui respondi quil croyoit quil estoit mort / Et que ledit sieur de La Hunaudaye avoit dit que en sen allant a la chasse audit lieu de La Hunaudaye il lavoit trouvé en une lande pres ladite forest le cheval dudit de Beaumanoir qui estoit sellé / lavoit mandé prandre mes pour ce que celuy cheval avoit rué ledit sieur de La Hunaudaye que celuy sire lavoit lessé et qui lavoit veut sur la selle du celuy cheval du sang / Et ung coup qui avoit esté en ladite selle donne daucun ferrement / Et apres celles parolles ainsy dites dudit de (**f° 251**) Lavanture dist ce tesmoign quil le alloit dire a ladite dame que ce tesmoign ne feust pour celle heure et seullement sen alla ce plant en ladite chambre de ladite dame / laquelle demanda si lesditz sieurs estoient venuz / Et ce tesmoign luy respondi que lesditz sieurs de La Hunaudaye, du Homet et de Syon estoient venuz mes que ledit sieur de Beaumanoir nestoit point venu / Et tout incontinant survint ledit de Lavanture lequel apres aucunes parolles de remonstrance pour loster hors du dueil quelle eust peu prandre dist a ladite dame que ledit de Beaumanoir ne sestoit point rendu audit lieu de La Hunaudaye ne aussi ledit Petit Jehan Bastart et du Breil Et que ledit sieur de La Hunaudaye avoit trouvé le cheval dudit de Beaumanoir en une lande pres la forest la selle duquel estoit toute sanglante / Et par ce que le doubtoit que celuy de Beaumanoir eust esté tué par lesditz petit Jehan Bastart et ledit du Breil / Et lors semble ladite dame dire pareille parolles ou semblables : « Ces traistres sont ilz venuz a La Beraudiere me querir et me fere amener mon mary ceans et puis ha traistres traistres jen auroy la vengeance » / Et lesditz parolles ainsy devers

par troys ou quatre foiz de ladite dame retire celuy de Lavanture et aultres que estoit survenuz voyans ladite dame ainsy desconfortee sen allerent hors ladite chambre et y demoura ce plant / Et lors dist ladite dame a Guillaume Belignet et aultres de ses gens que illecques estoit que lon allast par la forest rerchercher (**f° 252**) si lon trouveroit point ledit de Beaumanoir et pour ce tesmoign avoit luy dist quil ne savoit ou aller quelle dame dist que tout le monde alla le lendemain bien matin a cheval / Et apres ce dist ladite dame a ce plant que le lendemain bien matin et de la vers ledit sieur de Rieux Mareschal de Bretagne luy dire que le dit de Beaumanoir estoit mort et quil avoir esté tué / Et ce plant luy respondut quil noseroit pas dire audit sieur que ledit de Beaumanoir feut mort jucques ad ce que aultrement on en feust certain / Et quil valloit mieulx actandre jucques a celuy lendemain pour savoir sil seroit trouvé ou non / Incontinent se contenta ladite dame Et tantost apre ouyt dire ce tesmoign en les gens de la meson que ledit sieur de La Hundaue avoit dit que lon mandast a labé de Couetmalouan de envoyer des chevaulx de sa charette pour emporter le corps dudit de Beaumanoir en ladite abbaye / Et que ledit sieur de La Hunaudaye luy en avoit fait response que celuy Belignet avoit esté partit et que le lendemain bien matin on y renvoiroit ung homme aultrement ne le surent / Et deffait celuy lendemain au matin celuy Belignet bailla a ce plant lettres quil dist celuy sieur de La Hundaue responce audit abbe de Coetmalouan pour aller querir le corps dudit de Beaumanoir en dist a ce plant que incontinent lesdites lettres feust envoiees audit abbe / ne veut point ce tesmoign lesditz sires de La Hundaue du Homet de Syon ne lun deulx pour celuy soir parler a ladite dame et ne seut si ilz y parlerent avecques elles (**f° 253**) ou non / Et le lendemain au bien matin ce plant estant audit lieu de La Hunaudaye ouyt dire que ledit Esnault Alain Berthelemer et Jehan Rompre estoit allez de par cette heure en ladite forest pour aller sercher ledit de Beaumanoir et quilz avoit passé par labaye de Saint Aubbin et avoit mande deux ou troys des religieux dudit lieu pour le devoir trouvé et bien tost apres veut ce tesmoign lesditez sires de La Hunaudaye du Homet et de Syon monter a cheval mener que aux gens qui estant en ladite meson qui allassent avecques eulx en ladite foret pour fere la recherche dudit Beaumanoir / Et comme ilz voullurent se achemyner dist celuy de La Hunaudaye a Guillaume Boterel son escuier de cuisine qui monsta a cheval et allast a Lamballe devers les gens de la justice dudit lieu leur dire que le dit de Beaumanoir avoit esté tué en ladite forest et le veuseissent veoirs / Et ce fait sen allerent lesditz sieurs et plusieurs de leurs gens ~~de leurs~~ avecques eulx ce tesmoign en leur compaignie en ladite forest / Et comme ilz furent sur chemyn remonterent ledit Esnault ung des religieux de Saint Aubbin lavoit trouvé pres du lieu ou le jour precedant le descompte des chiens avoit esté fait / Et que ce nept pas loing du lieu ou ledit Esnault est a la chasse dun bon git de pierre / Et lors sen allerent lesditz sires et ceulx de leurs compaignie (**f° 254**) dist autre que celuy Esnault leur avoir dit et comme ilz apurcherent dist celuy sieur du Homet quil ny voit prinx plus avant et quilz ne le vouloit print veoirs et se print apleurer et deffait ne fut print le veoirs pour celle henor / Et y furent seullement ledit sieur de La Hunaudaye et aultres de leurs compaignie / Et ne sceut quelle part celuy sieur de Syon tira / Fust celuy sieur de La Hunaudaye veoirs et visiter le corps dudit de Beaumanoir et y fut trouvé par aultant que ce tesmoign peult veoir quatre playes dont il en avoit deux en la poitrine et deux en la teste [...] ung de ses yeulx avoit este creuvé regarda ce plant [...] et veut sur ung chemyn que pres du corps estoit du sangc et [...] en celuy endroit fort baptre et aparaisant que diceluy lieux le corps avoit esté trayné jucques en lieu ou il avoit esté trouvé qui est a distance dun gect [de pierre] / Et apres ce dist celuy sieur de La Hunaudaye quil enmeneroit aller hasté les gens de la justice de Lamballe / Et lors ce tesmoign demanda sil yroit desirant ce tesmoign sen partir pour sen aller a Beaumanoir et fere ce que ladite dame luy avoit dist / Et celuy sieur de La Hunaudaye dist que ouy et quil trouvoit ledit Boterel et que le bastat bien fort, monta ce plant a cheval et sen alla audit lieu de Lamballe et y enmena ledit Boterel

auquel il dist ce que ledit sieur de La Hunaudaye luy avoit donne en charge / Et les fist se abiller pour aller en ladite forest, et lors ce tesmoign print son chemin et sen alla audit lieu de Beaumenoir et diceluy lieu sen alla devers ledit (f° 255) ledit sire de Rieux luy dire ce que ladite dame luy avoit dit / Et dempui ne veu ledit de Beaumenoir / Et ouy dire tout incontinent audit lieu de La Hunaudaye quil avoir esté en sepulture en ladite abbaye de Saint Aubbin / Et que celuy sieur de La Hunaudaye avoit desmandé labber de Coetmalouan aultrement ne le sceut ne aussi de la hayne [...] a esté entre eulx ne de la diligence que ayent fait lesditz sieurs de La Hunaudaye, du Homet et de Syon de prandre lesditz Petit Jehan Bastart et du Breil sauff quil dit que a demy an que ledit sieur de Beaumenoir et ladite dame allassent audit lieu de La Hunaudaye ce tesmoign ouyt dire en la meson de La Beraudière que ung nomme Challans queu de ladite dame avoit este noaize par ledit sieur de Beaumenoir et que celuy sieur de Beaumenoir lavoit voullu baptre / Et a ung aultre jour ensuivant fut present ce tesmoign que ledit Challans se plaignist audit sieur de Syon de celuy de Beaumenoir lavoit injurié et voullu baptre et celuy sieur de Syon luy respondit que ne luy en chailleist, et quil ne mengeroit james ung boiveau de seil pesante / Et quelz chose men seit ainsy signé Jehan de Romperre Da Miffeut.

(f° 256) Du vingt septiesme jour de decembre lan mill IIII^{cs} IIII^{xx} et seix

Charles Rolon demourant pres Beaumenoir eaigé de vingt ans auditionnez que il dit texmoigner jurer dire voir examine et enquis respondre par serment que des le temps dun an et dempui il a veu le sieur du Homet et de Syon a La Beraudiere par plusieurs jours et en ses foiz feisans grant chere avecques lesit sieur de Beaumenoir et avecques ladite dame de La Beraudiere leur mere dempui le temps quilz y fust, et celuy ouyt dire ce tesmoign par aucuns jours que ce tesmoign ne savoir declerez a ung nomme Robert tailleur du sieur du Homet ung nommé Philippe pallefrenier le filz du sieur de La [Me-] dont il ne seut le nom touz serviteurs dudit sieur du Homet a ung nommé Colint valet de chambre dudit sieur de Syon et a ung nommé Villion que celuy sieur de Beaumenoir avoit prins le commendement et le vouloit commender mes quil ne les commenderoit pas tousiours et ny durerent gueres / Et dempui celuy temps et estant le [...] qui fut en moys de septembre deroin fut ce tesmoign present que entre un nommé Challans queu de dudit sire de Beaumenoir et ledit de Beaumenoir y eut debat ne sceut ce tesmoign touchant quoy / Et au debat apres que celuy de Beaumenoir fut sorti de la cuisine ouyt ce tesmoign que ledit Challans se plaignit audit sieur de Syon de ce que ledit de Beaumenoir luy avoit voullu fer / sur laquelle plante celuy sieur de Syon dist que telles parolles ou semblables que ce Challans : « Ne te chaille Challans il ne mangera james ung muy de sel » (f° 257) et aultre chose ne sceut ainsy signe J. de Rompierres Da. Miffeut.

Jehan Le Roy demourant pres Beaumenoir eaigé de trante ung ans auditionnez que il dit tesmoigner jurer dire voir examine et enquis respondist par son serment que un an oncques ce tesmoign estant en la meson de La Hunaudaye en laquelle le sieur de La Hunaudaye, le sieur du Homet, le sieur de Syon, le sieur de Beaumenoir, la dame de la Beraudiere sa compaigne, estoit ung nommé Jacques serviteur de Guillaume Bastart de La Hunaudaye dist a ce tesmoign ne savoit dire a quelle ocasion que ledit sieur de Beaumenoir aydroit prandre le commandement et toute la meson de La Hunaudaye mes que le sieur dudit lieu de La Hunaudaye seroit le maistre que que le vouseist et aultre chouse nen ouyt pour celle heure / Et dempui en [...] deroin passé ce tesmoign estant a La Beraudiere ouyt dire a ung nommé queu de ladite dame estant en la cuisine dudit lieu que ledit sieur de Beaumenoir se eschauffent fort et se debastat avecques ses gens mes quil (f° 258) sen repentiroit quelque jour

/ Et aultre chouse ne luy en ouyt dire ne saussi out parler daucunes menaces aultres que celle dont il a cy davant parler que aucuns aultres ayent donné audit de Beaumanoir / Et est son record ainsy signé J. de Rompierres Da. Miffeut.

Du jeudy vingt huictiesme jour de decembre lan mill IIII^{cs} IIII^{xx} et seix

Vincent le Champion [...] autrefois portier de la meson de la Beraudiere eaigé de vingt ans auditionnez que il dit tesmoigner jurer dire voir examine et enquis respondre par son serment quil y a deuy ans environ quil alla demourer a La Beraudiere avecques ledit sieur de Beaumanoir et ladite dame de La Beraudiere sa compaigne que y estoit et les a serviz dempuix des celuy temps jucques au temps du deceix dudit deffunct de Beaumanoir / durant lequel temps et ung pou avant vendanges deroines que semble a ce tesmoign ung nommé Jehan de Saint Lo [...] demourast lors o ledit sieur et sadite dame dist a ce plant quil esparnoit la hacquenee de ladite dame et (f° 259) que ce seroit pour luy fere ung jour rompre le coul / Et quil le diroient audit sieur et ce tesmoign luy respondit que non fesoit ce que dessurdit a ladite haquenee dont celuy de Beaumanoir fut mal contant de ce tesmoign le batit et frappa a celle ocasion et plus largement leust fait si ce plant ne leust eraché / Et ce tesmoign congoissant que ledit [...] avoit fait ledit raport trouva ce plant ledit [...] a present et le batit / Et apres quil leut baptu alla celuy [...] sen plaindre audit de Beaumanoir lequel respondit audit [...] quil devoit se deffendre et baptu ce plant / Et dicelle response mal se contenta ledit [...] et en ce mal contenant ouyt ce tesmoign que ledit [...] dist a ce plant quil auroit la reson de ce plant / Et que si celuy de Beaumanoir la luy fesoit quil la luy feroit / En disant par telles parolles ou semblables : « Par le sangc Dieu sil ne men fait la reson ung aultre la pourra fere par le sangc Dieu il ne verra pas demy an » en plant dudit de Beaumanoir ne sceut pour quoy ledit [...] dist lesdites parolles et aultres decleracion men fist que ce tesmoign enstendist et avant que ce plant na point sceu ce tesmoign que ledit [...] ait dit lesdites parolles / Dit aultre que deparavant celuy temps il estoit audit lieu de La Beraudiere celuy de Beaumanoir fist par (f° 260) ce tesmoign [...] dun homme qui avoit esté mis dedans lestang / Et comme ce plant le [...] celuy de Beaumanoir quil estoit courousse dont celuy dont celuy fermier y avoit esté mis disant que sestoit pour fere nourrir son poisson hacha ledit fermier / se y rendit ladite dame laquelle voyant ledit fermier ainsy haché fut couroussee, nen courroux dist par telles parolles ou semblables : « Mauldit soit leur je vous prins avecques avez vous ainsy abiller mon fermier ? ». Et celuy de Beaumanoir respondit quil sestoit assez comme pour fere nourrir tout le poisson de lestang et sen alla / Et aultres parolles ne aultres menaces na sceu ce tesmoign questant este dites ne vuees audit de Beaumanoir par quelque personne que soit / Et est son record ainsy signe J. de Rompierres Da. Miffeut.

(f° 261) Thebault Guillet jardinier eaigé de vingt troys ans auditionnez que il tesmoigner jurer dire veoir examine et enquis respondre par son serment que environ la Saint Jehan deroine et un pou avant que lon feust laougst ce tesmoign estant en la meson de La Beraudiere en laquelle il demouroit avecques les sieurs et dame a ung jour sur sepmaine que ce tesmoign ne savoit declerez auquel lieu estoit paroillement le sieur du Hommet de ung nommé [Philippe] son serviteur ouyt que entre le despanner de ladite meson nommé missire Jehan [...] et ledit Philippe y eut parolles touchant le reffus que celuy ? Jehan avoit faut audit Philippe de luy bailler ce que ledit Philippe luy avoit demandé comme par ung et aultres chouses que lesquelles parolles et ledit Philippe estant en la salle dudit lieu, dist celuy Philippe que ne pouvoit riens autre a lostel et que le seigneur de Beaumanoir avoit deffendu que lon ne baillast riens sil ne le commandoit / mes que lesdit sieur ne vieneroit gueres et ne leur partiroit plus gueres leur

pain / Et en disant lesditz parolles y avoit plusieurs gens en ladite salle dont ce tesmoign nept souvenant des noms lesquels peurent bien ouir lesdites parolles ainsy que ce tesmoign fist / Dit aussi que environ celuy temps quil veut ledit sieur de Beaumenoir noaizer avecques Guillaume [...] boullengier de ladite meson disant celuy de Beaumenoir que celuy ? donnoit ou vendroit sa farine et aussi quil avoit mis en sa boullengerie une putain et que celuy [congre] se gronderoit aucunement / Et sur telles parolles nommé (f° 262) ledit de Beaumenoir sen allast de ladite boullangerie droit a la salle de la meson ouyt ce tesmoign que celuy congre dist par telles parolles ou semblables en parlant dudit de Beaumenoir : « Par le sangc Dieu, il ne nous gouvernera gueres, il en sera fait ung paste par le sangc Dieu, je ne demande que de faire ung coup de manan pour men aller ». Dit aultre que au moys daougst deroin ce tesmoign estant abecher le jardin de ladite meson appellé le jardin de lermittaige, une nommé Regnee femme de chambre de ladite dame se rendit a ce plant et luy dist que le sieur de Beaumenoir estoit bien mary avecques elle sans luy declere la cause pour quoy mes que si ledit de Beaumenoir ne prenoit aultre train que celuy quil avoir prins quil ne vueroit gueres / Et que ce plant estant plus pres de La Hunaudaye quil nestoit de Beaumenoir / Et que quant ledit sieur de Beaumenoir seroit mort que ladite dame ne lesseroit point aller ce, et que ce plant devoit estre avecques ceulx de La Hunaudaye disante que les enffans de ladites dame ne aymoint point ledit de Beaumenoir / Et que ladite dame se repentoit de lavoit prins / Et sept ou huict jours apres ce tesmoign estant audit jardin se y rendit ladite dame faisant bonne chere et dist a ce plant par telles parolles ou semblables : « Par Dieu Thebault je me repens de avoir (f° 263) prins vostre mestre, il ne me verra gueres car il ne fait point bonne chere a mes enffans, ne vous souciez Thebault, par Dieu, vous ne bougeres james davecques moy » / ne sceut ce tesmoign par quelle cause ladite dame luy dist lesdites parolles / Et a icelles ne respondist ce tesmoign aucune chouse a ladite dame. Et deux ans deparavant ce tesmoign estant avecques ledit de Beaumenoir et ladite dame en la meson de Longle veut ladite dame fort courousee ne sceut ce tesmoign pour quoy et ouyt en un endroit que ladite dame dist en plourant quelle se repentoit de avoir pris ledit de Beaumenoir et dist lesdites parolles audit de Beaumenoir en une chambre de la meson ou ilz estoit / ne ouyt point ce tesmoign que celuy de Beaumenoir luy respondist / Et dempuix le deceix dudit deffunct ce tesmoign estant a La Beraudiere ladite dame la encore envoier querrir par par ung scellee Jugon dont ce tesmoign ne sceut le nom pour aller devers elle / Et pour ce que ce plant ny alla point en lenvoya encore querir par Guillaume de La Chausee cherboner ainsy que Jacques de Labaye luy a dit / Et que elle avoit grande [ame] de avoir ce plant et [...] ne luy deut ce tesmoign ne a veu ladite dame / Et est son record ainsy signé J. de Rompierre Da. Miffeut.

(f° 264) Pierres Sillant demourant en la paroesse de Plebehen en levesché de Treguier eaigé de cinquante troys ans auditionnez que il dut tesmoigner jure dire voir examine et enquis respondre par son serment que la sepmaine deroine du moys de novembre deroin, en laquelle sepmaine estoit la feste de saint André il fut a Lentreguier deux compaignons quil ny avoit point venuez de paravant demande aultres gens que illecques estoit que ce tesmoign ne scavoit a present nommez qui estant lesditz compaignons avoit luy lun chappeau blanc et le tenoit sur larriere de la teste / ne seut a present quel abillement avoit lautre / Et lors fut dit a ce tesmoign que se sont ceulx qui avoint tué le seigneur de Beaumenoir donne la bannie avoit este faite celuy jour aucunement nen a eu congnoissance / Et le veu davant nommé deroin ce tesmoign retourna audit lieu de Lentreguier / Et ouyt dire a plusieurs quil ne savoit nommez que ceulx qui avoint tué ledit sieur de Beaumenoir sen estoit allez / Et que ung nommé Henry

le Chandon les avois menez par mer jucques a Porhouet³⁷ aultrement ne le seut ainsy signé J. de Rompierres Da. Miffeut.

(f° 265) Jehan Hualen demourant en la parouesse de Plebihen levesché de Treguier eaigé de quarante ans tesmoigner jurer dire voir examine et enquis respondre par son serment que la la sepmaine deroine du moys de novembre deroin en laquelle sepmaine estoit la feste de Saint Andree il fut a Lentreguier y voit deux compaignons quil ny avoit point veuz deparavant / demanda ce plant a des gens que illecques estoit que ce tesmoign ne savoit a present nommez qui estoit lesditz compaignons, avoit lun ung chapeau blanc et le tenoit sur l'arriere de la teste / ne seut a present quel abillement avoit lautre / Et lors fut dit a ce tesmoign que sestoint eulx qui avoit tué ledit sieur de Beaumanoir dont la [bannie] avoit esté faite celuy jour aultrement nen a eu congnoissance / Et le vendredy davant nouel deroin ce tesmoign retourna audit lieu de Lentreguier / Et ouyt dire a plusieurs quil ne savoit nommez que ceulx qui avoint tué ledit sieur de Beaumanoir sen estant allez et que ung nomme Henry le Chamdon les avoit menez par mer jucques a Porhouet aultrement ne le seut / Et est son record ainsy signé J. de Rompierres Da. Miffeut.

(f° 266) Guillaume le Bozer de la parouesse de [Lemmanden] en levesche de Dol eaigé de vingt sept ans auditionnez que il dit tesmoigner jurer dire voir examine et enquis respondre par son serment que au commencement de ce moys de decembre en la fin du mois de novembre deroin que ce tesmoign sen alloit de sa meson de Lentreguier trouva sur le chemin deux hommes quil ne congnoist mes ouyt sen appeler Petit Jehan et lautre du Breil aultrement ne seut leur nom quelz diserent a ce plant quilz sen alloint a Lentreguier ce plant leur respondit quil se en alloit aussi / Et deffait assemblement sen allerent jucques audit lieu de Lentreguier et se tindrent en franchise / Et peu de temps apres et en celuy jour ouyt dire ce tesmoign quilz avoit confesse avoir fait ledit meurdre sellond et en la maniere quil est convenu en une [cas] laquelle ce tesmoign veit / Et ne leur ouyt oncques avecques dire que aultres les eussent fait fere ne quilz leussent fait pour le [...] dautrouy / Et dempuix que ceulx dessus nommez tenans franchise sen estant allez plant et que ung nommé Henry Chandon les avoit menez aprochain aultrement ne le seut / Et est par son record ainsy signe J. de Rompierres Da. Miffeut. [...que ce fut en la fin du moys de novembre deroin appert].

(f° 267) Du mardy second jour de janvier lan mill IIII^{cs} IIII^{xx} sept

Guillaume Beliquet demourant avecques la dame de La Beraudiere eaigé de trante ans auditionnez que il dit tesmoigner jurer dire voir examine et enquis respondre par son serment que a la ruee que firent deroinement le sieur de Beaumanoir et ladite dame de La Beraudiere sa compaigne en la meson et chasteau de La Hunaudaye quelle acoure fut a ung jour de mardy de la deroine sepmaine de decembre deroin que semble a ce tesmoin, ce tesmoign fut present et y ariva avecques lesditz de Beaumanoir et sa compaigne et estoit partiz dudit lieu de La Beraudiere lesditz mardy precedant et audit lieu de La Beraudiere avoit esté plusieurs temps par avant le sieur de La Hunudaye, le sieur du Homet et le sieur de Syon freres et y estoit establiz et y avoint fait grant chere jucques au jour quilz prindirent chemyn a sen aller audit lieu de La Hunaudaye / Et que a la ruee quilz firent audit lieu de La Hunaudaye fut fait grant chere entre lesditz sieurs dames et et damoiselles dudit lieu quelle chere dura jucques au lundy

³⁷ De Tréguier, en descendant le Jaudy, nous retrouvons plus en aval un toponyme « *Pen ar Hoat* » qui pourrait bien constituer ici le lieu de dépose.

ensuivant montrants pleins signes et manieres que lors ilz fesoient avoir grant amour et dillection ensemble furent a la chasse par chacun desditz jours dempuix celuy mardy jucques audit jour de lundy que semble a ce tesmoign que soit la pluspart diceulx jours encore eussent (f° 268) comunicacion et siggnatacion ensemble a boire et a menger en ladite meson et en la meson dun nommé Belouy poursuyvans dudit sieur de La Hunaudaye en laquelle celuy sieur de La Hunaudaye fist banquet audit de Beaumanoir et a ladite dame / Et fut ce tesmoign institué par ledit sieur de La Hunaudaye mestre dostel pour ledit bancquet et avecques ne eut ce tesmoign congnoissance que eulx y eust hayne inimitié et rancueur ne rencueur en aucune maniere / Et dit que celuy jour de lundy ce tesmoign estant audit lieu de La Hunaudaye au service de escuyer de cuysine pour ledit sieur de Beaumenoir et ladite dame de La Beraudiere sa compaigne ouyt dire a aucuns des gens dudit sieur de La Hunaudaye dont ce tesmoign ne savoit a present fera la nominacion des le matin diceluy jour que lesditz sires devoit aller a ladite chasse en la forest dudit lieu de La Hunaudaye pour prendre ung sanglier. Et que lesditez sires du Homet et de Syon estoit allez davant pour fere la visee et recherche dudit sanglier et tantost apres veut ce tesmoign lesditez sires de La Hunaudaye et de Beaumenoir en la cuysine dudit lieu de La Hunaudaye y desjeunerent assemblement et leur ouyt dire ce tesmoign quilz sen alloint a la chasse en ladite forest et que lesditz sires du Homet et de Syon estoit allez devant pour fere ladite visse / Et apres avoir desjeuné monterent ceulx sires de La Hunaudaye et de Beaumenoir a cheval sen allerent hors dudit chasteau disans aller (f° 269) a la chasse / Et demoura ce tesmoign audit chasteau et durant le temps quilz furent a ladite chasse et luy semble que ce fut comme lheure de mydy ce tesmoign estant en ladite cuysine pour venir fer abiller le soupper desditz sires et dame davant nommez ouyt que une daoyelle nommez Jehanne de Marennes³⁸ delmourante o ladite dame demenda a des gens que illecques estoit si lesditz sires estoit point venuz de la chasse et disent que ladite dame sen esmeuvoit fort et laquelle fut respondu tant par ce tesmoign que aultres quilz nept point venuz / Et est assez tost apres veu ce tesmoign audit lieu de La Hunaudaye ledit sieur de Syon et aultres des gens de la meson de La Hunaudaye quilz disoient avoir esté celuy jour a la chasse en ladite forest et demanda celuy sires de Syon a ung nommé Allan Bertlemer avoir a boire / Et incontinant alla celuy Allan lui en querir / Et encore nestoient point venuz lesditzs sires de La Hunaudaye de Beaumenoir et du Homet dont ce tesmoign eut congnoissance / Et ung peu apres la ruee que fist celuy sire de Syon audit lieu de La Hunaudaye ce tesmoign demanda au bastart de La Haye Eder si ilz estoit touz venuz et chiens tant celuy bastart luy respondit que ouyt et est environ deux heures apres (f° 270) mydy ne veut lesditz sieurs mes veut les gens que les avoit menez. Et pour ce que ce tesmoign ne veut point lesditz sires de La Hunaudaye et du Homet demanda ou ilz estoit. Et il luy fut respondu ne seut par qui que ledit sire de La Hunaudaye avoit ouy un chien chasser et quil y estoit allee sans declerez quel lieu / Et a celle occasion retarda ce tesmoign la preparation du soupper et apres avoir retardé par un espace de temps ouyt ce tesmoign que aucuns des gens de ladite meson diserent que ledit sieur de Syon demandast avoir a soupper disant quil avoit esté apre a la chasse et avoit talent de menger³⁹ / Et aussi a celle heure leur ouyt dire que lesditz sires de La Hunaudaye du Homet et de Beaumenoir pouvoit bien sen estre allez en quelque bonne meson en ladite forest et quil valloit mieulx que ledit sieur de Syon souppast que actendre lesditz sires de La Hunaudaye du Homet et de Beaumenoir plus longuement et lors ce plant dist quil ne le croyoit pas / Et que si celuy sire de Beaumenoir eust voullu allez soupper en quelque autre lieu que audit lieu de La Hunaudaye quil leust mandé a

³⁸ Audtionnée dans les précédents jours (f° 193-198).

³⁹ Sur le terme « Talent » dans le dictionnaire de Moyen Français : « *en talent de qqc. : désireux de faire telle chose* ».

ladite dame sa compaigne / Et que ainsy il avoit acoustumé de fer / Et que apres ce quil nen avoit riens mande et lesditz sires de La Hunaudaye et du Homet se rendirent audit lieu de La Hunaudaye / Et bien tost avoir ouyt de recheff ce tesmoign que ladite Jehanne de Marennes demanda es gens de ladite meson (f° 271) que illecques estoit si lesditz sires estoit point venuz disante que ladite dame en estoit bien esbahye et sen esmeyroit fort laquelle fut respondu par ce tesmoign que ledit sieur de Syon estoit venu et non les aultres / Et bien tost apres celle dame envoia querrir celuy sieur de Syon quil y alla a ung peu de temps apres ouyt ce tesmoign que ledit sieur de Syon ~~Hunauda~~ demanda avoir asoupper ce que luy fut fait / Et tout incontinant et encore leure de deux heures apres jour couché avoir ouy dire ce tesmoign audit lieu de La Hunaudaye ou il estoit que lesditz sires de La Hunaudaye et du Homet estoit venuz / Et sur ce sen sortit ce tesmoign hors de la cuisyne ou il estoit et a la sortie trouva le bastart de La Haye Eder lequel dist a ce plant par icelle parolles ou semblables : « Monsieur est mort ». Et ce tesmoing luy respondist : « Nous nen [fymes] pas bien ». Et incontinant sen alla ce plant en la chambre de ladite dame et apres len amenerent ledit de Lavanture et sur lescquartement lesditz sires de La Hunaudaye et du Homet et a la ruee que fust celuy sire de Lavanture en la chambre de ladite dame dist quil croyoit que pour tant que le sieur de La Hunaudaye avoit dit atentre quel fist quil avoit trouvé sur les champs (f° 272) pres ladite forest le cheval dudit de Beaumanoir la selle duquel cheval estoit rempue dudit cheval soit senglant et lesdites parolles ainsy dites se escarta ladite dame feisante grandes lamentacions et dist pareilles parolles ou semblables : « A traistres » et en disant ses parolles a ce termoing : « Ha Guillaume, donnez vous garde de ma bouche et ne me lessez point ». Et bien tost apres se rendirent en ladite chambre lesdites sires de La Hunaudaye et du Homet en pleurant et pensant. Et lors demanda ladite dame audit de Treal si ledit sieur de Beaumanoir est mort ou non Et celuy de Treal ~~rendit~~ dist quil estoit mort sans declerez coment / Et a celle heure ne ouyt point ce tesmoign que lesditz sires de La Hunaudaye du Homet ne lun deulx parlassent avecques ladite dame / Et lesdites lamentacions et parolles ainsy dites furent lesditz de Lavanture, de La Hunaudaye et du Hommet sen sortirent de ladite chambre et y demeura ce tesmoign avecque ladite dame / Et cele nuyt ne dormerent point ladite dame ce tesmoign ne aultres ses gens durant celle nuyt et encore le matin commanda celle dame a ce tesmoign [res-gre] a labbe de Cuoetmalouan de aller querir le corps dudit de Beaumanoir et fere porter a labaye dudit lieu / Le dist ce tesmoign audit sieur de La Hunaudaye lequel dist a ce plant que ce seroit bien fait celuy jour escripit ce plant une lettre [sub-zan] audit abbe et les fist signers audit sieur de La Hunaudaye esquelle estoit contenu que ladite dame prioit ledit abbe de aller (f° 273) querir le corps dudit Beaumanoir pour enmener avecques luy en ladite abbaye / Et aussi escripit une aultres lettres a la dame de la [...] par lesquelles il luy escripit [...] ledit abbe. Et paroillement escripit ce plant de soy meime audit abber lamané de fer lenterement dudit Beaumanoir. Et oultre a ung aultre jour ensuivant escripit ce plant par le mandast de Louyse de la Ville Thebault⁴⁰ a une dalme qui estoit audit lieu de Beaumanoir laquelle elle appelloit son aute. Et aussi reescripit ce plant a ladite dame une aultre lettre et les signa ladite dame / E a present ce luy ont esté lesdites lettres monstrez / Et congneu les autres escriptes par chacun des jours en icelle contenuz et le landemain qui estoit le mardy des le bien matin ouyt dire ce tesmoign a Guillaume Boterel que estoit honze et [espouce] quil sen allerent a Lamballe pour querir les officiers dudit lieu a aller en ladite forest veoirs visiter le corps dudit deffunct de Beaumanoir / Et le veu ce tesmoign sortir dudit chasteau / Et tantost apres veut ce tesmoign que lesidtz sieurs de La Hunaudaye du Homet et de Syon sen allerent hors ledit chasteau diserent aller en ladite forest pour fere serche dudit de Beaumanoir et deffait se y en allerent

⁴⁰ Louise de La Ville Thebault, 20 ans, damoiselle de Marie de Villiers auditionnée plus haut (f° 204-206).

ce tesmoign et plusieurs autres en leur compaignie / Et en y allant fut dit par ung homme ~~apre~~ dont a present nept souvenant (f° 274) du nom / Et lequel remonterent sur le chemyn que le corps dudit de Beaumanoir avoit esté trouvé en ladite forest et quil avoit esté tué / Et lors ce plant commanda au ~~bas~~ bastart de La Haye Eder aller anoncer les officiers de la court de Lamballe quel y alla / Et deux heures apres autres y arriverent lesditz officiers entre lesquels est le procureur dudit lieu / Et ce peult nestoint lesditz sieurs de La Hunaudaye et du Homet en une meson pres ladite forest en laquelle demoure Thomas le Bourdaz / Et eulx assemblez allerent veoirs le corps dudit deffunct venoient la visitacion que les gens de justice de Lamballe / Y firent fer ung barbier que illecques estoit / Et ce fait fut mis en une chambre et partit par le commandement dudit sieur de La Hunaudaye jucques en labayye de Saint Aubbin a distance de la Hunaudaye dune lieue audtionnez et est son record ainsy signé J. de Rompierres Da. Miffeut.

(f° 275) Du septiesme jour de janvier lan mill IIII^{cs} IIII^{xx} sept

Tristan Le Monier escuier eaigé de trante cinq ans auditionnez que il dit tesmoigner jurer dire veoir et enquis respondre par son serment que des le temps que feu Jehan Eder sieur de Beaumanoir fut marié avecques la dame de La Beraudiere encore vivante qui fut troys ou quatre ans a comme semble a ce tesmoign il alla demeurer avecques ledit deffunct Jehan Eder / Et dempuix celuy temps jucques au temps de son deceix ya ce tesmoign demeure continuellement. Et dit que environ la Toussains deroine passerent et ung peu avant ce plant veut le sieur de La Hunaudaye et ses freres en la meson de La Beraudiere avecques ledit de Beaumanoir et ladite dame sa compaignie y furent et tiendroit residance jucques en la sepmaine qui fut la feste de saint Andree deroine / Et questoit environ la fin du moys de novembre deroin / Auquel temps ilz se rendirent ainsy que ce tesmoign a seu de jour pour dire en la meson de La Hunaudaye dit que durant quelz furent assemblement audit lieu de La Beraudiere ledit sieur de Beaumanoir qui avoit grant senor a ce plant luy dist que ledit sieur de La Hunaudaye lavoit requis et aussi ladite dame de La Beraudiere de aller avec luy en la meson de La Hunaudaye / Et quil leur avoit remonstrer que sa meson se gardoit mal Et y avoit beaucoup de gens dont il ne avoit que faire. Et les avoit priez dy mettre la pension / Et dist celuy (f° 276) de Beaumanoir a ce plant par apart quil ny vouloit point allez et quil sen vouloit allez a Longle⁴¹ a La Haye et a Beaumanoir pour fer ses besougnes mes que ce plant nen dist riens / Et dist que quant le sieur de La Hunaudaye et ladite dame seroient partiz dudit lieu de La Beraudiere pour aller audit lieu de La Hunaudaye que il ce plant sen yront audit lieu de Longle / Et apres dist celuy de Beaumanoir a ce plant quil avoit a besougnez et dit a ladite dame sa compaignie en la presence dudit sieur de La Hunaudaye quil avoit a besougnez avecques le Mareschal de Bretagne⁴² o lequel il luy aimeroit parler pour aucuns ses affaires aussi avoit a lenseigner o les receveurs desditz lieux de Longle, de La Haye et de Beaumanoir et les vouloit fere acompte pour tant quil ne luy avoit rendu compte du temps de quatre ans par avant/ et pour ce quil ne ~~eust~~ eust peu aller avecques ladite dame jusques audit lieu de La Hunaudaye pour la y conduire mes quil luy avoit promis quil se y rendroit apres que il eust [lecs-gne] avecques les dessus nommez/ Et ladite dame luy avoit respondu en jurant le corps de Dieu que celuy de Beaumanoir yroit avecques elle ou quelle ny entreroit pa, et aussi que celuy sieur de La Hunaudaye lavoit prié si affectueusement de y aller en lappelant son pere quil navait o se lestourdire et quil dist outre celuy de Beaumanoir a ce plant qui nestoit point contant de y aller (f° 277) et quil avoit

⁴¹ Seigneurie de Longle ou L'Ongle sur la commune de Genrouët (Loire-Atlantique).

⁴² Jean IV de Rieux, maréchal de Bretagne.

intencion de aller par les lieux davant diz et y eust este encore deux moys et que quant ladite dame eust sceu que ledit de Beaumanoir eust esté audit lieu de Beaumanoir quelle se y feust rendu / Et ce plant luy dist que voire / Et lors celuy de Beaumanoir dist a ce plant que puix quil lavoit pris a ladite dame sa compaigne quil y iroit / Et aussi dist quil sen allast devers ledit Mareschal luy dire la matiere de celle aller / Et diceluy lieu sen allast esditz lieux de Longle, de la Haye et de Beaumanoir qui appelast les officiers desditz lieux et chacun feust emporter lesditz receveurs / Et ce fait que ce plant sen retournast le plus tost quil eust peu / Et quelque chere que ledit sieur de La Hunaudaye ne ladite dame luy feist quil ne seroit point a son aise jucques ad ce que ce plant feust retourner / Et des celle heure qui estoit encore leure de huit ou neuff heure du salemady matin se partirent dudit lieu de La Beraudiere et lesditz sieurs de La Hunaudaye, de Beaumanoir et sa compaigne et le sieur de Syon et leurs gens disans aller audit lieu de La Hunaudaye / Et tantost a present nommé leur de onze heure partit ce plant et sen alla audit lieu de Longle et diceluy lieu a La Haye et de La Haye a Nantes et oudit voyage fut par le temps de doze jours et anonca (**f° 278**) a son retour quil avoit intencion de fere audit lieu de La Hunaudaye ainsy que ledit de Beaumanoir luy avoit commandé jucques a Jugon a ung jour de mercredy qui fut a la vigille de Saint Andree / Et lors ouyt dire ce plant audit lieu de Jugon tout communement que ledit sieur de Beaumanoir estoit mort et quil avoit esté tué en la forest de La Hunaudaye le lundy precedant [...] par Jehan du Breil et Petit Jehan Bastart de La Hunaudaye / Et le soir diceluy jour ouyt dire ce tesmoign a Pierres Ferron soubz garde de la forest dudit lieu de La Hunaudaye que celuy sieur de La Hunaudaye lavoit envoyer querir pour aller devers luy sans declerez par pour quelle cause mes quil ny estoit point aller pour ce quil ne avoit point de cheval en sa meson / Ainsy luy dist que le mardy precedant devers le matin que [...] soleil levant il se estoit rendu audit lieu de La Hunaudaye sur le pont de laquelle meson il avoit trouvé ledit sieur de La Hunaudaye / lequel luy avoit dit que des le soir precedant il avoit envoyer querir ledit soubz garde pour fer sercher par ladite forest ledit de Beaumanoir qui estoit mort et y avoit esté tué / nest menbré si celuy sieur de La Hunaudaye luy declera par qui ne aussi si ledit soubz garde le dist a ce plant / Et apresent que ce plant eust esté par aucun temps audit lieu de Jugon et que ladite dame eut sceu que ce plant y estoit parlé le raport de Guyon Rohan qui sen alla (**f° 279**) dudit lieu de Jugon a La Hunaudaye celle dame manda a ce plant par ung homme [selliers] demourast audit lieu de Jugon que ce plant allast devers elle que elle desiroit fait parler a ce plant / Et ce plant dist pour dire a ladite dame quil yroit point audit lieu de La Hunaudaye pour quelque chose que lon luy mandast mes dist dire a ladite dame que gardast bien la [...] audit de Beaumanoir et que y avoit plus de deux mill francs vaillant et des lettres pour ledit sieur de Beaumanoir quil failloit bien garder / Et celuy jour passé sen alla ce plant le lendemain a ce matin a Lamballe / et diceluy lieu jucques a Beaumanoir dit oultre que durant le temps qui a esté avecques ledit sieur de Beaumanoir et ladite dame sa compaigne il a ouy dire a plusieurs que ce plant ne savoit a present nommez et que ledit seigneur de La Hunaudaye et ses freres heroient ledit de Beaumanoir et que ledit sieur de Syon avoit dit quil ne cesseroit james jucques ad ce que en eust le coeur / Et aultre dit ce tesmoign que encore de temps de Pasques deroine seu ce que ladite dame envoya dire par Pierres de Champran son mestre dostel audit de Beaumanoir que donast de l'argent pour payer des cyerges que ladite dame avoit fait prandre pour servir aux eglises celuy de Beaumanoir fist maniere destre couroussee de ce que ledit de Champran luy avoit dit et sen retourna celuy de Bergeau / Et apres il retournoit (**f° 280**) luy demanda ce plant pour quoy le dit de Beaumanoir avoit moaize / Et celuy de Bergeau dist que se estoit pour les cierges que ladite dame avoit fait prandre / Et que ladite damme seroit plus gueres ainsy / Et quelle se declereroit avant quil feust gueres de temps et avoit son bien a commender quant elle voulist sans aultrement declerez ne imprecacion fere desdites parolles / Et est son record ainsy signé J. de Rompierres Da. Miffeut.

(f° 280) Ledit Tristan Nepveu tesmoign prochain interosger rencquis par Jehan du Boays leiutenant de la court de Rennes en ma compaigne Jehan Pares lun des clercs doffice / le septiesme jour de fevrier mill III^{cs} IIII^{xx} sept touchant [la declaration] ou il parlé par son record et dit avoir ouy dire a plusieurs personnes que lors ne savoit nommez que lesditez sieur de La Hunaudaye et ses freres heroint ledit feu sieur de Beaumanoir et que ledit sieur de Syon avoit dist que james ne cesseroit tant que il en eust le cueur. Interogé si dempuix sondit record porté il sest aucunement recollé de ceulx a que en avoit ouy parler de la maniere dit ne deposer que en plant avecque (f° 281) le Mareschal de Bretagne au temps que adessus conffire ledit Mareschal en demanda ou estoit ledit sieur de Beaumanoir qui luy avoit dit qui se partoit dudit lieu de La Beraudiere avecque la dame diceluy lieu le sieur de La Hunaudaye et ses freres pour eulx sen aller au lieu de La Hunaudaye demourez, a quoy luy avoit dit ledit Mareschal que mieulx luy vauseist ny hanter pas et sen alla en lune de ses mesons et que ledit sieur de La Hunaudaye et sesditz freres ne laymoit point quelque chere quil luy fussent pareillement dit que la dame de Pont Chasteau plusieurs fois luy a dit que quil dist audit sieur de Beaumanoir quil ne se asseurast point audit sieur de La Hunaudaye et ses freres et que pas ne laymoit / Aussi dit avoir ouy dire dempuix le deceix dudit de Beaumanoir [am-get] de Beaumanoir quelle estoit seur du peu dudit sieur de Beaumanoir quelle avoit ouy dire a ung gentilhomme quelle me nomma que dist avoir ouy dire a Jehanne Manteron dame de la Coste en la parouesse de Plaintel que celle Jehanne avoit ouyr dire a ung aultre gentilhomme que elle ne luy nomma que iceluy gentilhomme dist avoir ouy dire audit sieur de Syon que il boiroit une foiz le cueur dudit sieur de Beaumanoir et dit autre ouy dire a Joachim de Beaumanoir frere dudit deffunct que le procureur de Lamballe apres le meurtre avenu dudit de Beaumanoir avoit fait toucher ledit sieur de La Hunaudaye et le sieur du Homet son frere aux plaies que ledit sieur de Beaumanoir (f° 282) avoit au corps / Et que aussi tost lesdites playes avoit saigné⁴³ et fut ce en la forest de La Hunaudaye ou a labaié dont a cu davant est parler / ne a ouy aucunes menaces aultres que les des- eussent donne audit deffunct et Beaumanoir / Il en dit plusieurs foiz autre veu ladite dame de La Beraudiere maudire leur que james ledit sieur de Beaumanoir luy avoit riens esté / Et a aucunes dicelle foiz le feisoit et dist pour ledit sieur de Beaumanoir noisoit avecques aucuns de ses gens delle et a une autre foiz pour tant que ledit sieur de Beaumanoir nestoit aller avec ledit sieur de La Hunaudaye a Callac dist que il le avoit lessé aller seul a Callac disant que il le avoit lessé aller seul et [...] nest ce que depose.

Yvonnet bastart de La Haye Eder requis que dessus ledit septiesme jour de lan susdit dit en ce que les lettres par luy prit du commandement dudit sieur de La Hunaudaye labé de Coetmalouan que le mardy prochain dont sestoit ensuivant la mort audit de Beaumanoir le lundy avant environ huict heures dudit jour de mardy il bougea dudit lieu de La Hunaudaye a aller porter lesdites lettres audit abbé ou y a de distance environ onze lieues / Et apres quil eut presenté lesdites lettres (f° 283) audit abbé dit que les leut hault ahouy de ce deposant et lors que les porta estoit closes et dit que par icelle estoit contenu que ledit sieur de La Hunaudaye feusoit savoir audit abbé quil lallast querrir le corps dudit sieur de Beaumanoir qui estoit mort en la forest de La Hunaudaye / Et dist ce plan que a leur du partement que fist environ de la [...] le corps audit feu de Beaumanoir ne avoit esté encore trouvé / Interosger touchant les parolles que par fera ledit sieur de Syon [...] de la dame de La Beraudiere estant audit lieu de La Beraudiere / Dit que lesdites parolles ainsy qui a parler / Dit par son [...] les ouyt dire par [...]

⁴³ Croyance de la cruentation selon laquelle les plaies d'un cadavre recommencent à saigner en présence de l'assassin de celui-ci.

par ledit sieur de Syon [...] a plant dudidit de Beaumenoir / Et que james celuy de Beaumenoir ne y mangeroit ung boexcau de sel / ne a james ouy aucunes aultres menaces outres celle que [...] donnees dudidit sieur de la Hunaudaye et ses freres audit feu de Beaumenoir / Item dit que fut presant quant le corps dudidit de Beaumenoir fut trouvé mort en ladite forest et y est present le sieur de La Hunaudaye, le sieur du Homet ne leur veut toucher autre playes audit de Beaumenoir ne seut que y eussent en aucun endroit toucher / pour parler ne aultrement ne que en y touchant lesdites playes eussent saigné et rendu sangc / Item que environ ang an deroin passé des environ de jour de la Saint Cler (**f° 284**) que ledit de Beaumenoir et ladite dame estoit au lieu de Longle menerent parolles et debat entre eulx sieur et dame ne ceut a quelle ocasion et dist celle dame audit de Beaumenoir que ledit de Beaumenoir nespt pas disgne de lavoir et luy donna celle dame de la main enpreite sur le visaige et fut sur ce que ledit de Beaumenoir dist a ladite dame quil estoit aussi gentilhomme que elle estoit gentille femme pour luy dist ladite damoyse que se il luy touchoit que luy couperoit la gorge et dit que ledit de Beaumenoir se coucha au lit et pour que celle dame ne feisoit que noaise se leva incontinant sur un banc et fist coucher ce plant en ladite chambre ce que ne avoit de coustume. Et ung pou avant jour se coucha au lit avec celle dame et est ce que depose.

(**f° 285**) Partie de lenqueste fecte par la court de Rennes en vertu dune commision et mandast du duc notre souverain sire et son Conseil touchant le meurtre et homicide commis [...] en la personne de feu Jehan Eder escuier en son vivant sieur de Beaumenoir icelle faicte par moy Jehan du Boays lieutenant de ladite court appellé en ma compaigne Jehan Pares lun des greffiers doffice dicelle le cinquiesme jour de mars lan mill IIII^{cs} IIII^{xx} seix [sic] et aultres jours diceluy moys ensuivants.

Henry Le Chaton de la parouesse de Plebihen⁴⁴ en levesche de Treguier eaigé de [...] quatre ans ainsy qui dit jurer dire voir enquis dit james ne avoit eu cognoissance dudidit de Beaumenoir desditz Petit Jehan Bastart et Jehan du Breil ne de lun dessus / Et dit que environ la feste de Saint Andre deroin passee ung jour de salemady que environ neuff ou dix heure avant mynuyt ce plant estant et le tout des gens de sa meson couchez en les litz y asonast a luys dicelle meson laquelle est assez pres ~~de la rue~~ de la mer, gens a luy incongneuz que appelerent audit huys [porte] ne (**f° 286**) deposant quil nestoit encore endormy les ouyt et demanda quilz estoit quels luy demanderent si estoit la meson de Henry Chaton, lequel leur respondit que ouy, et sur tant se leva du lit, aluma du feu et a iceulx incongneuz fist du feu [emp-ture] dudidit huys et en sadite meson entrerent deux hommes quelx il ne congneut / Et james jucques a lors ne les avoit veuz ne congeuz lesquels il dit que estoit vestuz dune robe ample de drap gris sur le bout et lautre dune robe de drap sur le talon ample estoin longues jucques entre les genoux molais avoit chacun deulx une jarequetiere desoubz les robes ne seut silz estoit fort double de drap ou amples lune desquellle estant de drap ne seut silz estant de drap vermeil [rouge vif] et lautre ne sceut dire de quelle coulleur estoit ne aussi de quelle longueur estoit lesdites jacquetiers desoubz les robes chacun ung grant coustras pouvait et meisme chacun sa [...] et avoint des chapeaux ne sceut de quelle coulleur chacun deulx bonnet [...] estoit lun deulx grasset et assez petite stature et avoit le visaige assez blanc et lautre estoit plus hault ung po ne seit dire de combien nestoit plus [...] eaigé que lautre en assez fade coulleur et plus ancien que lautre nestoit le plus eaigé plus encore que lautre et avoit de (**f° 287**) de eaigé ainsy quil peut estimer de trante a quarante ans lautre de vingt ans a trante ans lesquels demanderent a ce plant si il vouloit que acquer de largent avecques eulx a les passer jucques a Saint Malo de lisle ou au

⁴⁴ Commune dans les Côtes-d'Armor, Pleubian en face de l'île de Bréhat.

bourg d'Erquy⁴⁵ de quoy [...] que parler fut contant et disoient iceulx incongneux que venoient de Saint Paoul⁴⁶ et aleure firent marche avecque ce plant de les mener par dessus la mer ouudit bourcq d'Erquy et pour ce ly semblerent prier ung [...] et dit que ne feus semblant de avoir nulle haste et icelle nuyt coucherent en la meson de ce deposant en ung lit que leur fist drezcer et dicelle nuyt ne beueurent ne mangerent et le landemain quelx jours de dymanche deroient en ladite meson y disnerent souperent et coucherent et dit ce plant que au bien matin diceluy jour de dymanche il [...] sen alla de sa meson au bourgc de La [...] et ne retourna jucques a la nuyt dudit jour et dit ce plant apres estre a sadite meson arrive quil demanda a sa femme si lesditz incongneux avoient esté celuy jour a la messe que il avoient fait laquelle luy dist que ne avoient esté point a leglise ne ouy messe mes que apres quilz avoient disgné ilz estoient allez a lesbat aupres de ladite meson parla ne deposant avecques iceulx incongneuz celuy soir et ja avoient souppé et estoit luy de lors couche / Et ne eurent aultres paroles ensemble fors que luy demanda a quelle heure (**f° 288**) au matin ilz sen yront quel leur dist que le plus tost quil auroit abillé sen fait a les passez et le lendemain environ dix heure audit bat [bateau] se miserent lesditz incongneuz ce deposant, Jehan Le Quere et Henry Chaton filz de ce plant et allerent en lisle de Brehat ou ilz coucherent audit bat / Et le lendemain assez pres de ladite isle se descendirent avecques lesditz incongneuz pour que feust grande tourmente et ainsy que iceulx incongneux dist estre si indisposez a ocasion de larasonnement et que plus mer ne se peusst tenir et fut a la coste appareillez pour lavoir et illecques les lesserent sans compaignons de nulz autres, et deulx eut ce plant deux solz dix deniers et non plus combien que leur en demandast en plus large, et dit que encore dix lieux longer dudit bourgc d'Erquy et nestoit que a quatre lieux de la meson de ce plant par quoy diserent deulx se contenta et sen alla ce tesmoign et les autres de sa compaignie sus nommez sans aultres plances autre avec iceulx incongneuz ne que luy demandassent le chemyn que devant tenir a aller audit bourgc d'Erquy ne sceut pour [...] ne aultement que lesditz susditz incongneuz eussent esté en franchise a Lentreguier ne quilz feussent serviteurs ne familiers du sieur de La Hunaudaye ne aussi quilz eussent avoit ledict homicide bien dit avoir ouy dire tout communement (**f° 289**) ou pays ou quel il abite que les gens du sieur de La Hunaudaye que ne avoit nommez avoient fait ledit homicide / ne a ouy dire ne declerez a cause pour quoy ce que ledit sieur de La Hunaudaye ses freres ne aultres gens de la meson dudit sieur eussent aucune hayne consceut avecque ledit meurdry dit ne se veut de [...] ne fere aucun desplesir. Et est son tesmoignage.

Jehan Le Queré de la parouesse de Plebihen⁴⁷ en Treguier eaigé denviron cinquante ans ainsy quil dit jurer et enquis respondre que ung jour par avant la feste de Nouel a ung jour que ne seut confiez ne aultrement le temps que il est demourant pres la meson de Henry le Chaton monstrant de aller souvente foiz sur la mer avec luy a [...] / pour apert gagner par ledit Henry fut mandé par Hervé filz dudit Henry aller a luy, lui aider amener et querir sur la mer ung petit basteau sans luy declerez pour quoy sestoit incontinant ce plantz se rendre a la rue de la mer par la meson dudit Henry ou il trouva ledit Henry (**f° 290**) en ung bat ledit Hervé son filz et deux hommes a ce plant incongneust quil estant envelopez de mantel pour tant quil feust grant froit et sen allerent audit bat que a lile de Brehat ou ilz se acosterent pour tant questoit pres que nuyté. Et dit que lesditz incongneuz [henor] allerent soupper en ladite isle / Et audit bat pour iceluy cause demourez ce plant et ledit Hervé le Chaton et encore deux ou troys heures apres retournent oudit bat lesditz Henry et incongneuz. Et non aultres et illecques coucherent et le

⁴⁵ Commune d'Erquy (Côtes-d'Armor).

⁴⁶ Saint-Pol de Léon (Finistère).

⁴⁷ Il s'agit de la commune de Pleubian dans les Côtes-d'Armor, en face de l'île de Bréhat.

lendemain tirerent en avant que environ deux lieues pour ce quilz avoit veut [...] / Et que y avoit tourmente sur la mer / Et que lesditz incongneuz dist estre mallaidés par la marree descendirent [...] lesditz incongneuz au port Lasou pres Mat de Goelo⁴⁸ / Et dit que a l'issue dudit bat et quant prindurent la mer dit que bien po les regarda et avoit lun deulx que luy peult souvenir une robe de drap gris sur le bras aussi avoit chacun son coustras ne savoit desoubz leurs [...] ne abitz / Et dit que diceulx ne dempuix ne aveu congnoissance et en eulx ne apresent que aucune ressemblance de teneur [...] et ce quilz feust en nulle fayte et ne seut dire pour plus ne aultrement que estoit lesditz incongneuz ne quelz feust des gens (**f° 291**) du sires de La Hunaudaye ne aceulz qui avoint comis le meurctre et homicide en la personne dudit de Beaumanoir et autre chose touchant le fait dudit homicide monstrant et despendement dit riens nen seu / quelz d'istance ligue lors.

Herve Chaton, filz Henry Chaton, de la parouesse de Plebihen eaigé de environ quinze ans jure sur saints evangilles touchez et enquis respondre que environ ung moys par avant la feste de Nouel deroin a la meson du pere de ce plant en ladite parouesse de Plebihen a ung jour de salemady au soir se rendirent deux hommes a luy incogneuz, lun deulx de plus grant haulteur que lautre et nept le petit plus gras que le grant que le grant / Et ne seut dire quelle fares en visaige ilz avoint et dit le plus petit estoit vestu dune robe de draps gris et aultre [...] jacquetiere desoubz ne seut dire de quelle coulleur estoit ladite [gal-] ne de quelle longueur estoit lesditz abilllements ne quilz avoit voistens et abitz ilz avoint fors (**f° 292**) que luy semble quilz avoint chapeaulx noirs et dit que le plus petit deulx avoit desoubz sa robe ung cousteau bracquemart⁴⁹ ne leur aprirent aucuns autres [...] ne leur ouyt dire quilz estoit ne dequelle par venoient et le lendemain questoit jour de dymanche partout le jour dit que firent a ladite meson ne seut quilz firent a celuy jour pour que ce plant ne fut a ladite meson tant le jour et dit quil il fut au bourqc d'Erquy dune sienne seur loign de la meson de sondit pere que environ demye lieue / Et au soir environ jour de dymanche ce plant trouva lesditz incongneuz a ladite meson et dit quilz eurent plusieurs parolles avecque sondit pere que nentendoit aucunement pour quil nentendoit franczoyz / et dit que le lundy prochain ensuivant iceulz incongneuz le pere de ce plant il que et Jehan querir se miserent sur mer en ung bat a ce [...] plant et nen veut nulz aultres et dit quil ouyt dire a sondit pere quil avoit marchandé avec lesditz incongneuz de les amener a Erquy et que des lors en devoit en ung estre / Et au soir diceluy jour de lundy dit que lesditz incongneuz et le pere de ce plant descendirent en lisle de Brehat pour aller soupper et se chauffer pour tant quil feust grant froit / Et y furent encore ung heure puis retournerent audit bat et y coucherent touz assembleblement et le lendemain au matin ouyr dire allez audit bouqc d'Erquy (**f° 293**) allerent environ une lieue oultre ladite isle de Brehat et pour ce que la tourmente qui estoit sur la mer et veu quilz avoint contraire ne peurent allez avant et descendirent avecque lesditz incongneuz et ne leur ouyt dire que [...] ilz yroit et la les lesserent et sen retournerent a la meson de sondit pere ne seut que demanderent iceulz incongneuz / Et ne seut pouvoir dire ne aultrement que lesditz incongneuz feusst des gens dudit sires de La Hunaudaye ne que feust ceux qui avoit mis a mort ledit feu Jehan Eder / ne que iceulx incongneuz ne que par aucuns des gens dudit sires menez ne conduitz leur [...] aide fere pour secourer et evader [...] ne aultre chose oultre ce quil a parler de la chose a quoy est [...] et est son tesmoignage. [...]

⁴⁸ Port Lazo, en face du Grand Mez de Goëlo.

⁴⁹ Le braquemard est un couteau du Moyen Âge à lame longue et large à un tranchant et parfois un court contre-tranchant.

(f° 294) Vincent le Merd natiff et demourant en la ville de Lentreguier eaigé de quarante seix ans ainsy quil dit jure dire voir sur saintes evangilles, le septiemes jour de mars lansusdit record congnoistre le sires de La Hunaudaye Georges et Jehan Tournemyne ses freres et dame Marie de Villiers dame de La Beraudiere, meisme Petit Jehan Bastart et Jehan du Breil / aussy veut communement ledit feu Jehan Eder sieur en son temps de Beaumanoir et dit que environ dix ans deroins que il ouyt [...] du maraige demande celle dame Marie a ledit feu Jehan Eder / Et ce aller a la congnoissance dudit sires de La Hunaudaye et sesditz freres / Dit que en firent contans / Et elle estant a La Beraudiere dist a ce plan environ seix ou sept ans deroins que luy peult souvenir que le feu Roy Loys avoit envoir devers elle ung officier du Roy du pays danjou qui luy nomma duquel nest recolle du nom et que luy avoit fait juré sur ung missal⁵⁰ de non soy marriez sans le congé du Roy et luy en avoit ledit [...] fait deffence sur paine de prendre ce quelle avoit posseder es pays danjou du Roy et dist celle dame a ce deposant que nen dist riens / ne luy dist a quelle requeste ne priere le Roy luy feusst fere lesdites deffances ne que ne eust esté a la [condition] et requestre desditz sires de La Hunaudaye et ses freres et ne seut que ilz eussent donné ne fait donner menaces audit Eder a ladite dame Marie ne lun de tuer et fer tuer ledit Eder ~~fe ledit m-~~ (f° 295) si ledit mariaige estoit acomply ne dempuix iceluy consulmé ne que se feussent ventez le dire ne diligence en aucuns lieux que lesdites choses ayne este [...] notoires / bien dist ~~audit ouy~~ autre ouy dire comment que lesditz sires de La Hunaudaye et seditz freres nestoint pas comptans dudit mariaige / Aussi dit notoirement autre ouy dire a Nantes et ailleurs des environs deux ans environ et plus que dempuix que lesditz sires de La Hunaudaye et ses freres pour debvoir impescher ledit mariaige destre fait avoit controit icelle dame Marie a aller du lieu de La Beraudiere ou elle estoit demeurenpte a La Hunaudaye / Et que au chasteau dudit lieu la avoit tenue / aultre son goe et [...] par longc temps que par les amys delle en avoit esté fait plainte au duc et par son mandast elle avoit esté mener et conduite a Nantes et mise en liberal arbitre / Dit aultre avoir ouy dire notoirement des environ troys ans deroins [...] que environ ledit temps de troys ans iceluy feu Eder et la dame dame navoit contracterent marriaige ensemble et espouserent en la ville de Nantes et les veut ce plant ensemble monstrier assemblement que homme et femme mariez et esdite chose [...] ne aultrement que lesdiez sires de La Hunaudaye et ses freres a ocasion dudit mariaige ensuivant conseu haynes et inimitié ledit Jehan Eder ne luy donne aucunes menaces de le fere mourir et perdre ne a [...] dudit Eder ne que luy feussent (f° 296) perdre son bien ne quilz se feussent venez de se fere desplaisir audit Eder ne es amys ne que feussent perdre a ladite mere son bien ne que le feussent despossedez ne se ventez de la [-hizer] plus que [...] / ne dit aucunes parolles de menaces bien dit autre ouy dire que iceluy sires avoit mes en proceix dessus dite [...] lesditz Eder et ladite dame Marie ne ouyt dire par quelle nouit et fut ce plant present au bourgc de Rozet environ demy an a present mariaige que entre lesditz sires de La Hunaudaye et lesditz Eder et ladite dame Marie en la presence desditz Jehan et Georges freres dudit sires fut [app-] fait sur ledit proceix [...] / Et aussi dun autre proceix quilz avoint [...] de Quimgamp par linstance et arrest mes et assis de lapart dudit sires sur [les-cuz] et [remen-]des troies que celle dame tenoit en douaire / par lequel appoint sur dit et avenu que ledit Eder et ladite dame ne feroient aucune alienaction dessurditz dicelle dame par tant fust lesditz proceix nestans receues aultres lettres que en fust fectes ne seut qui passe lesdites lettres / Et bien po de temps apres veut ce plant lesditz Eder et la dame Marie demouraz audit lieu de La Hunaudaye et y estoit lesditz sires demourant ne seut par combien de temps y demourerent et de la sen allerent lesditz Eder et

⁵⁰ Le missel est un livre liturgique du rite catholique romain dans lequel on trouve tous les textes nécessaires à la célébration de la messe.

dame Marie a La Beraudiere ne seut ce ouyt dire locasion pour quoy / Aussi ne seut point dire ne autrement (f° 297) que ledit sieur de La Hunaudaye et sesditz freres ensseut prié et requis ledit feu Eder de aller demourez audit lieu de La Hunaudaye / Et que les sires luy dist ne fait dire quil vouloit que tout son mesnaige et son cas feust commender par ledit feu Eder et ladite dame Marie que du toux sen soumeçant a eulx que ledit Eder le eust ainsy prins et fait / Bien dit que environ la Saint Andre deroin, il ouyt notoirement dire que ledit de ~~beaumeoir-eder~~ avoit este meurdry et occis en la forest de La Hunaudaye par Petit Jehan le Bastart de La Hunaudaye et Jehan du Breil serviteurs dudit sires de La Hunaudaye et que a celle henor ne autre en ce plant congnoissance aucune que lesditz Eder et ladite dame Marie feusst allez demourez audit lieu de La Hunaudaye / Aussi ne seut [...] ne aultrement que environ huit jours apres la visee qui avoit faicte audit lieu de La Hunaudaye lesditz Eder et dame Marie ledit sires de La Hunaudaye et sesditz freres feussent menez et declerez de aller chasser en la forest dudit lieu aux grosses bestes pour illecques acomplir leur mal vouloir et intencion de meurtre avoit iceluy Eder et que plus facilement et secretement la le fesant que aultrement ne que [vespre] davoit ladite deliberacion lesditz Petit Jehan et du Breil eussent dit telle ou semblables parolles lun deux a lautre : « Mon compagnon, ne tendras tu bon a tuer (f° 298) le grant sanglier ? » et que lautre eust respondu : « Par la mort Dieu ouy » et que lautre eust dit : « Monsieur en auroins doncques leschine » ne que iceulx a Petit Jehan et du Breil eussent charger et commandast de iceluy Eder tuer en mettre a mort / ne aussi que lesditz sires et sesditz freres eussent en ladite forest mener ledit Eder et que lesditz Petit Jean et du Breil feussent pres garenz diceluy son espye et quant avoit esté en entendu dun cartier de ladite forest nommé le Boncanbay ledit Eder eust esté [...] et assailly par lesditz Petit Jehan et Bastart luy donné plusieurs coups rollees desditez espyeu ne que ledit Eder eust aucunement de le meurdre ne fait aultre cry que entendit ledit sire sesditz freres et leur gens eussent leur [...] querir les chiens pour descomptez ne aussi que ledit sires et sesditz freres feussent lors pres desditz Petit Jehan et du Breil fere le meurtre et occision dudit Eder / ne que a ocasion des plays et [...] audit Eder il feust en leure allé [...] et sans confession bien et des notoirement avoir ouy dire que a ceste nept (f° 299) chose bien notoire au pays et en la partie que ladite forest lesditz Petit Jehan Bastart et du Breil avoit [...] et assailly ledit Eder le meurdry et occis en leur sans autre sans autre james parler a [...] ny autre et fait ce plan present en ladite ville de Lentreguier en la meson de Jehan Le [-onant] lors que iceulx Petit Jehan le Bastart et Jehan du Breil demandenrent avoir franchise et avoir fait ledit meurdre et homicide en la personne dudit Eder ainsy quil est a plan narré et contenu en une [...] les XXung^{me} deroin jours de novembre deroin passé [procurer] de J. de Lesecouart que aucuns [...] / Et dit ce plan que ledit Bastart avoit une robe de drap soiet longue jucques aux genoulx chausses rouges que luy semble et ledit du Breil avoit une gabardine de drap seict chausses blanches que luy semble ne sceut dire quels bonnetz chapeau aultre ne outils [...] ilz avoint et dit ce plant que iceulx Petit Jehan et du Breil [...] logez et avoit une chambre a la meson de ce plant ce que leur reffuza disant quil ne vouloit point qui allassent environ luy que luy pourroit donnez [...] et ne donna aide conseil ne confort et dit (f° 300) que duant le temps qui furent en ladite ville ilz disguerent par deux foiz a la meson de ce deposant et dit que il neut james charge par environ de [...] ne auculement dudit sieurs de La Hunaudaye sesditz freres ladite dame Marie ne aultres de [...] aide conseil ne faveur esditz Petit Jehan le Bastart et du Breil de leur bailler et administrez vivres ou argent ne aultres choses quelx [...] ne veue environ iceulx le Bastart et du Breil aucuns des gens dudit sieur de La Hunaudaye ne aultres conduire ne mener iceulx Petit Jehan et du Breil ne leur donner aide conseil ne confort ne en riens les pourvoir conseiller ne advertir en bailler des [escript] ne aultrement et dit que en ladite ville de Lantriguier il veut iceulx Petit Jehan et le Bastart et du Breil par deux ou troys jours et non en plus large / Et ce sceut ce deposant leure

de leur aller hors dicelle ville ne quelle artie ilz estoit allez ne la cause pour quoy sen estoit allez hors que dit avoir ouy dire comment que eussent paour destre emprisonnez et quil dit avoir ouy dire quilz estoit a la meson dun nommé Le Chazon en la parouesse de Plebihen et que il le savoit menez et desmendez a la coste de Goelo. Il dit que apres quilz sen furent allez de ladite ville environ deux jours apres il veut en ladite ville Pierres de la Marre procureur de La Hunaudaye (f° 301) quil dist ce plant quil est allé audit lieu de Lantreguier pour fere serche de sesditz Petit Jehan quel estoit aller audit lieu de Lantreguier pour fere serche deditz Petit Jehan le Bastart et du Breil et rediger par escript leurs confessions et qui avoit intencion de les aprehender sil les eust trouvez et emporta vecques luy le double desdites confessions / Et est son tesmoignage que [...].

(f° 301) Rolland Haiscourt de la parouesse de Plouha en diosece de Saint Briec eaigé de environ vingt^{vii} an ainsi quil dit jure et enquis, recorde quil congnoisoit ledit Jehan du Breil des environ ung an deroin et dudit Petit Jehan Bastart de La Hunaudaye ne avoit en cognoissance jucques au temps quil le veut a Lentreguier que apres dira / Dit auparssur que environ la feste de Saint Andre deroine passez a ung jour que ne sceut [confimez] en la ville de Lantreguier en laquelle ce plan est demourant avecques Vincent Merd, il trouva lesditz du Breil et Petit Jehan le Bastart de La Hunaudaye ne sceut dire ou quel eust dicelle jucques estoit veistuz de robes (f° 302) longues jucques environ des genoulz ne sceut dire de quelle sorte de drap estoit rempliz, robes chacun deulx ung bracquemart et ne sceut dire ne desinez qeulx autres vestemens et abitiz portoint lesditz Bastart et du Breil et dit [...] quil avoit congnoissance dudit du Breil il son aresta avecques eulx et estoit iceulx Bastart et du Breil seulz allans par icelle ville sans avecques eulx autre veu ne apeu aucunes gens du sieur de La Hunaudaye ses freres ne aultres et ne veut aucune les conduyre ne mener les [...] favorisez supportez ne advertyr es de ce quilz devoit fere ne leur administrez [...] ne aultres choses leur donnez conseil aide pou ne faveur en aucun endroit et dit que ledit du Breil dist a ce plant que allast boire avecque eulx que luy donneroint pinte de vin ce que fere voullu et cosentit et allerent a la meson dun nommé Pierres le [Kerlis] en une chambre haulte dicelle meson et luy diserent que en celle meson estoit logez et aprent au cheur dudit lit estant en ladite chambre deux espyez ne sceut a qui ilz apartenoit et leur demanda ce plant pour quoy ilz estant allez en icelle ville, lesquels luy respondirent que ilz y estoit fuiz et mis en franchise pour que ilz avoint tué feu Jehan Eder sieur de Beaumanoir / Et ce deposant leur demanda sur le quel deba, le quel du Breil respondist que ne avoit esté en la forest de La Hunaudaye et sur le debat de la rué dune beste, que ne declera que sur ce ilz avoint eu grandes parolles ensemble ne declera quelles (f° 303) et que sur icelle ledit Bastart avoit donné dun espyez quil avoit audit Eder au trances du corps / aussi dist ledit du Breil quil avoit frapper ledit Eder ne luy dist avec quoy quatre foiz ne en quel endroit / Et ne luy diserent quel feust mort sur la place et dit que ledit du Breil maudioit leure [...] estre aussi ouyt ledit Bastart confesser et dire avoir tué ledit Eder ou debat de la rué dune beste et ne luy diserent aultrement que fut cause notoire dudit homicide / Et dit que [...] avecques iceulx Bastart et du Breil et ne leur demanda quelle intencion ilz avoint ne que ilz estoit deliberez de fer par apres, dit que les veut par deux ou troys jours en ladite ville en leglise de Saint Tugdual et aucune [...] ne parolles neut avecques eulx et ne sceut leure ne le temps quilz sen allerent hors le minihy et franchise dicelle ville que les [...] et entendist a sen aller qui les conduisit ne lendroit ou ilz allerent fers quil ouyt dire ne sceut a qui ne a combien de gens quilz estoit allez a Plebihen ne ouyt declerez qui y estoit allez feer / Et dit que james ne les eussent ne mena hors ledit menehy et ne sceut que aucun le feist et neut congnoissance de leur aller et venu dit quil parla avec Vinvent Saulnier de ladite ville et luy demanda savoir si lesditz Bastart et du Breil sen estoit allez que plus ne les veuent en ladite ville pour aucune cause ne le

demandoit, quel Saulnier par (f° 304) aucun temps luy dist que sen estoit allez ne sceut a quel [...] il le disoit et dit quil ne porta chacun pour aucuns [...] que feussent arrivez accompagner de Gautier [Da-adt] le lieutenant de Nantes pour prendre tesmoignaige touchant ledit homicide / Item dit ne savoir pour dire ne aultrement que ledit Vincent Merdy eust [...] ne recepte lesditz Bastart et du Breil leur administre donne conseil faveur support ne aide baillé or argent ne autre bien beu ne mange a sa meson a sa congnoissance / Et dit que le deroin jour du moys de janvier deroin il demanda en la ville de Rennes apres de lamare sil scavoit ou estans lesditz du Breil et Bastart quel luy respondit quil avoit ouy dire quil estoit o le Roy des Romains / Interrogé a quel proceix il le demandoit dit que estoit pour savoir ou ilz estoit / examine pour quelle intencion / Dit que nestoit pour nulle autre cause et dit quil est chose toute notoire que ledit du Breil et Bastart avoint meurdry et occis Eder et que ilz estoit et sont futiff a ladite cause et aultre chose touchant le fait dudit homicide dit ne scavoit / et est son record [...].

(f° 305) Jehan Regnier meunier au grenier de la parouesse de Meral ou diosece de Angers [...] des ville et chasteau de Craon de [...] trois lieues demourant au villaige de la [Soustrez] en la partie, eaigé de environ environ vingt ans jure et [...] le neuffiesme jour de [-bre] lan mill IIII^{cs} IIII^{xx} seiz, recorde avoir veu et congneu deffunct Jehan Eder escuier sieur en son temps de Beaumanoir et dit quil est demourant a distance dun lieu de La Beraudiere de environ ung quart de lieu / Et dit ne avoit james veu ne congneu ledit Eder jucques avant quil ouyt notoirement dire que il est marié avec Marie de Villiers dame dudit lieu de La Beraudiere par deux ans environ, dit avoit veu ledit feu Eder et ladite Marie de Villiers demourez audit lieu de La Beraudiere, et estoit chose notoire quilz estoit ensemble mariez et dit ne savoit par oui dire ne aucunement que le sieur de La Hunaudaye, Georges et Jehan ~~Tournemine~~ ses freres eussent pourchassé vers le feu Roy Louys lempescherent et [...] du mariaige devers celui Eder et ladite Marie / bien dit avoir ouy dire a Craon ne sceut a [...] quel nen nembré de gens et fut environ troys ou quatre ans deroins que si ledit Roy Loys ne fust mort que ladite Marie ne se feust point marié ne seut dire a quel proceix le diserent / Et dit que durant le temps quil a veu demourez audit lieu de La Beraudiere lesditz Eder et Marie il hautoit mener fait a prent audit lieu (f° 306) de La Beraudiere et souvente foiz y partoit vendit de sa [...] / [...] paroillement dit ce tesmoign ne savoit que dempuix la mort dudit feu Roy ledit sieur de La Hunaudaye et sesditz freres eussent fait conduire et mener ladite Marie dudit lieu de La Beraudiere en une charrette ne aultrement au chasteau de La Hunaudaye et violemment la y avoit fait de tenir pour impescher ledit mariaige enpachemens bien dit tout coment et notioirement avoir ouy dire au pays apres le deceix dudit Roy que ledit sieur de La Hunaudaye avoit fait [...] ladite Marie dudit lieu de La Beraudiere audit lieu de La Hunaudaye affin de impescher que ledit mariaige de elle et dudit Eder feust parchevé, ne a ouy dire que la eust fait detenir au chasteau dudit lieu de La Hunaudaye violemment ne aultrement ne que iceluy sieur lesditz Georges et Jehan ses freres dempuix le mariaige desditz Eder et Marie ne aucunement eussent dit, ne se fussent veuz que ledit Eder se repentiroit de avoir fait ledit mariaige avec celle Marie ne luy donne aucunes menaces ne que ladite Marie ne lun deulx eussent consceu aucunes haynes et inimitiez afec ledit feu Eder dit ne se veuz de luy fer mal desplesir a luy et dit quil est commun et chose toute notoire audit [...] que Petit Jehan Bastart de La Hunaudaye et Jehan du Breil avoint meurdry et occis en la forest de La Hunaudaye ledit feu Jehan Eder et dit que environ quatre ou cinq ans deroins et dempuix jucques environ le temps dudit homicide (f° 307) il a veu lesditz Bastart et du Breil demourez avec ledit sieur de La Hunaudaye et a ouy dire notoirement que ledit sire avoit nourry ledit Bastart et dit quil est chose toute notoire que lesditz du Breil et Bastart au temps dudit homicide estoit familliers domesticques et commensaulx dudit sieur de La Hunaudaye / ne sceut point parler ne aucune a quelle ocasion ceulx dessus ditz avoint fait ledit

meurdre / ne de quel comendement ne [...] coment et autre chose du fait dudit meurdre par menaces intencion ne aultrement oultre ce quil a parler dit ne savoir et est son tesmoignage.

(f° 307) Guillaume Le Boessec de la parouesse de Lammodez ou diosece de Dol jure dire voir et requis le jour de mars lan surdit sur la [...] de luy [...] davant [...] Jehan de Rompierres et Daniel Miffeut [...] en ce quil a certiffier par son record avoir trouvé en chemyn il allant a Lentreguier deux hommes quil ne congnoissoit ~~dit~~ dit que par ce que a pres les veut en la ville de Lentreguier les ouyt sentre nommez et appelez savoir lun Petit Jehan Bastart de La Hunaudaye et lautre Jehan du Breil et lors quil (f° 308) les trouva en chemin dit quilz estant saisi chacun dun grant coustras [...] leurs robes et chacun deulx dun espiez quilz portoint en leurs mains et estoit vestuz savoir ledit du Breil dune robe en [matiere] de gahuaudiere en forte de [...] ne sceut desiniez le pardessus de ses autres abillemens et dit ~~que ledit appelle du Breil estoit plus haute de ung doyt~~ et [...] quil ouyt appellé le Bastart de La Hunaudaye estoit veistu dune robe de paroille sorte que celle dudit du Breil ne savoit descrire ses autres abillemens et dit que ledit appellé du Breil estoit plus hault de [...] troys doiz que ledit Bastart appellé nestoit celui Bastart plus gras que lautre/ Et en ce que est contenu par sondit record quil ouyt dire que lesditz Bastart et du Breil avoint reconnu avoir fait ledit ~~meurdre~~ homicide sans fere decleracion a quel [...] de gens dit que le ouyt dire en la meson de Jehan de Le Servant audit de le Servant [...] par six autres personnes dont nest des noms souvenant / Et auparssur en ce quest le [relay] quil fait par sondit record [...] avoir ouy dire que lesditz Bastart et du Breil avoit congnoissance fait en riens et par icelle [...] ne y fait [relay]. Ainsy signe Le Servant et Jehan le Forestier le XXVII^{eme} jour de novembre deroin. [...] ensuyt en la fin de parlez [...] et du cas dudit homicide audessus riens ne sceut par ouir dire ne aucunement et est son tesmoignage. Ainsy signé G. Boessec.

(f° 309) Guillaume Belignet eaigé de environ trante ans ainsy quil dit jure et renquis le second jour de apvril avant pasques lan mil IIII^{cs} IIII^x seix, recorde que par avant le deceix de feu Jehan Eder avoir [...] iceluy Eder deroine par environ ouict ans / jucques au deceix diceluy qui fut au moys de novembre deroin et dit que environ quatre ans deroins il alla au lieu de La Beraudiere au commandement dudit Eder en la compaingie de Anthoine de La Mote lequel Anthoine avoit charge du sieur de Rieux de aller devers la dame dudit lieu de La Beraudiere luy parler du mariaige du sieur de La Hunaudaye avecques la seur dudit sieur de Rieux et portoit ce plant des lettres dudit Eder adreczancs a icelle lesquelles serviteur luy porta et au retour quil fist diceluy en ce pays celle dame lui bailla lettre aussi adrecans audit Eder et dit que environ la Toussains deroine passer eut troys ans furent les espousailles desditz Eder et dicelle dame en la ville de Nantes en celle sepmaine celle dame envoya ce plant audit lieu de La Beraudiere luy devoir querir de la [...] qui estoit en ung coffre, en icelle meson duquel coffre lui bailla la cleff que dist pour icelle peine apres de [...] mestre dostel de ladite dame en une chambre basse diceluy lieu apellee La Beraudiere a laquelle dist que ladite dame a celle fin remandast et retournerent et luy feisant fere savoir que feust bonne chere et que elle (f° 310) la feisoit bonne et que ne avoit perdu sa mestresse laquelle Jehanne feuste grande [-acion] se signa diserent par icelle parolles : « Helas, je suis fort esmeuvable et que ne se ose de vous trouvé ceans parce que avez porte les parolles du mariaige de la dame et de Monsieur de Beaumanoir » et que quel eust pansé que es [...] paravant allé audit lieu que y fut allé par celle causes que neust pas eu lebon receuil que charge luy avoit fait / et que eust esté plus grant hommes es enffens de ladite dame que le feu sieur et pere eust este marié avecques la fille de son mestaier que entre celle dame veu lonneur que les avoit fait / Monsieur de Syon est icy davant y [...] et allé en [...] se il [...] ; « J'ay paour que il vous tue » / diserent que [...] sen pranseis garde ce plant luy dist quil avoit

des lettres de ladite dame quelle envoit audit de [Vengrau] pour luy envoyer les [p-] qui estoit diceluy lieu en dist que si ledit sieur de Syon le trouvoit que ce y avoit remedé que ne lenstrast et quil avoit ung grant coustrat pamart et en linstant sen alla ce plant dudit lieu et par ung jeune garczon quil trouva hors ledit lieu se fist conduire illecques pour le lieu de La Touchardiere auquel apres medy et fist mectre son cheval en une estable [...] lieu au quel lieu trouva ledit sieur dudit lieu et sa femme auquel dist que ladite dame de La Beraudiere se recommandit et luy (**f° 311**) faisoit savoir que se pranseist bien garder de ses besounges / Et apres avoir soupper et se estre couché en ung lit en icelle meson y arriva ung nomme Jehan Gaticzon queu dicelle dame quil parla avec ce tesmoign et luy dist que le dit de Vengrau luy feisoit savoir que le pouvoit aller parler a luy pour le dit sieur de Syon et ses gens luy avoient dit quil venoit de parler avecques le tesmoign et quil estoit ung mauveix traistre et que le recommandast a ladite dame et le plus tost qui pourroit lui fere savoir des nouvelles et que [...] ne menacast ce tesmoign en iceluy lieu quil ne sen allast / Dit oultre que environ une heure et demye apres audit lieu se rendit a luys de la meson dudit lieu ung homme a ce plant incongneu quil appela a luys dist en plant en basse voix monstrant feisant [...] par telles parolles : « Qui est la hau ? » et luy fut demande par la dame dudit lieu estante en son lit couche qui estes vous lequel incongneu respondist : « Je suys envoyer jay de par [...] de Challans quil ma donne ung blanc pour venir dire a ung gentilhomme qui est ceans que pour dieu tout incontinant il sen aille car le sieur du Hommet est arrive a La Beraudiere a bien quatorze chevaulx qui ont jure se ilz le recontrent que james il ne mangera de pain et pour Dieu quil sen aille » auquel fut dit parla dame dudit lieu qui y avoit eu ung gentilhomme le jour a ladite meson mes quil sen estoit allé netoit ja en [...] (**f° 312**) et po de temps apres ce tesmoign ouyt dire a ung nomme Guyon serviteur dicelle meson quil estoit couché en ung lit en lestable diceluy lieu que par ung boays taillans estant ou derriere dicelle meson sestoit rendu [...] de ladite estable / ung homme nommé Noyont plus que aultrement a lautre ouy parler que sestoit Estienne Raboray serviteur [...] du seigneur de Syon quil luy avoit demander a qui estoient les chevaulx qui estoient en ladite estable dudit lieu et quil avoist respondu que ny avoit que le cheval de son mestre et oultre que ledit Raboray luy avoit demander ou estoit le gentilhomme qui estoit ceans qui estoit du pays de Bretagne et que luy allast dire pour Dieu que tout incontinant sen allast et que il avoit dire que ne y avoit riens pour ce que avoit esté par sondit mestre [...] si aucuns alloint demander iceluy gentilhomme de ainsy le dire puis apres ledit seigneur de La Touchardiere dist a ce tesmoign se il les [...] que il sen yroit toute nuyt et envoya ledit sieur de la Touchardiere, ledit Guyon son serviteur pour veoirs et savoit se y avoit aussi tost retourna et dist au dehors de la [...] de ladite meson il avoit trouvé [...] ou cinq hommes a luy incongneust feussent allez a ladite meson fut enfermer en ung coffre et y fut jucuques au lendemain environ sept ou huict heure (**f° 313**) et dempuis a ouy dire a ladite [...] femme dudit Challan que Yvon de la Damere paige dudit sieur de Syon ledit Estienne Rabouy et ung appelle le [...] serviteurs dudit sieur de Syon et une apellé Forestier demourant assez pres dudit lieu de La Beraudiere estoit allez audit lieu de La Touchardiere le sercher lors quil avoit este audit lieu de La Beraudiere / Ne sceut point dire ne aultrement que ledit sieur de La Hunaudaye, Georges et Jehan ses freres ne lun deulx eussent conceu haynes ne inimitiez a lencontre dudit feu Eder dit ne se vantez de lui fere ne fere fere aucun ne desplesir, ne mectre a mort / bien dit avoir ouy dire notoirement que lors que ledit sieur de La Hunaudaye avoit eu congnoissance que ledit Eder avoit fiancé ladite dame par le moyen de ses amys avoit trouve moien de fere [...] a celle dame de par le feu Roy Louys de non pachever le mariaige avec ledit feu Eder sur paine de perdicion de lheritage que elle tenoit et pessodoit au pays de France et que nest quelle desiroiz de par par le Roy luy avoit fait ladite deffence / Aussi dit quil a esté chose notoire par avant ledit mariaige a compaty de paour que celle dame parchevast ledit mariaige que celuy sieur de La Hunaudaye et ses freres pour fere

oultre [...] et voulloir de ladite dame avoint [...] icelle dame dudit lieu de La Beraudiere a La Hunaudaye et icelle garde et de teneue au chasteau dudit lieu par longc temps que ne a ouy [...] et jucques a tant que parle duc nostre souverain seigneur fut mise en son franc et liberal arbitre ne sceut point dire ne autrement que fut cause ne moyen de fer aller demourent audit lieu de La Hunaudaye lesditz (f° 314) Eder et ladite dame / Item de ce ~~que le jour~~ que le jour que ledit sieur de La Hunaudaye ses freres ledit Eder et aultres allerent a la chasse en la forest dudit lieu / auquel jour fut ledit Eder mis a mort et occis que au bien matin dudit jour lesditz Georges et Jehan freres dudit sieur de La Hunaudaye allerent a ladite forest apre diserent aller fere visee et serche [...] des sangliers et apres eux longc temps allerent lesditz sieur de La Hunaudaye et Eder a cheval et dit que ledit sieur de Syon et Allan Berthelemer touz seulz se rendirent audit lieu de La Hunaudaye et de manda ledit sieur de Syon a boire audit Allain et dit que ledit Allan ~~dist~~ dist que ledit sieur de La Hunaudaye luy avoit dit que lun de ses chiens suyvoit une beste que lui avoit fait les [...] levriers ne environ deux heures de nuyt arriva ledit sieur de La Hunaudaye audit lieu et estoit avec luy et Jehan de Treal sieur de Laventure et ledit Georges sieur de Hommet lors ouyt ce plant dire a Yvon bastart dudit feu Eder / que ledit sieur de Beaumanoir estoit mort et quil avoit esté tué en ladite forest / dit a present que le lendemain il fut present que ledit Eder fut trouvé mort en ladite forest et y estoit presens ledit sieur de La Hunaudaye et aultres plusieurs que ne sceut nommez et avoit les playes declerez ou [...] estoit et dit que a la Chappelle Chaussee en la meson de Geffroy Maillan que celle dame estoit en une chambre (f° 315) de ladite meson nomme elle Jehanne de Marennes femme de ce plant Louyse de La Ville Thebault et Marguerite de la Noue femme de Pierres de Begrand et autres dont a esté souvenant ce plant que estoit en la chacun chambre de celle ou estoit ladite dame la ouyt pleurez et dire pareilles parolles : « Il semble que il ne me ayme ne moy ne mes enfans » sans aultrement fer declaracion de que elle parloit et dit que lesditz Jehanne et Louyse rendirent par telles parolles : « Vroyment se fait Madame ».

(f° 316) Jehan Bastart de La Hunaudaye et Jehan du Breil de la paroisse de Pledelya et serviteurs dudit sieur de La Hunaudaye que ilz disoient soit venuz en ceste cité de Lantreguier pour prandre et avoir la franchise et menehy de Monsieur Saint-Tudgual sur le cas qui eust / cest assavoir que le jour d'yer le sieur de La Hunaudaye Jehan Eder sieur de Beaumanoir et aultres en leur compaignie allerent chasser a la forest dudit lieu de La Hunaudaye / Et apres avoir esté ung po de temps en ladite forest lesditz Bastart et du Breil sestoint assemblez comme ilz estoient allez bien loign en ladite forest ilz veirent ledit sieur de Beaumanoir que vint a eulx et aleor ledit Bastart lui dist quil avoit trouve la merche dun sanglier et le luy monstra et aleor ledit Beaumanoir luy dist : « Ta fierte certaine est la merche dun veau es ce ainsy que tu congneis la merche dun sanglier ? » et derecheff ledit Bastart dist audit Beaumanoir aleure desuivant ledit Bastart lequel bastart respondit audit Beaumanoir que Monsieur de La Hunaudaye ne leust pour ainsy demanty lequel de Beaumanoir que displesant de ce que ledit Bastart lui dist se [...] parolles mist la main a son espee pour laller tuer pour frapper ledit Bastart lequel Bastart qui tenoit ung espyeu en la main frapa ledit Beaumanoir dudit espyeu a travers du corps au costé senestre ainsy que luy semble / tellement que ledit de Beaumanoir que estant a cheval tomba a terre / comme il fut tombé et cheust aultre ce ledit Bastart luy donna ung autre coup dudit espyeu en la poytrinne et incontinant ledit du Breil qui estoit par devers avoua que veut et trouva ledit Beaumanoir cheoist dessus sondit cheval tenant encore son espee au poign lequel du Breil qui tenoit en son poin ung autre espyet (f° 317) duquel ledit du Breil frappa ledit Beaumanoir et sondit corps entre le braz et la poitrine et ung autre coup pour deson espaulle tellement que ledit Beaumanoirdemoura mort audit lieu / Et a present quil estoit ainsy tué et meurdry, lesditz Bastart et du Breil se misrent a regarder et sercher la baguette dudit

Beaumeoir en laquelle baguette y avoit sept soulz seix deniers ~~et des lettres~~ ainsy que le sieur semble et des lettres quels il laisserent par ladite baguette, aussi durent lesditz Bastart et du Breil que quant ilz allerent en ladite forest ilz ne pensoint point de tuer ledit de Beaumanoir ne a luy fere desplesir combien que de longc temps audit ilz desioint fere sa mort / sur lesquelx cas et chacun le dit Bastart et du Breil ont prins et demander ladite franchise, laquelle leur a esté baillé par Jouhan le Forestien lieutenant de Thomas le Haulteurs prevost de Lantreguier et banny en ladite cite ou lieu et maniere acoustumé, et apres avoir sonn  la cloche en leglise cathedral de Treguier le XXVIII^{eme} jour de novembre lan mil IIII^{cs} IIIIX et seix, oultre respondirent quilz [-drent] le cheval dudit Beaumanoir et le lesserent illecques donne comme dessus, ainsy signe J. de Leserant par [...] pass .

(f^o 318) Et dempuis le derroin jour dudit moys de novembre oudit an mill IIII^{cs} IIII^{xx} et seix lesditz Bastart et du Breil se transportent devers Jouhan le Forestier lieutenant dudit prevost de Lantreguier et luy disrent quilz avoint oubly , obmis et deless  a mectre et declerez parler prendre confession dudit de Beaumanoir ce que eussent en la personne dudit feu sieur de Beaumanoir eussent / savoir que apres avoir abatu celuy de Beaumanoir [...] dessus son cheval ledit Bastart osta ladite espee dudit de Beaumanoir que neantmoins estre cheoist et tenoit encore sadite espee [...] et dicelle espee ledit Bastart donna ung coup ou deux de tranche audit Beaumanoir sur le visaige / Et ce fait celuy Bastart geta ladite espee en ladite forest de La Hunaudaye logn du chemin ou ilz tuerent ledit Beaumanoir et traynerent iceulx Bastart et du Breil ledit Beaumanoir dudit chemyn bien avant en ladite forest environ ung guet de pierre loign dudit chemyn de doubte que ledit meudre eust est  sur leure apperreu et quilz ne peussent avoir loysir et espace de sen fouyr et se mectre en franchise et contournerent deleor et de terre le sangc qui estoit espandu / oudit chemyn des coups qu'ilz avoint donnez audit meurdry et que en traynant ledit Beaumanoir en ladite forest cheoist de la main diceluy de Beaumanoir et lui semble que ce fut de la main senestre ung petit [a-] dor qui demoura en ladite forest / ne seurent en quel endroit mes ilz [pro-] et apoterent avecques eulx lesditz sept solz seix deniers quilz trouverent en ladite baguette dudit deffunct et lesseurent en celle baguette des lettres et petites cleffs qui y estoint au parssur / a lintiniagacion que ledit lieutenant leur a faite savoir se (f^o 319) ilz avoint est  conseillez priez ne requis de personne quelconques de fer ledit meudre / nest deparvant ilz avoint aucunement parler ensemble ne marchine ne asseury fire ledit meudre / diserent lesditz Bastart et du Breill que non / Bien dit que ledit du Breil que deparvant ledit sieur de La Hunaudaye avoit parler en faire diceluy du Breil a Monsieur de Laval pour estre archer de sa compaignie que ledit sieur de Laval avoit consenty deut aux prochain voyaige que ledit sieur de La Hunaudaye devoit fer devers ledit sieur de Laval ladite place darcher devoit estre baill  audit du Breil / Et pour tant quil vint [...] audit du Breil et aussy audit Bastart que la sepmaine paravant ledit meudre ung message de mondit sieur de Laval avoit est  devers ledit sieur de La Hunadaye lexposer de aller mondit sieur sieur de Laval et que ledit feu sieur de Beaumanoir avoit conseill  ledit sieur de La Hunaudaye de sen excuser de non y aller par maladie que deffait lesieur sieur de La Hunaudaye se excusa a celle cause de non y aller lesditz du Breil et Bastart qui avoint grande cause que ledit sieur de La Hunaudaye voyans le voyaige estre destarde consceurent hayne et linimiti  de plus en plus alencontre dudit sieur de Beaumanoir encores vroy le jour dudit meudre ne deparvant celuy meudre ilz navoint aucunement entrepris ne eu penser deliberer de fer ledit meudre / ne ny pensoint aucunement a leure dudit debat qui eurent entre ledit de Beaumanoir et ledit Bastart ainsi quilz ont davant declere [...] respondre et ainsy lont jur  par leurs sermens estre vroy et deditz cas et chacun ont paroillement prins ladite franchise laquelle leur a este baill  par ledit lieutenant les jours et an que dessus, ainsy sign  J. de Leserant pass .

(f° 320) Donné et faite par copie allocacion fete a lacignation par la court de Rennes le [XVI]^{eme} de novembre lan mil cinq cens ung a laquelle coppie a esté desclarer foy estre adjouster avoir [...] de registre du procureur de ceste court donné et fait avec dessus.

A LE BARRILER passé.